

萬 有 文 庫

第 二 集 七 百 種

王 雲 五 主 編

湖 海 詩 傳

(八)

王 雲 編

商 務 印 書 館 發 行

湖海詩傳

(八)

王昶輯

國學基本叢書

# 湖海詩傳卷三十四

## 黃景仁

字仲則。武進人。諸生有兩當軒蔗梢諸集。

蒲褐山房詩話。仲則風神玉立。世比叔賢。年未弱冠。所撰小賦新詩。已有烟月揚州之譽。既而彈劍依人。歷游楚越。又從竹君學。使于皖桐。及回京。從予受業。務為閎覽博聞之學。故所過名山水。探奇歷險。才力皆足以發之。激昂排累。不主故常。信其所至。正如淚流鮫客。悉化明珠。米欒麻姑。俱成丹粒。慨屢試不遇。乃弃四庫全書館。謄錄議叙。當得主簿。未及選。復游秦晉。歿于蒲州。運使沈君既堂。及余與畢秋帆交。賻之。而時洪稚存亮吉。又往經紀其喪。始得歸于武進。生平所作。未有成編。余遣人赴蒲。錄其集以歸。最為完善。循環吟調。不啻哀猿之叫。月獨雁之啼。霜也。傳本參差。世雖有愛而梓之者。然去取失宜。今詳加決擇。存全本於書塾中。以待後之篤嗜者之論定。

### 登千佛岩遇雨

木落千山秋。天空一江碧。賈勇登巉巖。決皆瞰危壁。獵獵虎嘯林。陰陰龍起澤。膚寸足下雲。倏已際天白。急雨翻盆來。疾雷起肘腋。同游三兩人。相望失咫尺。飄然冷風過。烟霏漸消迹。雨脚移而東。長虹逗林隙。山翠溼淋漓。苔空見白石。快哉今日觀。橫寫百憂積。山川美登眺。嗟余在行役。陟高躩親廬。犯險乖子職。歸當置濁醪。孤酌奠驚魄。

### 舟發西安至東岩夜泊

清晨發西安。四野動雞唱。人烟起橘柚。村落隱相向。川景明朝暉。宿霧自消蕩。萬壑霜風乾。清江寂無漲。一一過巉岩。入江更多狀。出沒窮雕鋸。盤回互倔強。舟行苦相持。帆勢忽阻喪。所喜泉石清。終日娛騁望。短晷歛西馳。蒼岩更孤傍。隱穩遠峰出。稍稍明月上。遙指常山程。終宵一惆悵。

雨中遊桃莊看飛泉卽東坡題聽泉亭處

搜石乃得泉。泉流更洗石。石淨淨天青。泉飛化虹白。山中連日雨。深塢絕行跡。誰知穿雲來。乃有問泉客。左右聞溯聲。尋源固不隔。懸崖忽當面。飄沫時濺額。俯掇星迸潭。仰怖雷破壁。一與洞壑緣。分支已千百。稍戛旋翻銀。微渟頓澄碧。大海及汗潦。安知後所適。保茲在山心。莫忘初境窄。逝矣眉山翁。誰歟證心獲。

雪夜至亳州

信帆溯清渦。歲晚水源閉。適好將舍舟。風雪塞天地。襖被輕易肩。書篋愛難棄。絮帽不暖頭。迎面玉龍戲。夜色歛郊垌。一白了無際。虛光紛四來。極眺快心意。如乘剡溪船。興發忘所自。如襲蔡州軍。銜枚走精騎。一髮見南譙。界天明睥睨。此邦古都會。人物挺殊異。當塗斯沛豐。三分推吉利。文采擅一門。雄威振當世。霸圖荒已陳。英風渺焉逝。鬱我懷古心。香醪就市貰。殷勤愧館人。幾訶去關吏。解裝然溼薪。孤吟聊擁鼻。急雪一打窗。空宵客魂悸。

觀潮行

客有不樂游廣陵。臥看八月秋濤興。偉哉造物此巨觀。海水直挾心飛騰。溟瀆萬萬夙未駕。對此茫茫八  
埏隘。才見銀山動地來。已將赤岸浮天外。碎石礎岳萬穴號。雌蛙雄吟六節搖。豈其乾坤共呼吸。乃與晦  
朔爲盈消。殷天怒爲排山入。轉眼西追日輪及。一信將無渤海空。再來或恐鴻濛溼。唱歌踏浪輸吳儂。會  
將何物齎海童。答言三千水犀弩。至今猶敢撻其鋒。我說此語等兒戲。員也英靈實南避。只合回頭撼越  
山。那因抉目仇吳地。吳顛越蹶會幾時。前背後種誰見知。潮生潮落自終古。我欲停杯一問之。

後觀潮行

海風捲盡江頭葉。沙岸千人萬人立。怪底山川忽變容。又報天邊海潮入。鷗飛艇亂行雲停。江亦作勢如  
相迎。鷺毛一白尙天際。傾耳已是風霆聲。江流不合幾回折。欲折濤頭如折鐵。一折平添百丈飛。浩浩長  
空卷晴雪。星馳電激望已遙。江塘十里隨低高。此時萬戶同屏息。想見窗櫺齊動搖。潮頭障天天亦暮。蒼  
茫卻望潮來處。前陣纔平羅刹磯。後來又沒西興樹。獨客吊影行自愁。大地與身同一浮。乘槎未許到星  
闕。採藥何年傍祖洲。賦罷觀濤長太息。我尙輸潮歸卽得。回首重城鼓角哀。半空純作魚龍色。

晚泊九江尋琵琶亭故址

晨發黃州郭。夕宿潯陽渡。沙平岸闊不見人。瞥過千重萬重樹。潯陽渡口風蕭蕭。江州城外魚龍驕。匡廬  
作雲半紅黑。倒吸白浪如山高。是時日落霞莖暗。盆浦瑟瑟生寒濤。一舟衝浪去杳杳。獨雁帶雨來迢迢。

角聲振木木葉脫。秋聲漸高秋思發。無言攬袖起徬徨。卻倚蘭橈望天末。吳頭楚尾烟冥冥。獨立百感來無情。江風吹面酒亦醒。掣笛吼作狂龍聲。短衣踉蹌步沙灘。草間尋得琵琶亭。崩堤毀岸人跡絕。狐狸跣嘯。鼃鳴昔聞樂天此間夜送客。琵琶聲停江浸月。擬向江山作主人。卻因商婦悲遷謫。我亦天涯有淚人。對此茫茫慘無澤。吁嗟乎淚亦不必落。愁亦不必愁。君不見茫茫九派東向流。千古萬古無時休。我家乃在東海頭。西風滿意吹數日。一笑可上吳淞舟。蒹蘆蝦菜萬事足。安用江湖歎敝裘。

竹君先生偕宴太白樓醉中作歌

紅霞一片海上來。照我樓上華筵開。傾觴綠酒忽復盡。樓中謫仙安在哉。謫仙之樓樓百尺。筍河夫子文章伯。風流髣髴樓中人。千一百年來此客。是日江上同雲開。天門淡掃雙蛾眉。江從慈母磯邊轉。潮到黃牛亭下回。青山對面客起舞。彼此青蓮一抔土。若論七尺歸蓬蒿。此樓作客山是主。若論醉月來江濱。此樓作主山是賓。長星動搖苦無色。未必常作人間魂。身後蒼涼盡如此。俯仰悲歌亦徒爾。杯底空餘今古愁。眼前忽盡東南美。高會題詩最上頭。姓名未死重山邱。請將詩卷擲江水。定不與江東向流。

虞忠肅祠

氈帳如雲甲光黑。飲馬完顏至江北。六州連棄兩淮墟。半壁江南死灰色。雍公倉卒來犒師。零星三五殘兵隨。勤王一呼草間集。督軍不來來亦遲。萬八千人同一泣。卓然大陣如山立。海陵走死賊臣誅。順昌以

來無此捷。降旗斫倒十丈長。六飛安穩迴建康。此時長驅有八可。以笏畫地言琅琅。不可與言言不必。寫復中原豈今日。五路烽烟百戰平。三巴門戶崇朝失。卽今青史尙餘悲。卽今戰處留荒祠。寒蘆半沒楊林口。白浪猶衝采石磯。江淮制置亦人傑。下流觀望何無策。再造居然賴此人。不是儒生敢輕敵。蕭爽鬚眉一代雄。誰令遺骨老蠶叢。招魂縱有歸來日。應在吳山第一峰。

### 黃山松歌

黟山三十有六峯。峯峯石骨峯峯松。有時松石不可辨。一理變化千年中。丹砂琥珀共胎孕。亭亭上結朱霞封。人言松相遜石相。卽以松論何能窮。沐日浴月暈蒼翠。苔色散點周秦銅窈峭。上偃雨君蓋。糾結下罔靈虯宮。鱗張鬣縮爪入肉。萬劫避過雷火攻。昔觀圖畫訝未見。到眼更覺描無功。懸崖嵌峒不知數。莘芋縱縱皆鬼工。及至觸手膏溢節。極瘦駁處春華同。清泉洗根瀉滌泆。瑤草分潤生蒙茸。翻疑石相奇太過。相助爲理論始公。青牛伏甕不可得。幾輩對此顏如童。明當遍覓茯苓去。短鋤碎劖千芙蓉。

### 歸燕曲

玉露零堦葉飄井。巢燕差池去無影。別路三千紫塞長。秋風一夜烏衣冷。可憐欲別更徘徊。莫氣繁華眼倦開。易主樓臺常似夢。依人心事總如灰。珠簾十二斜陽下。淒涼幾閱流紅卸。昔日拋花散綺筵。此時掠草辭歌榭。海國回頭霧百重。可應魂戀舊房櫳。玉京臂冷紅絲斷。神女釵歸錦合空。亦有江南未歸客。年

年社日曾相識。故家子弟半飄零。蘆花滿地頭俱白。朱雀航邊伴侶稀。鬱金堂上故巢非。拋殘一樣新團扇。辛苦三春舊舞衣。感恩幾輩同關盼。忽待明年更相見。一任泥拋落月梁。那堪門掩無人院。伯勞東去雁南來。百遍相呼誓不回。天空自有低飛處。不是同心莫浪猜。

聞愛督從河南歸

不飲忽忽傾千觴。朝聞故人還故鄉。夢魂飛渡京口樹。覺來海月烟茫茫。七年南北頻回首。別後狂名滿人口。結客都從燕市多。愛才肯落平原後。昨夜聽雞函谷來。衣裳紫氣猶餘否。洛陽縣裏花愁風。銅駝陌頭荆棘叢。知君懷古意鬱勃。乃使黃河一線盤君胸。緱山唳夜鶴。少室聞清鐘。下視唐陵漢寢。竟何物。嗚呼此游真足驕吳儂。我行瓠落無所惜。歲歲年年去鄉國。所愧平生拜母交。阿蒙碌碌常如昔。北海空勞薦禰書。仲宣未是依劉客。太白樓頭不見君。謝公宅畔苦離羣。欲邀紅燭三更話。除借青山一片雲。我輩相望各蒼老。萬事期君致身早。不然痛飲酣青春。坐擁列鼎兼重茵。哀絲激肉烏懷抱。堂前醉倒三千賓。出門大笑忽萬里。莫使醜雞笑殺人。

花津

一燈低昂向船久。萬兀千搖至津口。船頭正與沙堤平。拂面穆穆水楊柳。風前魚鼓已報更。岸上人家尙沽酒。客來小飲飲卽醺。三兩依依話村叟。歸塗忽散草上螢。顧影防驚竹間狗。時清喜無盜賊警。波平未



是蛟龍藪。江湖自我野興長。鷗鳥於人宿緣厚。沈吟露下那得眠。獨倚篷窗數星斗。

退潭舟夜雷雨

山僧夜半敲石火。照見古壁騰龍蛇。岩風忽刮一燈滅。驚起百鳥鳴啞啞。千林萬竅浩呼洶。俄頃急雨翻銀車。嶺頭墨色接天色。白處雨腳垂如麻。我舟忽爾移斷岸。噌吰水石聲交加。舟人繫纜爭性命。千丈一落分毫差。懸崖怪樹電光裏。龍顛虎倒猶盤拏。誰知暴雨不終夕。打篷漸歇箏琵琶。前山已復掛銀漢。隔岸尙見飛灘沙。當窗絕壁不能上。薄雲來往明於紗。草頭點點散螢火。水上閣閣鳴青蛙。新涼美滿雖快意。但破好夢方還家。

蘭泉先生齋頭消寒夜集觀酈湛若天風吹夜泉硯作歌

銘八分書。下小行楷。鐫酈湛若三字。并明福洞主小印。

門鑰吸魚漏。停箭通政高齋夜。張譙燭輝沈沈酒氣濃。半酣示客端溪研。潤結雲腴細裊絲。紫蒸玉暈光凝片。有銘有印了不疑。明福洞主之所遺。我公得此走萬里。從征十載軍中攜。雷礮電燹奪不去。蠻烟惡溪沐浴之。開滕發匣起光怪。傳觀四座羣嗟咨。研乎酌汝樽中酒。似汝遭逢信希有。昔伴西山義士家。今歸東觀名儒手。當時海雪稱畸人。棄家亡命走鬼門。摩挲銅柱度藤峽。經過桂管窺五屯。藍胡侯槃雄四姓。花面蠻姬更驍勁。天女天魔舞隊奇。阿夷阿等歌妝靚。酈生翩翩書記才。陸離瑰詭相輝映。是日猺獐屢跳梁。生入虎穴覘覆藏。記成赤雅將有用。研乎辛苦曾同嘗。一身終殉家國難。片石空留姓氏香。何如

我公佐熙代。嵩華森稜見風概。天子命佐征南軍。讀書長歎魏貅隊。馳檄纔清驃國烽。回軍又撤旄牛寨。詩就常分豹略餘。書成總出山經外。想當草疏還飛文。軍聲如雷寂不聞。精瑩研石不盈尺。墨瀋洒遍天南雲。歸來論功爵不次。研乎與汝同策勛。公之英名動明主。四海傾心屬公輔。會看一片墨池陰。不日化作蒼生雨。我生萬事嗟蹉跎。廿年人墨交相磨。書生報國徒誑語。我不如研何其多。傳聞同時有綠綺。身後售歸錦衣子。卽今把玩知誰人。何年劍合延津水。惜哉見研不見琴。購得我欲傾十金。持將獻公操一曲。颯颯天風泉夜音。

蘭泉先生招集蒲褐山房觀劉貫道蘭亭禊飲圖作歌

卷尾元至元六年春中山劉貫道畫

永和觴咏誰能繼。蒲褐山房夜高會。裙屐都饒晉代風。風流本屬王家事。酒酣燭樹光模糊。潑眼見此蘭亭圖。悠然坐我此亭上。和風清氣來吹噓。橫綃七尺何不有。中山劉郎寫生手。名士爭摹馬渡餘。苦心爲落龍眠後。李伯時亦有禊飲圖見畫譜亭陰背山而流水。亭中主客竟誰是。倚欄一老觀鷺羣。渺然欲逢情所欣。吾知此是王右軍。一人偏右岸巾幘。若爲蒼生動顏色。不絲不竹情不歡。此是東山謝安石。一人披案坐上風。若欲自命爲文雄。仿佛應是孫興公。當年作詩復作序。似在慘淡經營中。其餘醉醒行坐亂無次。一一皆具點睛勢。或吟或飲或笑噱。不一雷同各生氣。最後一客依修篁。擁虎皮坐神激揚。脫非謝散騎。合是袁龍驤。四十二人盡豪翰。何必皆詩皆有傳。士女空誇洛水游。旌旗卻笑華林宴。古來文讎此獨尊。亦憑此

畫方傳神。後來貫首圖裕陵。隆準日角龍爲真。真龍貌得猶易。能貌此者嗟何人。我聞伯駒先時亦有作。吾家文獻歎錯愕。謂其纖毫微密極盡神。試較龍眠定何若。那得三圖風雨倏合併。各出精靈鬪強弱。不須望古窮幽探。筵前名士皆東南。我公文章經濟赫爲盛時出。不似典午未造無益惟空談。後來好事作真蹟。莫畫當年畫今夕。

### 圈虎行

都門歲首除百伎。魚龍怪獸罕不備。何物市上游手兒。役使山君作兒戲。初昇虎圈來廣場。傾城觀者如堵牆。四圍立柵牽虎出。毛拳耳戢氣不揚。先撩虎鬚虎猶帖。以楛卓地虎人立。人呼虎吼聲如雷。牙爪叢中奮身入。虎口呀開大如斗。人轉從容探以手。更脫頭顱抵虎口。以頭飼虎虎不受。虎舌舐人如舐穀。忽按虎脊叱使行。虎便遶巡繞闌走。翻身踞地蹴凍塵。渾身抖開花錦茵。盤回舞勢學胡旋。去似張虎威實媚人。少焉仰臥若佯死。投之以肉霍然起。觀者一笑爭醖錢。人既得錢虎搖尾。仍驅人圈負以趨。此間樂亦忘山居。依人虎任人。頤使伴虎人皆虎。唾餘我觀此狀氣消沮。嗟爾斑奴亦何苦。不能決藩爾不智。不能破檻爾不武。此曹一生衣食汝。彼豈有力如中黃。復似梁鴛能喜怒。汝得殘餐究奚補。俚鬼羞顏亦更主。舊山同伴倘相逢。笑爾行藏不如鼠。

### 題翁覃溪所藏宋槧施注蘇詩原本

即宋商邱所藏本。後歸查初白。

注蘇之難如注杜。誰識良工最心苦。永嘉本已芻狗陳。商邱刻擬景星觀。終愁綴葺或失真。遺辭浪說由  
儀補。崑崙星宿溯洪源。紫鳳天吳工雜組。廢書神游嘉泰年。漕司善本落何所。誰知好物如龍騰。六合翺  
翔擇其主。巍然靈光歸寶蘇。名齋初白菴中此先貯。率更楷法久更新。施顛同時一機杼。詩外有史史可增。  
何必蟲魚鬪箋詁。絕識博學兼歷年。能事無慙劍南序。更從缺簡追混茫。益歎今傳多錯迕。古人所有不  
盡有。補之以臆毋乃魯。查田謾說能訂譌。但存其舊不猶愈。功臣玉局自有真。益友吳興究奚取。興來竟  
欲家置編。化千萬億光氣吐。不令此籍遭泥蟠。一爲詩生洗腸腐。公如有意付木工。乞附姓氏公其許。

湘江夜泊

三十六灣水。行人喚奈何。楚天和夢遠。湘月照愁多。霜意侵芳若。風聲到女蘿。烟中有漁父。隱隱扣舷歌。  
初九夜

移家來京師

拉雜雨聲收。迢遙入夜愁。送涼孤月皎。得氣早蟲秋。簾冷無人院。箏殘何處樓。紅牆高尺五。盼斷玉繩流。  
豈是逢時料。偏從陸海居。田園更主後。兒女累人初。四海謀生拙。千秋作計疎。暫時聯骨肉。邸舍結親廬。  
貧是吾家物。其如客裏何。單門餘我在。萬事讓人多。心跡嗟霜梗。生涯辦雨蓑。五湖三畝志。經得幾蹉跎。

都門秋思

四年書劍滯燕京。更值秋來百感并。臺上何人延郭隗。市中無處訪荆卿。雲浮萬里傷心色。風送千秋變徵聲。我自欲歌歌不得。好尋騶卒話生平。

五劇車聲隱若雷。北邙誰見塚千堆。夕陽勸客登樓去。山色將秋遠郭來。寒甚更無修竹倚。愁多思買白楊栽。全家都在風聲裏。九月衣裳未剪裁。

送嵇立亭歸梁溪

只送人歸自不歸。都門柳色故依依。春寒未免欺駝褐。野性行當逐鹿菲。見鹽鐵論去路江湖隨地闊。到時櫻笋入筵肥。爲君更誦還山樂。第二泉邊一浣衣。

武昌雜詩

上游形勢百蠻分。黯慘蠻天易夕曛。西上荆門山一綫。南來衡嶺雁千羣。郢中有客皆詞賦。楚國何峯不雨雲。誰信曲高真和寡。至今延露總難聞。

由來作鎮未堪都。花草吳宮又廢墟。江漢欲浮天地外。山川渾老戰爭餘。舳艫銜尾心空壯。鐵鎖沈沙計早疎。我喜時清久延眺。未因貪食武昌魚。

夾岸雙城陡翠微。登臨誰與共清暉。更無老子連牀話。敢望仙人跨鶴飛。嶺上鳳凰歸未得。月中烏鵲去何依。漢陰咫尺愁相望。何日勞生此息機。

魯日帆橋取次開。扁舟常繫鷓鴣隈。三春無樹非垂柳。五月不風猶落梅。樓上休誇崔顥句。天涯誰識禰衡才。可憐夙負黃童譽。漂泊翻成異地哀。

春日客感

只有鄉心落雁前。更無佳興慰華年。人間別是消魂事。客裏春非望送天。久病花辰常聽雨。獨行草路自生烟。耳邊隱隱清江漲。多少歸人下水船。

金陵別邵大仲游

三千餘里五年遙。兩地同爲斷梗飄。縱有逢迎皆氣盡。不當離別亦魂消。經過燕市仍吳市。相送臯橋又板橋。愁絕默鈴催去急。白門烟柳晚蕭蕭。

程夢湘

字荆南。丹徒人。貢生。官清泉知縣。有松寥山館詩鈔。

蒲褐山房詩話。松寥集。資清以化乘氣。以霏如瑤臺瓊島間。被仙霞而飲甘露。所謂水仙數夢。水梅半樹未足喻其芳潔也。蕭真幽澹。直匹王章。後試令湖南。盡覽瀟湘山水之勝。寓書于子。以此自誇。然未嘗見其篇什。中年租樹不竟其才。世之欲洗俗塵而獨宿垢者。五言古詩。必染指於此。

西沈夜行

日夕湖水清。蒼茫月明裏。水清不受月。月出見湖底。遙山隱鱗鱗。微波空瀾瀾。星星漁火生。杳杳擊音起。

開簾向空綠。一碧見千里。空明溯流光。沿緣插蘭芷。盈盈渺難卽。臨風懷彼美。

雙溪納涼

徙倚臨前溪。坐此嘉樹林。蟬聲在高柳。晚風送餘音。菱荷靜如拭。幽香散沖襟。乍看涼雨歇。復喜歸雲陰。濯濯溪上月。泠泠手中琴。一彈復一吟。悠然清我心。

張公洞

曲蹠下幽蹬。山形如釜覆。霹靂弄奇險。明晦判前後。老僧向予言。終年失昏晝。深黑莫敢窺。涓涓滴垂溜。仙鼠不避人。撲撲近衣袖。真靈匪云遙。轉睫或可覲。行行路忽阻。仰見天光透。振衣陟崇嶺。決背俯平岫。山魃獻諛媚。雲物羅綺繡。薄暮難少留。荒寒嘯羣狖。顧我心跡清。何時脫塵垢。僊乎丙子翁。于茲葆貞壽。

西溪水宿

殘月下柁樓。鳴榔破幽寐。露稀天益澄。水遠星初墜。遲明啓篷牕。峭寒襲衣被。時有微風來。菰蘆響清吹。水花不知名。輕盈送香氣。渺矣孤客懷。于焉發遐思。

歸次雲陽

朝發香草湖。曠然豁胸次。秋雨澄鮮新。晨光蕩溶瀟。稍見遠山橫。空波落寒翠。沙禽流好音。岸花適閒意。迢遙建陵口。宛轉香林寺。一往烟水深。爽焉脫塵累。羨彼鷗鳥情。飄飄何所繫。

夜宿雲林曉步冷泉亭上

深夕憇南礪。龕燈照清宿。無風松自響。未聽先滅燭。中有太古音。泠泠漱鳴玉。乍疑吹笙竽。漸似拂琴筑。不知雨是水。半偈飯玉局。靜極轉無寐。侵晨步幽谷。來登泉上亭。新涼滿風竹。石色含古陰。苔坂上衣綠。泉心無熱惱。冷趣自能足。悟彼寂中喧。衆響愈幽獨。因知石上泉。清機時往復。泉石本無聲。會此偶相觸。何須辨無無。初陽散林麓。

晚入海嶽菴中訪友人閒話

圓景頽西江。循途下山麓。歸鳥破暝色。閒雲翳叢綠。言訪素心人。經聲出深竹。禪扉晚不關。一徑入祠屋。相遇無煩言。清吟坐空谷。人寂香愈清。談深茗初熟。攜琴憺忘還。新月挂高木。

促席

促席坐寥寂。素絲琴未張。高齋客久去。滿院松花香。徑僻喧山鳥。人閒遲夕陽。稍看巖壑暝。衣袂早生涼。

曉起大雪

茅檐明夜色。晏起擁爐吟。透屋寒流靜。開門雪正深。微茫辨籬落。蒼翠失雲岑。趁欲沾邨酒。前溪不可尋。

惠山

迢迢十八澗。路轉復幽通。坐倚泉邊石。時來松下風。攜琴修竹裏。躡屐亂雲中。欲就愚公隱。心期或許同。



南樓對月

孤鴻聲可數。黃葉落無多。復此南樓月。離思渺若何。烟開溧陽樹。山接貢湖波。明發歸帆遠。乘風好放歌。

優曇庵看梅

不復似人境。好風來自東。花明鳥影外。香滿磬聲中。徑入春籬短。窗開雪澗空。只愁迷去所。隔水訊樵僮。

晚步甘露港看桃花

春雨過幽塢。芳林明晚霞。閒臨清溪水。隱見碧桃花。欲問仙源路。還來就釣槎。何當入深處。一訪隱淪家。

春日幽居

臥聞春雨歇。清曉啓南軒。掃石苔花潤。開門溪鳥喧。因之尋寂樂。有得遂忘言。自足幽人趣。何須離垢園。

春晚雨餘池上獨酌

雲薄不成雨。夕陽開又晴。園林極幽瑟。池館悉空明。酌酒穠花發。懷人春草生。登樓起遐思。根觸謝公情。

立秋日偶作

西堂不受暑。况復晚風清。一葉落無意。悄然秋思生。蘿陰歇微雨。荷沼作新晴。爲問淮南樹。招人若有情。

晚過方丈訪松亭德上不值

巖棲十笏徑幽通。定板初敲訪畫公。碧礪松吟猿梵冷。香廚花掃鶴糧空。行騰定識投雲外。詩卷何因出

械中閒卻烟窗雙塵柄。片時清話未能同。

廣陵客舍食鱸魚有感

潑刺銀刀出水鮮。客盤樽酒對堪憐。試燈風裏初登網。少別春江又一年。

送萬少滄之吳門兼懷吳門諸子

風絮飄零一愴神。傷心端不爲殘春。昨宵病酒今朝雨。況復懷人更送人。

蘇加玉

字維晉。號餐霞。太倉人。諸生。有蓼蟲吟稿。

蒲褐山房詩話。維晉才情雄傑。骨力開張。少時猶及見沈子大。顧玉停諸先生。備聞緒論。而又以杜幹蘇三家爲宗。同里汪衡玉少司空。視學安徽。江右河南。所至必借以同行。性極好游。凡遇名山故蹟。必登臨吟嘯而去。故集中所作。極爲卓越。歸而餐益甚。年逾六十。猶作童子師。以自給。余嘗過所居。繩樞圭竇。瓶首而入。凡其敗甑破席。吟咏自如。雖餐殮不繼。弗顧也。

三月五日自九江赴饒州。阻風大孤山。次日進艇至青山。風橫浪逆。瀕於危者數矣。幸而獲免。詩

以誌感

九派何湯湯。彭蠡漫浩浩。江湖互吐吞。日夜勢春擣。放舟潯陽郭。帆指饒州道。春氣遠空濛。指點鞵山曉。須臾颺風來。雨暗失江表。篙師兩停橈。緊纜依別島。一夜苦雷琅。明發仍孀孀。藏舟獲苟全。速進禍迺兆。開頭汎中流。箭激快輕矯。共嗚勇退非。利涉取機巧。誰知風更狂。振柁欵傾倒。倚舷顏色灰。咄咄呼三老。

險夷信由命。順逆人所造。得勢請莫矜。入坎悔當早。波瀾何地無。達者洞深窅。獨憐我窮途。投足真艸。艸。漂泊誤依人。忠信愧夙禱。出險神或哀。前途正未了。何當返蓬廬。藜藿得一飽。驚定拭淚痕。默默問蒼昊。十八日發硃砂菴過天門至老人峯歷巢雲洞上小心坡渡斷凡橋抵蓬萊島穿一線天遂登文

殊院

寺後萬峯擁。峯峯插天勁。回睇已蹈空。前瞻翻陷窞。升高固有基。陟麓豈云竟。乍轉披蒙茸。屢折入幽窅。削壁劍倒懸。叢岫筍互迸。沙崩激洄湍。石亂肆橫互。險艱非一途。攀緣絕孤磴。童僕駭傍徨。朋儕策濟勝。中道肯迴車。一鼓不待更。抱崖十指牢。垂岩一足賸。屈膝摹過腹。縮項低觸脛。詎止蠶叢剖。直與鴻濛競。天門手可捫。老人笑相迎。前行路復紆。遞歷景逾靚。鑿洞白雲巢。裂石蒼松孕。瞥過小心坡。罡風吹夢醒。安危慎走趨。吉凶歸定命。絕壑斷凡縱。危橋續懸絙。混沌失全天。蓬萊徒真境。叶縹緲。文殊臺。烟靄破鐘磬。聳身人靜藍。足駐喘未定。却忘登頓疲。共詫奇詭併。不從歷劫苦。誰能造仙聖。

初春偕友人游大梁上方寺遂出郭登吹臺

昨日苦風沙。今朝豁澄霽。夙約聊可踐。晴郊喜並轡。河水渙流澌。堤柳折芳意。稍違闌闌喧。宛造華嚴界。幽思歎禪關。清香溢茗器。翹首企浮圖。積鐵插雲際。神禦河伯逃。力制馮夷避。至今枝撐危。尙駭波濤漬。蒼茫梁宋跡。歷劫獨未墜。上方寺有鐵塔。經河患。古跡皆湮。鐵塔獨存。又聞古吹臺。郊外緬遺吹。枚馬今飄零。尚李昔酣醉。芒

礪雲久荒。滄桑遞興廢。一慟呼梁王。日落黃河外。悄予罷登臨。歸騎衝烟靄。吊古意未休。清秋冀來再。

孟津渡河

夜宿河陽城。朝發孟津渡。旭日澹朦朧。風沙莽回互。舍策臨沔潯。登臚肆遐顧。西自崑崙來。三門束砥柱。東走豁平原。浩漭實始豫。茲地尙滌漩。下流更奔注。禹跡嘆久湮。遷徙代已屢。聖世恤民艱。堤帶發府庫。大吏擁符節。百僚競馳驚。安瀾今有慶。宣房安足慕。中流俯魚龍。兩岸列烟樹。南北歷迤邐。山川氣吞吐。擬撰河清頌。豈獨遠遊賦。

曉發洛陽次函谷關

聞雞舞劉琨。驅馬背洛邑。洪濤蕩曦霞。曠景布原隰。西馳越數里。岡壠驟匝匝。崖欹輪側旋。峯倒石欲壓。白晝星沈沈。黃沙風獵獵。四游篋笥鉗。中鑽劍戟插。睥睨界雲懸。仄徑梯空躡。云是函谷關。終古撐危堞。又云楊僕移。漢武始創立。崤陵華岳通。柏谷桃林接。熊耳搯其肱。地肺貫其脅。時平走星軺。世變屯組甲。堅壁一夫怒。環攻萬騎怯。在德豈在險。自焚悔不戢。虎視羣雄吞。鹿逐劉項入。誰知百二封。莫敵三章法。魏晉迄隋唐。戎馬血紛躒。幾見敗劉聰。仍聞斷李密。叶四海今一家。夜戶且不闔。戎壘桑麻叢。山砦牛羊解。徒此撫重關。慷慨吊前劫。未棄終軍繻。漫効步兵泣。龍鱗拭寶刀。摧鋒韜玉匣。

書魏叔子大鐵椎傳後

鐵椎一擊天欲掀。重五十斤柄摺環。壯士揮之如弄丸。十盪十決人馬奔。出沒隱見疑鬼神。風馳電掣星斗昏。決戰夜半賊若雲。摧枯拉朽安足論。鬪饅僵立敗馬蹲。壁上觀者驚心魂。欻忽大叫馳騰輪。但見百里揚埃塵。豪健枉數宋將軍。壯士如此真不羣。嗚呼壯士真不羣。胡不盪滅秦寇掃楚氛。

十九日登文殊臺看前海諸峯放歌

夜宿文殊院。曉上文殊臺。文殊何年此跌坐。須彌芥子納九垓。普門行者感靈夢。誅茅願力何雄哉。左獅右象互蹲踞。玉屏背枕相差排。前面陽崖數十丈。佛座突兀依中台。攝衣拾級眼界闊。但見千峯萬峯掀舞空中來。硃砂日映絢紺碧。桃花爛漫天邊開。八卦森羅列。老人似嬰孩。層巒峭壁不足數。一一礪底抽根荄。指點昨日所來路。蛇穴鳥道交縈回。仰睇天都最奇崛。青蒼一氣連斗魁。渾元運化萬萬古。天地未闢此峯精氣先胚胎。六鰲不能戴。劫火不敢災。五岳爭雄失卻一大物。逃入黃海。羣峯崩角誰能儕。獨有蓮花不肯下。一莖萬朶凌虛栽。蓮蒂蓮柎苗秀色。千年不謝長滋培。猶恐勢孤力未敵。旁擁蓮蕊高崔嵬。歷歷出沒雲濤堆。罡風吹掃轉瞬盡。又覩軒轅羽駕乘雲迴。高臺壯觀有如此。憑凌大叫舒胸懷。半生落魄世齟齬。撫髀日夜嗟摧頽。功名富貴有定命。深山窮谷無容媒。浮邱容成日攜手。庶幾陶寫中心哀。君不見文殊院中老僧如死灰。獨占絕頂居蓬萊。文殊院止有一僧。貌似三四十歲人。而問其年。但云五十年不下此臺矣。不誦經。止朝夕誦算法九九數百遍。以爲功課。冬夏不易衣。每日一食。慈光寺僧給之。行時不繼。或五六日不食。見客但稱爾汝無世法。與之財物不辭不謝。慈光寺僧來取去。

九龍潭瀑布歌

一龍奮爪攫烟霧。一龍弄珠互吞吐。復有一龍掉尾游。尾拖十丈藏其頭。其餘六龍各驚繞。鱗鬣開張勢天矯。咄哉九龍非真龍。迺是瀑布懸晴空。奔流穿雲抉石走。石破凸凹屈作九。鬱怒欲洩氣更豪。轟雷聒耳陰風號。萬峯雨注澗水匯。鴻洞一霎翻雲海。只今久渴無飛泉。泥蟠寒谷龍穩眠。欲布甘霖滿寰宇。會待風雲上九天。

苦熱行

鄭州作

吾聞豫州天下中。陰陽和會徵時雍。胡爲自春徂夏苦赤旱。但有烈日無清風。六月溽暑愁蘊隆。炎帝赫怒驅祝融。圓蒼爲爐地爲炭。實以萬物鎔作銅。渴龍鼓鬣騰煙空。火珠迸射六合紅。烏鳶張口牛馬喘。草木焦卷千山童。可憐客子如投籠。官衙湫隘難爲容。唇乾口燥汗被體。晝立夜坐心沖沖。況復卷帙紛填充。黃茅白草何處茸。手操栗尾能搖扇。神昏意倦迷雙瞳。渺然天半二室峯。峯前漢柏涼陰濃。玉女窗中貯冰雪。逍遙谷底鳴琤琮。近在百里行可從。曷不追暑扶吟筇。不爾黃河萬里驚濤洶。盪滌煩酷開心胸。濯纓濯足兩清絕。直欲穩臥蛟龍宮。吾家吳江東復東。五湖三泖環瀛通。鸞鷗宅藏楊柳渚。芙蓉屋繞菰蒲叢。中有赤腳漁簑翁。檝頭艇子遮短篷。往來烟波唱款乃。三伏那怕炎威攻。別來此景久未逢。風塵襍

陶靖節舊里

淵明非隱士，解帶竟歸田。乞食得無拙，躬耕聊自全。壺傾仍獨酌，琴在不張弦。故里今猶識，桃源何處邊。

文信國祠

舟覆崖山後，中原恢復難。自甘流碧血，果肯戴黃冠。諸葛心存漢，留侯志報韓。空山儼祠宇，松柏颯陰寒。

春盡日雨中過藍橋夜泊石港

暮雨渡藍橋，征途去轉遙。雲兼愁思積，春與客懷消。白鶴歸來晚，青絲日夜凋。停帆石港宿，仙夢憶吹簫。

蔚村先生移居

五岳神遊路未通，依然蹤跡落寰中。襟懷欲拓千間廈，嘯傲仍無一畝宮。差擬江湖隨泛宅，縱非羈旅亦飄蓬。何年果得頑潭住，倚棹春風放釣筒。

先生慕陳確荅頑潭舊隱故別號蔚村

桐廬

桐廬風景人清妍，一葉凌虛坐渺然。山色倒涵明鏡裏，江流遠瀉白雲邊。松杉滴翠宵藏雨，鳧鴨衝波曉破烟。欲訪仙靈棲隱處，結茆常得伴林泉。

晚泊黃泥坂次陸所亭韻

風祖蘭橈繫晚汀，空江細雨共冥冥。林間鳥去村烟白，浦外漁歸岸火青。客緒如絲吹易亂，春陰似夢喚

難醒。誰將古調翻流水。驚起魚龍夜半聽。

秋夜尋岑山星巖寺

雨歇殘陽滅遠岑。暗中搖櫓度雙林。水分島嶼灘聲緩。寺隱藤蘿石逕深。法界鐙明塵夢覺。空山秋半夜寒侵。到來西體禪牀穩。臥聽清宵響梵音。

宋州

南北江山一郡分。歸德蔽江淮而通關陝爲南北要衝襟喉保障鎮雄軍。朱梁爲宣武軍。後唐改曰歸德軍。孟豬遠撼黃河浪。芒碭深屯帝雲。張許至今爲厲鬼。郡有雙廟。羅袁異代起妖氛。羅汝才袁時中與李自成爲明末流寇。黍離磨滅滄桑跡。畫角城樓夜不聞。

南陽

南陽氣象尙氤氳。發迹英雄漢代間。高密建功能再造。武鄉遺憾竟三分。洧川壁壘迷荒戍。新野旌旗卷暮雲。成敗興亡誰可料。霸王佐各超羣。

琵琶亭

琵琶亭外水連天。落日帆檣佑客船。不待秋風波浪急。潺湲夜夜入哀絃。獨客停橈喚奈何。晴空渺渺湧春波。天涯淪落相逢少。未覺當年墮淚多。

殷如梅



字果園。元和人。諸生。有綠滿山房存稿。

蒲褐山房詩話。果園安貧樂道。苦節自貞。乾隆庚子春。予扈蹕至吳間。偕沙斗初步屨往訪之。曲港一灣。衝門兩版。在橫橋疎柳間。簞瓢屢空。嘯歌不輟。蓋錢穀居節。一流人也。句如梵唱。微微知寺遠。松陰黯黯。山深好句。有時堪入畫。閉情無日不提壺。蛙聲四起。夜深逾靜。月影半沉。星倍明。身賤底須深處隱。才疎敢放醉時歌。東風綠到門前柳。小雨香生砌下蘭。深深甕受黃梅雨。小小爐煎紫筍茶。雨中花鳥都無賴。病後詩文儘放低。茶烟不共晨炊斷。梅雨能令午夢涼。將添菊枕。因花老。欲卸松棚。爲葉乾。半畝瓜壺。秋色早。一庭梧竹。雨聲多。亭名放雀。橫烟靄洞。憶呼狷挂。薜蘿林。臥真堪忘。歲月樓居。應不媿神仙。置之石湖居士集。堯峰詩鈔中。孰能軒輊。

晚步寄張丈岡

悠悠溯秋水。獨步空塘晚。蟬聲不厭多。山色偏宜遠。借問素心人。何時共消遣。

宿清淨菴

淒然不成寐。獨夜多虛警。雨檜雜風篁。聲喧轉幽靜。隔牕梵唄歇。知是僧初定。

晨別石佛寺

空山多清響。夢覺悵幽獨。起看朝日升。露光泫衆綠。羣芳襲人衣。孤雲娛我目。樵唱聽還失。隱隱在深谷。靜對澄潭坐。閒持道書讀。此境惜暫遊。何時得再宿。飯訖辭林僧。回首隔川陸。

蔡將軍歌名人龍

峩峩均房山。迢迢大藤峽。猿獠據其中。走險猿獠捷。將軍父子真英雄。曾討南粵征西戎。忽然奉命來勦

賊直前執敢攫其鋒。林箐何深路何惡。此時勇氣十倍作。蛇矛夭矯人羣蠻。白袍血濺紅斑斑。援師不至將星殞。戰馬悲鳴人力盡。刀盡下拜謝至尊。曰臣某某死國恩。烟塵黯澹風慘冽。銜鬚拔劍當轅門。紛紛漆齒爭馳突。馬革猶存尸竟失。長君痛憤激諸軍。殺氣呼聲遏陣雲。背負如生元帥首。盤空一鶴殲鴉羣。淨掃妖氛看倏忽。直是陰魂護殘卒。吁嗟死綏自古多。轉敗爲功得幾何。至今嗚咽潯江水。遙和陳安隴上歌。

題山家壁

茅舍此山邊。寥寥八九椽。炊烟籠竹樹。人語帶風泉。耕鑿非逃世。棲遲不記年。卜居如有意。幾許買鄰錢。

韓蘄王碑

峻嶒片石硯山旁。忠武勛名日月光。尙憶使船如使馬。獨憐擒賊未擒王。幾年驢背英雄老。千古龜趺歲月長。共道中興功第一。行人瞻仰奠椒漿。

宿中白雲

布衾紙帳夜初寒。禪室幽閑夢亦安。不聽松風牀下響。那知身在白雲端。

朱士廉

字孟容。號醉竹。休寧人。昂之子。監生。著有捶琴閣詩集。

晚過寒山復返支硎

疎林霏夕鷺。古寺滴寒泉。笏立疑無路。峯迴別有天。野茶花點雪。密竹翠含煙。欲借招提宿。飄然意若仙。

朱履長

字仲恆。休寧人。士廉弟。監生。

送吉人從祖歸桐鄉

日落旗亭晚。扁舟獨問津。小樓今夜雨。撰杖與誰親。遙憶鴛湖路。微波長綠蘋。甌山歸臥後。悵望寄修鱗。

過中峯狂水明樓

閑尋松下逕。更上水明樓。空翠諸峯滴。寒泉衆壑流。風生叢竹響。雨霽白雲收。擬託東林社。常從慧遠游。

韓是升

字東生。吳縣人。諸生。有聽鐘樓詩稿。

插秧

夏至風雨時。秧針秀如翦。村農力作勤。插蒔足皆跣。溝塍畫短長。泥淖淵深淺。行分翠剡齊。莖比青莎軟。開軒面平疇。倚杖看遙巘。愧彼田中人。筋力各黽勉。但期禾黍熟。簞笠傲軒冕。

張貞女詩

女未廟見死歸葬。女氏黨明文載禮經。未嫁豈容往。夫死而守貞。例不旌門榜。張女秉志堅。許字姓恥兩。聞喪絕水漿。飲泣意悽惘。阿父諒女心。改節勢難彊。衰經歸陳門。篝燈事績紡。蹟同古逸民。遭變伏榛莽。肯緣章縫賤。再作出山想。操勵清霜嚴。懷澄皓月朗。君綱與夫綱。道在不可枉。當其矢志初。焉計破格獎。一心貫始終。大義炳天壤。

張公洞

出門不逢人。撥草始得徑。洞從地底入。其口小如磬。黝黑無陽光。秉炬僅能曠。摳衣行彳亍。積雨苦泥濘。蹉跌筇難支。登降足交病。童奴捷如猿。扶掖倚爲命。中間忽豁朗。驚魂坐稍定。鹽堆與米堆。仙牀及仙甌。領略豈能遍。奇自太古孕。垂垂石鐘乳。融結類晶瑩。石燕時飛翔。翩躚羽毛淨。欲尋庚桑公。遺跡渺難證。記傳多支離。傳會詎足證。盤旋見天日。奮迅出深窅。回顧百丈塔。凜凜汗流鬢。細認磨崖書。福地到生處。  
洞口古篆張公洞天福地六字。

齊河旅次逢姜度香少司寇使旋

使節遙從雉水還。相逢一笑客途間。故交屈指如君少。過客何人似我閒。此去全家依粵海。幾時重晤上燕山。回瞻北極星辰朗。梁月時疑照舊顏。

徐麟趾

字春書秀水人監生有荔村詩鈔

蒲褐山房詩話春書本籍鸞湖移居卅上於盧雅雨運使稱詩弟子是以江浙名流類多傾蓋金冬心農題其像云一卷詩比瓊瑤鸞牋手人不知酒有鎗幌有書識是誰南路徐王穀原又曾贈以詩云十年小別東瓜堰一夕相逢見英橋大抵詞人慣羈旅未緣明月戀吹簫幾卷新詩黯淡吟天涯畢竟有知音中年偏與飢寒會典去衣裘又典琴聞道白沙江口住近攜家具夢揚州腰纏一笑原烏有鶴背高寒獨耐秋葉落淮南旅夢殘可知門戶故家難不如歸汎南湖月占得鷗沙把釣竿

歸眞州草堂作

望裏柴門近。西風一櫂歸。夕陽在樵徑。落葉下漁磯。山水清無恙。鷗鳧靜不飛。家人權置酒。爲說蟹初肥。

蘭泉歸青浦別後卻寄

東風吹雨夜揚舲。篷背瀟瀟可耐聽。海市蜃烟孤嶼白。江村漁火一燈青。長帆駕浪愁歸緩。短榻懷人怕夢醒。想見彩衣歡拜母。團圓春酒話家庭。

寄都門友人

屏跡幽耽水竹居。枕邊無夢到華胥。十年久絕彈冠想。萬里頻傳卻聘書。月夕論文多弟子。花時載酒半樵漁。凌煙事業推公輩。戀我青蓑老荷鋤。

紅橋春望

誰遣韶光滿目前。東風吹草綠生煙。大堤楊柳環城郭。小市鶯花接墓田。載酒豈無王司<sub>入</sub>李。傷春只有

杜樊川勾留最是紅橋月。一夢揚州十二年。

懷人詩

韓水人來訊起居。幅巾藜杖健如初。閉門不覺窮愁老。白髮青燈夜著書。程午橋

相逢禪榻話蹉跎。水繪園邊側帽過。一自江湖空浪跡。梅門風雨別來多。姜皋原

去年曾到官梅閣。四壁吟看沈約詩。病後知君圍帶減。一番風雪鬢成絲。沈沃田

蕭涼孤館對枯僧。君獨能來興頗勝。吟落峨眉橋畔月。水南歸去夜分鐙。牛晴川

春風嘗過羅含宅。看寫梅花當早餐。別夢不知江水闊。一庭明月話秋寒。羅嶺峰

金夢麟

字仁趾。全椒人。諸生。有洗墨軒詩。

過上谷郡

居庸關外路嵯峨。古戍迢迢倦客過。落日孤城懸上谷。秋風匹馬渡渾河。寒沙匝地村墟少。野火連天戰壘多。伏櫪空懷千里志。壯年歲月苦蹉跎。

登懷安城贈孔明府曜南

女祁城倚最高峯。草白沙黃朔漠空。萬里邊牆寒日外。諸羌部落暮雲中。地分燕趙山河壯。天限華夷保

障雄。父老不須權借寇。北門鎖鑰付萊公。

同江賓谷吳猷芻王古村葑根上人鐘越姪游平山堂

蜀岡憑眺楚天開。人盡登高作賦才。萬壑松濤排地起。千重山色過江來。古今勝蹟留詩卷。湖海相逢共酒杯。指點招提猶未遠。更從文許講壇迴。

### 陸象拱

字杏村。長洲人。監生。有對柏山房集。

蒲城縣烈女馬蘭香墓

曾參養曾皙。顏路泣顏淵。二語係烈女口占。事有不一致。沈吟起長歎。親恩豈不重。節孝難兩全。著我新羅襪。采

絲事事纏。微軀委白練。大義何皎然。涼飈掃蠅蚋。溽暑時未闌。觀者咸太息。異事今流傳。人生等死耳。此死重泰山。忠孝無轉念。稍遠則已遷。慷慨固非易。從容良獨難。讀書勵名教。百行多所愆。讓彼蕙蘭芳。清芬垂簡編。

商於新開路

嶺泉垂百道。山路更參差。翠竹仙娥驛。紅檣綺里祠。猿聲驚旅客。虎徑問樵師。莫歎張儀詐。川原幾變移。

### 鍾吾驛

已過鍾吾驛。迦河一水環。烟深伍相里。城枕馬陵山。鷗鷺隨波靜。漁樵帶月還。白雲鄉未遠。約略隔重關。

邗溝感興

纒陌曾驅白鼻駒。春風離恨在天涯。矮牆一樹花如笑。記取紅橋第幾家。



湖海詩傳卷三十五

楊芳燦

字蓉裳。金匱人。貢生。今官戶部員外郎。有吟翠軒初稿。

蒲褐山房詩話。蓉裳驚才絕艷。玉聯珠駢體之工。幾于上掩溫邢。下儻盧駱。而詩則取法於工部。玉溪間。填詞亦清妍婉麗。兼有夢聽竹山之妙。乃僅以拔萃科選。為伏羌縣令。既而逆回構亂。烽火連天。蓉裳殿守孤城。授子傳餐。獨當豕突。予時在揚。督兵堵禦。草檄飛書。往來問詢。見其意氣自如。嘯歌不輟。知其必能辦賊事。平後久之。乃量授靈州。又偃蹇十餘年。始為農部。雖兼會典館纂修。而終不獲與於承明著作之林。殊為缺事。然聞京師盤數之盟。必以君為赤幟。蓋光燄固不能掩也。

雨夜喜洪大華峰趙大映川過訪

暮雨黯平林。江雲莽無際。隔牆榆柳葉。策策鳴軒砌。目極南雁飛。心傷北風厲。董生園不窺。仲蔚門常閉。忽聞剝啄聲。喜見故人至。得慰飢渴懷。且略寒溫例。深衷互傾倒。軟語及瑣細。憶昔我與君。相望有年歲。兩函魚雁字。千里金蘭契。牢落賦停雲。飄零嘆秋蒂。今夕是何夕。良朋許聯袂。呼童掃蓬華。促饌供粗糲。堆盤煮蔬筍。沃釜烹鱸鱖。君為盡十觴。我愧無兼味。落落忘形骸。怡怡敘昆弟。酒闌促坐語。商略盡文藝。詞壇日蛙黽。雅道方凌替。努力愛盛年。等身富清製。南溟鵬欲化。碧海鯨當掣。決雲千仞翔。臨風九臯唳。曹劉競豪健。李杜誇雄麗。古人今不作。絕業君其繼。入世葆聲華。立言務根柢。苦辭慎勿忘。前修永為勵。

飢烏啼獨樹。秋旻忽澄霽。岩高初月沉。參橫衆星嘒。嗚嗚哀角喧。黯黯青燈翳。匆匆撤殘檣。悽悽送歸柩。相逢纔破顏。話別重揮涕。去矣莫復陳。川原正迢遞。

寄懷錢三曙川

時曙川由燕之陔。

鍵戶絕扉迎。索居少歡意。念我同心人。飄零各天地。憶昔我與君。旅舍欣把臂。從此數招尋。素心訂神契。我齒少於君。君畜我爲弟。文史相嬉娛。金石互磋礪。秋風暨陽城。清樽夜同醉。爲歡無幾時。旋判江干袂。獻歲春之孟。君作北行計。買馬料衣裝。去應春卿試。團雪苦易散。飄蓬木無蒂。會合不可常。蹤跡倏離異。時時向西笑。望君掇高第。君本磊落才。千緡富文藝。名不忝翹材。官應典中秘。奈何金門賦。屢上遭棄置。九萬始培風。六月忽垂翅。淒涼抱璞心。惻愴迴車淚。長安米價貴。居又大不易。席從幾時煥。駕向何方稅。問訊北歸人。語苦未詳細。昨宵聞剝啄。蓬門來驛使。燕臺三千里。弱弟作齊贅。謂荔寄我一札書。道君出幽薊。單車度函谷。意氣頗凌厲。關中昔天府。平臯莽迢遞。巨靈拓高掌。破空出奇勢。秦皇縱博處。箭栝長丈二。鈎梯不可攀。仰望心已悸。八川鼓洪濤。噴欲入清渭。秦嶺瞰九嶷。一氣鬱蒼翠。歷歷漢唐陵。豐碑矗如蝟。月黑松楸深。森寒走妖魅。君行恣憑眺。到處頓征轡。奇境入吟懷。奔溢不可制。揮毫書峭壁。乞火題破寺。脫手皆珠璣。錯落盈篋笥。浮名何足論。此寔千古事。嗟我獨何爲。草間日憔悴。豈不願騰躍。束縛有家累。懷君百感集。纚纚坐揮涕。擲筆復高吟。天風激淒戾。

可給廩

華林園蛙兩部。前者吹。後者鼓。君曰給廩給廩可。蛙言官家不如我。糲一盂。桃數顆。誰給糲。憐君餓。君不聞牝雞夜叫。天模糊。齊趙厲吻相吞屠。爲公爲私君知乎。

爲果溪先生題友松圖

君不見元禮謾謾如松風。長輿落落如長松。誰其匹者今劉公。骨幹眉宇將毋同。公乎掀髯喜清嘯。愛松之人與松肖。亟呼妙手寫吾照。十丈虬枝。條天矯。調調刁刁。江風涼。霜鱗黛甲爭開張。我公據石繙縹緗。唱于唱喁。狂非狂。脫帽露頂神洋洋。嘯嘯翁。支離叟。一生孤直耐嘲詬。朝華夕秀豈足偶。彼蒼髯者吾老友。甘載摩挲最耐久。一任羣兒笑衰醜。松乎善保歲寒姿。盟以金石永不移。竭來與子相娛嬉。伏苓琥珀背松脂。屑而食之甘如飴。良友所贈公莫辭。公莫辭。令公喜。骨青髓綠世莫比。駐公光景三千年。乘雲去友赤松子。

貼梅扇子歌

扇爲冒姬董  
小宛所製

九華宮扇裁紈綺。錯翠鉤紅世無比。寧須漢殿織麟毫。不向謝家誇麈尾。活色生香點綴工。折枝梅萼影重重。孤山萬樹花如雪。飛入卿家便面中。奪得仙人掃花帚。收拾冰姿出塵垢。畫圖嬌面試春風。未許徐熙矜妙手。纖指拈來上碧綃。忍令香粉逐春潮。招涼曲院藏羅袖。待月西樓傍翠翹。吳儂小招紅牙脆。掩

映歌唇逞妍媚。吹到嗚嗚鈿笛聲。恐教顆顆冰花墜。烟魂月魄太分明。入手翻翻蟬翼輕。借問當年誰鬪巧。依稀記得董雙成。雙成家在揚州住。門前便是紅橋路。射雉參軍正妙年。飛梁架就銀河渡。錦幙文牕貯粉兒。明霞爲骨玉爲姿。劇憐妾命如花薄。偏遇霜欺雪壓時。當筵曲唱家山破。高家兵馬闌江過。細雨關山正斷魂。澹妝恐被塵埃浣。歸來魚鑠鑠重門。寒食東風度好春。妝閣新翻方麴樣。一枝爲贈遠遊人。素英狼籍梨雲凍。一去珠宮騎彩鳳。塵世難逢萼綠華。師雄空入羅浮夢。篋頭點點淚花圓。剩墨零紈總可憐。君不見謝娘團扇曲。一般辛苦互流連。

王氏漢官銅印歌

吾鄉王殿撰。爲秦中學使時。部民發冢。因得古銅印數百以歸。今散失殆半矣。余于其孫光顯齋頭見之。爲作此歌。

北邙山勢何嶄岩。聚斂魂魄歸蒿藪。墳封馬鬣土脉旺。碑劖蚪篆刀鋒銛。兕皮作槲堅且韌。蜃灰墜壁幽而潛。深林祇有陰青語。黯隧不見陽輝暹。健兒嘯聚試身手。黑夜竊發揮鉏鎌。石屏雙閉脫扁鑰。鐵鞞碎落無帷帘。碧玲唾壺頰玉怨。雲母臥榻青銅奩。墓前椎碎捧燭蠶。懷中盜出滴水蟾。最多纍纍古印檢。取去一一拋榛簾。可憐棄置賤如土。誰能購取酬以縑。王公遠宦越險阻。王公諱雲錦古物入手窮該兼。奇蹤詭跡搜欲徧。爛銅殘鐵求無厭。俸錢探囊已罄竭。古癖刻骨難鍼砭。裝充翡翠不足羨。車盈葦苳寧傷廉。攜

歸幽齋自摩玩。未許俗客來窺覘。匣將玲瓏暨徽尾。配以鼉鼉和竄鸞。土花斑剝鸚鵡鏽。血暈拉雜珊瑚鈿。龜螭壓鈕妙刻畫。蚪蛟蟠字驚觀瞻。嗟余好古生苦晚。韓句對此懷舊情難忱。雙眸注視屢胸轉。寸喙噤斷空辭譎。官銜缺鑿辨蝠扁。篆籀佶屈如疇嶮。中樞權勢山岳重。部曲號令風霜嚴。虎符制閫牘頻押。龍章降省名同僉。奇物閱世久仍在。餘威炙手今已燂。吁嗟乎山陵半入劫。灰黑玉石莫逃野。火炎世餘此物未磨泐。天豈有意存微纖。荒原颯瑟伴狐兔。幽巖黯黠叢蛇蚺。精光夜上觸牛斗。靈神默護趨屏黔。爲幸精英盡洩露。旋恐零落無留淹。著書重訂琳琅譜。蘊奇密銷瓊瑤械。未央宮瓦礫作硯。上林苑竹磨爲籤。蕭齋得此足三絕。縱有奇物無容添。

錢忠懿王金塗塔瓦歌

貝闕琳宮啟華闕。云是錢王布金地。椒牆剝落帖花檉。龍帳森寒鏤幽魅。訪古人來叩法局。摩挲神物易漂零。天衣中坼青狻座。劫火延燒白氎經。賸有嵯峨相輪在。土蝕塵埋經幾載。什襲欣看趙壁完。護持不共梁甌碎。刻畫丹青入細靡。幡幢瓔珞現修羅。徧傳大衆優婆塞。共禮前朝宰堵波。相傳此是宮中物。錢王舊事人爭說。虎落雄圖十四州。龍天慧業三千佛。良工當日試雕鏤。朱火烏金躍冶流。七級浮圖初鑄就。人天珍重勝琳球。一朝納土京師去。蒿草蕭條故宮暮。內府圖書秘色窰。流落人間不知數。瓜子南金賂趙公。十瓶海物尺書封。囊蹶輸去黃華盡。那有餘貲給梵宮。塵寰無路求回向。不如去逐降王長。談禪

早已放屠刀。鏖戰底須排甲仗。麟帶貂袍拜太師。一家湯沐奉恩私。始知北面朝元日。卽是西方證果時。閒來日寫金經誦。此塔依然作清供。翻笑癡兒臥榻旁。等閒不醒維摩夢。斷鐵零金總可憐。劫灰寒燠不重燃。幾行蝌蚪書名字。并識柴家乙卯年。好奇今有平原子。購得奇珍歸趙氏。余友毘陵趙映川購得之瑣瑣飢蠹蝕碎黃。斑斑古血凝殘紫。洛下銅駝荆棘荒。仙人流淚別咸陽。古今一例難回首。幻影空花悟法王。

與劉三羹堂夜話有感

一春兀兀抱愁坐。面垢冠敝任慵惰。良朋三五隔天涯。對影呻吟苦無那。辟除妄念學枯禪。諷誦金經當清課。書牀不整卷縱橫。硯田久荒塵堀堞。忽聞君自蘭陵來。倒屣相迎積愁破。互看顏色憐枯槁。共話生涯悲轆轤。五言妙手出偏師。三耳雄談驚滿座。恍壯幽州馬客吟。淒涼楚澤騷人些。嗟余少小丁憂患。回首風波苦掀簸。胸襟自昔誇豪宕。骨骸而今變柔懦。子卿痛淚洒牛衣。許靖餘生憑馬磨。險巷搥車悲寂寂。大澤迷途陷左右。饑鷹縫目上新鞵。驚驥垂頭戀殘莖。囊中只剩一錢在。桑下那禁三日餓。舉世言愁亦欲愁。窮年得過權須過。羨君倣儻才無敵。壓軫連箱富奇貨。明珠有價莫輕投。利器新磨寧忍挫。當前人物愛輕狂。長此窮愁哀我瘴。軟語嘈嘈堪達夜。倦僕頻頻又催臥。殘燈照壁鼠窺覷。寒柝敲更卒巡邏。微霜入戶夜氣清。明星墮水寒芒大。布衾如鐵枕手眠。愁夢闌珊不堪作。

賽神會

鏗金鉦。曳大旆。三月春郊賽神會。東家西家喧小兒。攔街叫跳如狂癡。須臾馬蹄來特特。黃金絡頭珊瑚勒。馬上人持紅錦敕。神從中央來。奪隘聲喧狻。神從門前過。市人不敢坐。緋袍宰地穩。稱身蟠絲孔雀銀。麒麟當輿。旌蓋交繽紛。路傍富兒指而笑。昔年曾捨三千緡。相追逐。歡不足。罄金錢。娛土木。君不見寒女衣單不掩身。老農夜守空倉哭。

蓋神廟

匠人來。築臺觀。運甃磨磚二年半。匠人朝不來。太保行相催。廟中夜掣銀鑰鎖。廟令大呼神怒我。觚稜金爵高刺天。一臺築就十萬錢。槌肥牲。喧紙爆。天平明。蓋神廟。明神坐中央。廟令羣趨跽。布商米估爭解囊。解囊來。記誰某。貧人錢落富人手。布五尺。米一斗。入市嗷嗷求速售。一貫蚨錢九十九。富人萬金賤如粟。貧人一錢惜如玉。抽得貧兒手內錢。施向神祠種神福。九級階。十丈廊。裁金嵌碧光煒煌。土馬泥人立階阼。夜聲啾啾衆鬼喜。廣廈萬間有如此。何不移來庇寒士。

珠江曲送徐大景春之廣東

芙蓉湖頭春水流。芙蓉峰畔春雲愁。沙棠雙槳木蘭桡。送君遠向珠江游。珠江曲曲環南國。丁星金翠繁華窟。蠻鄉怪物載龍編。海國方言通象譯。蜃雨魚雲積水東。山川形勢霸圖雄。誰尋葛令丹砂井。莫問劉鋹碧玉官。珊瑚扇子猩紅屐。珠江佳麗人爭說。抹厲花開豔雪香。檳榔子熟晴雲熱。珠江淺瀨漱金沙。素

足珠娘慣浣紗。日煥章魚齊上水。樹深么鳳共銜花。富商巨賈相誇衒。奇珍入手如泥賤。螻甲堆成亞字欄。鮫絲織就冰紋練。君去珠江南復南。珠官風俗舊曾諳。秋深桂嶺爭鑽蠹。春到花田學種蚶。誰誇羅襪凌波步。葉葉花船粵溪渡。怕被嬋娟一笑留。莫耽香粉三年住。無端送別黯銷魂。把袂臨歧未忍分。我所思兮望明月。君之出矣逐浮雲。渭城三疊股勤唱。碎曲零歌惹惘悵。碟碗斟來且莫辭。布帆吹去應無恙。十八灘頭走急瀧。計程五月下珠江。倘逢庾嶺歸來使。寄我羅浮兩一雙。

喜汪大容甫中過訪長句贈之

汪生傲儻出世姿。短衣孤劍將安之。江湖流浪苦復苦。人說才奇窮更奇。相逢每恨來何晚。掃室殷勤開酒棧。糝將何點白葵羹。捧出休源赤倉飯。狂來不顧世眼驚。相對拉雜談生平。文人失職有同病。出吻各作寒號聲。君言稗齒飢寒迫。棄擲詩書最堪惜。弱冠方傳作賦才。壯年始奪談經席。五經復興魯叔陵。纍纍著作充箱籟。心開窻窻深莫測。面若刻畫森有稜。奔走風塵飢欲死。撐腸萬卷徒爲耳。肉食難分博士羊。草衣且牧公孫豕。羌余少小趨雕華。斧粲繡帨相矜誇。愛儲奇字未滿腹。慣拈強韻空聱牙。千秋絕業不同傳。君入儒林我文苑。須識夔蛇總可憐。何當蛩蛩聯爲伴。坐談不覺日影移。榜人催上河之麋。卽今一見復奚益。翻令千里勞相思。留君不住我心苦。握手臨歧涕如雨。他時相望越王臺。何日同澆趙州土。布帆無恙臨風颺。秋來應看錢塘潮。潮頭倘有雙赤鯉。盼君寄我英瓊瑤。時容甫將之湖東卽以贈行。



晚春花事盛開因寄懷亦齋三兄荔裳二弟

去年看花人在家。一春風雨空嗟呀。今年花開春色好。看花人又涉長道。從來勝事總多磨。每向東君喚奈何。九十韶華逐塵土。兩三伴侶隔關河。昨日曾過妙香閣。亦齋兄讀書處永晝沉沉下簾幕。蜂聲滿院夕陽斜。一架藤花背人落。歸來孤坐傍闌干。抱影空堂慘不歡。數盡銅籤人未睡。薔薇花底露華寒。醉紅軒駐東皇駕。劉侯酌我來花下。仙娥高捧赤瑛盤。狂客爭持青玉罍。是處看花勝昔年。紫雲樓閣碧霞天。銷除詩債何辭醉。領取春光不費錢。對景真應放懷抱。底事閒愁倍潦倒。白日惟看北嶺雲。清宵不夢西堂草。春來花事逐番新。每對新花憶古人。皂莢橋頭稀酒伴。青揚齋裏剩吟身。錦江水煖寅哥渡。紫陌塵高卯君去。鄉信千行托便風。歧途一別悲零雨。東頭老屋更西頭。猶記年年選勝遊。袖底新詩飛白鳳。筵前妙令鬪潛虬。別離未慣多傷憊。翻悔當時易分手。一語憑將驛使傳。故鄉風物君思否。春事闌珊花信遲。別來何日不相思。櫻桃着子如紅豆。轉眼江南四月時。

爲段大蓉臯題修竹吾廬小照

生綃尺幅濃陰重。萬个篔簹森欲動。膩香罨地黑離離。瘦影緣雲青竦竦。誰坐玲瓏綠玉叢。出塵姿與此君同。過江人物今猶昔。標令居然正始風。跛脚科頭踞盤石。冷翠空濛沁肌骨。嗣宗散髮待涼風。摩詰停琴佇明月。竹葉何須泛碧螺。竹枝不用譜新歌。三椽草閣遺塵事。象外烟霞領取多。露初星晚常相傍。靜

色孤根鎖無恙。野鴨從教截作弓。化龍可許攜爲杖。愧我宮無一畝寬。更無隙地着琅玕。牽蘿補屋空惆悵。翠袖蕭蕭獨自寒。感君過訪荒齋靜。晚歲心期一朝訂。此日從君乞釣竿。他時爲我開花徑。嫩筍新篁好護持。莫教遊客浪題詩。留將百尺青光在。小字行行寫楚辭。

寒夜有懷黃大仲則景仁

荒林葉脫行人稀。嚴霜碎落寒霏霏。初生月魄不照地。列宿錯落鋪珠璣。鴛鴦東來厲哀響。十五五排風飛。幽人畏寒不敢出。未到日暮扃柴扉。藜牀危坐擁殘帙。一燈晻晻明書帷。懷君竟夕不成寐。反手據案長歎歔。男兒作健好身手。有淚寧向歧途揮。天涯倘得快心地。絕勝窮巷號寒飢。但愁干謁不稱意。坐受俗物相嘲譏。千金辟士置幕府。此風古有今則微。高秋與君一握手。幽齋軟語情依依。留君信宿不肯住。勁帆健櫓如發機。迅焱忽捲歲華去。層冰滿野高崔嵬。茅簷擁絮尙不樂。况復遠道驅驂駢。何時壚下貰美酒。對飲立解愁城圍。相思展轉天欲曙。晨風肅肅歌妃豨。

秋晚

竟日雨霏霏。尋秋客到稀。幽花寒不落。獨鳥夜還飛。石罅泉聲細。峯頭樹影微。誰憐張仲蔚。寂寞掩園扉。

偶成

廳館梧桐樹。先期報早秋。一庭涼雨過。滿地碧雲流。犬吠人爭渡。鴉啼月上樓。誰憐今夜客。又作去年愁。

寓感

倚竹蕭蕭彩袖寒。爲誰憔悴帶圍寬。思如園客纜千丈。淚以鮫人滴滿盤。慵奏新聲調火鳳。頻封密字託青鸞。中庭檢點閒花草。莫種相思種合歡。

庭院深深道韞家。白銅鋪映綠牕紗。朝妝嬾試金條脫。夜被空熏玉辟邪。閒展畫叉臨北苑。每尋仙籙憶東華。懺除慧業渾無計。願上瑤臺掃落花。

謁昭烈惠陵

玉壘山川拱帝都。樓桑片土啓雄圖。普天齊奉黃初歷。大統終歸赤伏符。八陣風雲長護蜀。千秋魂魄悔征吳。相臣逝後降車出。難問流離六尺孤。

雨沙

疑是蓬萊清淺時。海塵都向石山吹。半牀鼠躅長留印。一桁鶉衣恐化縑。豈是唱籌煩道濟。未煩障扇避元規。朝來農叟談黃雪。預卜今年麥兩歧。俗云黃雪宜麥。

寒食口九龍山晚歸

買得蜻蛉一葉輕。叩舷歸路不勝情。那堪佳節逡巡去。又背名山宛轉行。新水遠浮菱荇綠。夕陽低傍鷺鷥明。無聊賸有微吟興。遙和漁童款乃聲。

春感

侵晚空林鷓鴣鳴。愁多不耐餞春行。半池水氣蒸雲濕。一角霞輝抱日明。到處揶揄應笑我。此中空洞盡容卿。洛生咏罷支頤坐。一任人嗤老婢聲。

前生結習破書堆。蠹簡零星散麝煤。慧業生天誇謝客。精心奉道笑方回。閒塗故紙酬詩債。細拾殘花當酒材。正欲劇談無客到。東頭老屋盼君來。寄荔裳舍弟

土爾扈特額特哈薩克各蕃部入覲回巢余奉檄護送出境紀事四首

昔持英蕩朝天去。今向鑾坡獻壽回。立仗許登三殿側。賜筵曾設九賓陪。邊沙軟藉鋒車過。塞草肥迎宛馬來。職貢萬方全盛事。平安烽近赫連臺。

屬薦文茵照地光。錦繡稠疊壓歸裝。歡聲直道騰荒外。珍品從誇出尙方。玉節仍煩中屬國。金符新拜左賢王。聖朝綏遠無窮意。長使邊氓慶樂康。

邈迤郊原列旆旌。城頭鼓角極和平。秋星蓋野穹廬靜。夜火傳更戍堠明。都護彎弓能飲羽。名王上馬慣擒生。自憐文士無長技。也挽絲韁傍塞行。

馬蹄蹀躞響鳴珂。韃韃材官逐隊過。萬里嚴程趨紫塞。三秋高浪渡黃河。郵亭客去喧烏鵲。古道人閒散駱駝。歸義好繙新樂府。白狼槃木入聲歌。

畫船

曲渚魚鱗浪。廻堤雁齒橋。繽紛張錦幔。容與泛蘭橈。羅襪凌波步。瓊烟貼水飄。半篙新漲潤。七里淥塘遙。網戶垂銀蒜。瑠窗嵌玉珧。簾編湘女竹。扇剪美人蕉。綵絡調歌鳥。珠鈴繫雪貓。扣舷蕙葉岸。解纜藕花潮。迷迭含芳長。蘅蕪蒸火焦。繁華今好在。香粉未全銷。午夜開華宴。辛房出阿嬌。約黃孫壽額。束素小憐腰。粉鏡千回照。雲梳百遍撩。眉長勻翠黛。髮膩彈珠翹。彩釜猩脣煮。礪杯桂露澆。風微衣麝散。帆轉酒鱗搖。射覆團蟲豸。攤錢喝雉梟。怕成泥絮果。休負雨雲宵。促坐心相印。褰帷目屢招。犀筒銀液滅。蛤帳守宮消。催賜纏頭錦。還留繫臂綃。鴛鴦一夢覺。烟水兩迢迢。

初秋寄可齋六兄

靜坐思羈客。離家已四年。瞿塘翻惡浪。劍閣鎖愁烟。鄉味懷鱸膾。蠻風秀木棉。關心驚朔吹。灑淚聽啼鶯。恨乏凌霄翮。難求縮地仙。峰遮遙目斷。月伴客心懸。見說窮荒外。猶聞羽檄傳。三旬苗逆命。六伐士揮鉞。魚壘祆氛動。蠶叢殺氣纏。電飛橫海箭。雲擁伏波船。的的宵烽舉。嗚嗚曉角宣。平沙埋折戟。殘寇棄空拳。火射荒燐滅。風吹古血羶。窺人走罔兩。啄月飽烏鳶。天意誅羣醜。軍威震極邊。獍梟兇自斃。貔虎勇無前。運策煩諸葛。回師縛右賢。一麾臨的博。七萃壓先零。劍指星芒落。灰占月暈圓。地開金馬郡。功勒碧雞巔。叩筇當衝要。官曹少靜便。調符過赤甲。轉粟上青天。且敍天倫樂。還期道性全。傍岩園半畝。記曲閣三椽。

取次開琅篔。周遭蒼蕙楊。雪回雙鶴舞。霞襯百花妍。作達淵明酒。耽閒子敬氊。趨庭懷實橘。事佛坐依蓮。  
兄白號蓮 爐炷雙烟麝。甌烹八卦泉。叩器泉名襟懷賴陶寫。愁思莫縈牽。吳樹知秋矣。巴雲望渺然。涼風敲竹  
跌侍者 柏。暝露墜蘭莖。古壁琴徽冷。銅荷蠟淚澣。螢飛烟漠漠。人靜漏涓涓。浩淼江湖闊。寒喧節候遷。魚書空往  
返。蝶夢屢廻旋。我只懷康樂。君應念惠連。蓬蒿掩荒徑。糠粃伴芸編。騷鬼能爲祟。書淫竟莫痊。淒涼賦窮  
鳥。惻愴聽鳴蟬。藁苦知誰共。膏明只自煎。迺遭胡至此。偈仄擬終焉。豈有干時策。空思負郭田。獨行無壓  
負。白足望夔憐。破闕爲佳耳。尋途各勉旃。感秋魂懍懍。望遠涕潺湲。甚處堪投筆。終須早着鞭。角鷹刷毛  
羽。霄漢看騰鶩。

東鄒寶松太守三十韻乞臺灣府志

島嶼窮溟外。波濤積水東。領符分虎竹。懸旆繞蛇弓。騁從專城貴。旌旄列郡雄。海疆來杜母。蠻俗仰羊公。  
威惠三年遍。謳謠四野同。歸裝辭越嶠。鄉思值秋風。異境超區外。奇觀入眼中。此行凌渤海。直擬鑿洪濛。  
歷市吹嘘幻。魚雲刻畫工。颺風晴颭颭。陰火暝熊熊。水豹翻層浪。花鷹振遠空。金沙華蚌紫。鉄網女珊瑚。  
漢石堆殘錦。秦橋界斷虹。路疑圓嶠近。穴豈沃焦通。夜泊鉛爲碇。晨裝錦作幃。衝波廻鷁舫。搥鼓渡蛟宮。  
五柳家猶在。千桑願已豐。閒尋遂初賦。白署樂天翁。寄興琴書酒。關情杞菊松。室餘廉吏橐。人愛使君驄。  
許靖鄉評美。王球族望崇。壺冰開皎潔。佩玉戛玲瓏。昨歲虛投刺。今晨幸發蒙。上林賦遇今日發蒙迷途哀病驥。末

技獎雕蟲。賭墅陪安石。開樽謁孔融。有心希剪拂。刻意自磨礪。鯨島侏儻俗。龍編幽怪叢。可能蒙惠贈。便足破盲聾。跋浪乖奇志。蟠泥抱隱衷。從今誇海運。矯翮待飛翬。

澄心堂紙二十四韻

記昔風流主。爭雄翰墨場。新詞何妙麗。小札最精良。巧織光明錦。勻鋪細膩霜。品方蠶繭重。價比竹波昂。進御君王笑。拈籤女史忙。緇來金葉底。擘向綺筵傍。妙墨留仙子。謂耿玉真香經寫法王。紅鈴署鍾隱。後主自號鍾山士。豔曲記娥皇。方勣黃羅面。燒槽紫錦囊。一般供玩賞。終古怨興亡。玉夜家山破。千年劫燼颺。灰都作蝴蝶。魂不化鴛鴦。風送迎降表。星飛告急章。聚時勞護惜。散日太蒼黃。故國春江冷。羅衾夜雨涼。纏綿歌半闕。慘澹墨千行。無復迴鸞影。空教齋蠹糧。叢殘歸史館。粗使給文房。歐公五代史用此紙起稿。又聖俞詩云。聊給粗使供鸞臺。淳化銀鈎塌。宣和玉局藏。謠纔聽白雁。讖又應紅羊。梅老新詩在。王郎舊志詳。奇珍易零落。尤物幾滄桑。兩軸如相贈。千金可許償。好同龍尾硯。軼事話南唐。

碧紗幮十六韻

紫貝冰紋檻。明螺卅字樞。桃笙涼乍展。網戶靜初扃。暫却蒲葵扇。教移雲母屏。千絲成巧製。十幅可中亭。水玉寒纒凝。秋雲澹欲停。薄翎裝翡翠。輕翅擘蜻蛉。螢暗分光綠。蟾孤逗影青。雙烟縈寶篆。列點數空星。燈穗看來澹。花房摘處馨。倦眸時甸線。悄語倍瓏玲。小掛龍皮拂。勻排犀角釘。密防蚊陣入。慢遣蝶魂醒。

寄呈述庵先生

白板烟中舫。紅羅水上亭。清疑通溟滓。深好護娉婷。卻暑眠方穩。遊仙夢亦靈。碧城十二曲。曲曲記曾經。  
憶昔遊京輦。青袍拜月題。蘭成初射策。德祖尙垂臚。氣象瞻嵩岱。文章仰壁奎。雅懷開朗月。豪氣吐長霓。  
入座皆瓊粲。升閑盡駉騃。登龍爭御李。題鳳詎嘲嵇。謂同門叔華竹橋仲則諸君謬探蓬樗質。容參桃李蹊。浣腸吞寶  
篆。刮目得金篦。賦手驚鸚鵡。詞鋒淬鸚鵡。橫經問菜芡。就席對楂梨。升斗原爲養。聲名敢厭低。金臺纔奉  
檄。燕市遂歌驪。別淚綠纓落。新篇滿篋攜。師恩逾鄭重。吾道在提撕。客路關河迴。勞人面目黧。風塵從漫  
浪。朱墨學勾稽。虎尾危曾躡。焦原險屢躋。一官來絕徼。六載此卑栖。旌節移三輔。絲綸下九閨。高秋雕鷲  
翻。遠道驢驢蹄。關吏迎輅傳。邊氓識組圭。祥刑平庶讞。惠政慰羣黎。畫戟黃圖右。烏臺紫嶽西。稍欣兩火  
近。仍悵笑言睽。昨歲遭兵燹。儒生習鼓鞮。狂塵奔契揄。賊浪沸鯨鯢。誓死孤城在。輕生一劍提。飛灰黯樓  
堞。猛火照弧鉀。浹日重圍解。星郵尺素齋。一緘詞愴惻。七字韻清凄。惡鳥巢旋墮。妖狐穴盡犁。感深神恫  
悅。痛定涕流澌。差喜身無恙。休嗟命不齊。宋人空刻楮。楚客尙吹鼃。蓬島風頻引。銀潢路轉迷。往來旋磨  
蟻。進退觸藩羝。已分安蓬蘖。何心慕錦綈。公言真可憶。鄉思浩無倪。蓉渚尋漁舫。龍峯灌藥畦。菰蒲期射  
鴨。柑酒好聽鷄。試問飄零者。何如歸去兮。故山聞怨鶴。舊事觸靈犀。樗柳當簷脫。蛩蟹繞砌啼。思枯抽禿  
管。興索拊空甌。落日回陂雁。寒烟竄嶺驂。鐙光秋淡淡。林響晚悽悽。夢去星沉水。書來雲憶泥。無緣奉譚



讎幾度隔喧萋。爨下邀三嘆。車前試一嘶。陸倕知已賦。重疊寫香緹。

### 伏羌紀事詩一百韻

聖澤敷殊俗。天聲震八紘。花門何醜類。草竊敢縱橫。釁爲尋仇啓。妖由構煽成。逆回田五謀復新教。勾引

地鼠牙工發覆。蝸角怒相傾。先是賊匪約於本年五月五日起事。緣方鎮空持重。中權孰使令。養癰憂內

潰。躡尾失先鳴。時賊由海城攻靖遠。轉掠濡滯師將老。驍騰敵果勅。誰當擒罔象。無計制長鯨。祖厲朝呼

渡。時靖遠從逆。賊匪。蕭關夜斫營。四月十六日事。定西仍聚落。賊首田五斃於狼山。餘黨僅百餘人。以待賊因沿流而下。

渭北却翻城。賊梁劫通渭之馬營監。叢爾當陽邑。當陽亭。相違一日程。號唇虞是齒。邾柝魯聞聲。中夜荒

雞噉高巖石。鼓鏗。先是伏羌雞。未夜半輒鳴。占云有兵。又重圍占月暈。芒角動星精。縣尉標完節。九月初

破通渭縣令王樓潛。將軍著烈名。明都統孫參戎奮勇擊賊。山沙蟲師有劫。風鶴信頻驚。陸地機纔發。地

逸典史溫模自經死。將軍著烈名。路崎嶇。後軍不繼。遂被害。沙蟲師有劫。風鶴信頻驚。陸地機纔發。

殺機龍蛇起。蕭牆禍早萌。朝三狙暮四。晝伏鼠宵行。無奈禾生莠。難教石化瓊。按牢寧有術。鈎距遣誰偵。

陸陰符經。包藏外匪城。中居民頗有知其姦者。狼卜陰謀泄。犀燃詭狀呈。羣姦方擾擾。數士獨錚錚。義可捐妻子。

情誰願舅甥。回民馬映龍。即矢心先告密。雪泣自輸誠。嘉爾殊慷慨。緊余不聽瑩。終然邀上賞。可以定輿

評。五月十四日回民監生馬映龍。白中輝。馬宏元。將馬稱驥等逆謀。首告伏羌。向未設兵。星馳告急。官兵

鐵滿狹巷短刀迎螳臂窮猶奮。蓬眸死尙瞭。駢頭填犴獄。連頸縛徽纆。五月十八日請兵未至而馬稱驥

賊已持械而出當時格殺者馬內患方消引前邨條鬪爭烽烟騰土垝賊騎漫山坪十八日晚即有鄉民

斯坪各邨莊驅脅回民大掠而進跌足夫攜婦摩肩弟覓兄倉皇棄髻鬣嗚咽哭婆嫗近郭人流血環郭火徹明姚墟餘

瓦礫謝墅剩榛荆縣北五里姚謝家莊有武生姚諛或千脣沸行如一足蹶飛揚氛甚惡跳盪色何獮呀

闐夔牆壁喧豚坼棟蔓陣雲愁變隼邊日慘光品滿谷驅牛馬連車藉稻秔爭先誇趨捷走險據嶢崢賊

圍縣城據天門山札巖邑周防早微官性命輕俠腸原耿耿獨行信硜硜黑子城三版青萍水一泓周苛

惟誓死傳變敢求生羯末才無敵羊何氣並英射鵬驚斛律倚馬笑袁宏謂戴曉嵐暨家從汪贊山秋岑

賈山登城射賊竟斃一人勢只伸孤掌危還藉衆擎帶刀農佩犢時召募鄉勇持戟士離囊邑諸生魏輔君王表等健

婦俱行汲羸童亦踐更奔馳勞僕隸捍禦賴髣髴流入李忠等上城流電飛倅落狂雷巨礮轟登陣均受

甲給廩免呼庚四日孤墉在千夫一膽并徒勞設梁麗屢見碎衝韜賊積草置車伏車下天意爲誰怒民

心笑爾儂賊連攻圍四晝夜城上矢石如雨斃其如棋爭劫勝似博紉梟羸侵曉憑樓堞遙原見旆旌烟

塵飛候騎筋吹到援兵象主羣陰遜爻占大道亨危巢徙梟鴿舊穴聚狐麀二十二日李制軍率兵到縣

走秦安由底店仍聚石峰堡自昔恢王度由來仗國楨班資周保傅勳閔漢公卿福制軍暨英勇中堂先後率京兵來

玉節威行部銅符事遠征指麾皆頗牧趨走盡韓彭茂舍嚴刁斗轅門急鼓鉦羽書千里應積衆萬囊盛

續挾全軍煥。醜投衆士醒。兩甄排柝妮。列騎雜斑駁。貳負強遭梏。防風窘待烹。長圍羅劍槩。險道斷溝坑。

賊困守石峰。遂我兵四面列圍。絕其汲道。賊窘急乞降。我兵乘機攻剿。賊巢遂破。羣慝應簫勺。神姦首滿盈。臍膏明似燭。項骨脆於菁。項骨脆於春蔓。菁見

盧全詩。困獸攀籠檻。游魂戀釜鑊。肘跗紛磔裂。骸骼亂枝撐。烈烈摧枯枿。炎炎燎聚蠹。纍纍伴婦女。婉婉曳

孩嬰。或有逋逃藪。其如置網紉。自知應斧鑕。初不假笞撻。絲中從逆回匪。有自底店竄。回各邨者。獲之輒一訊而服。革面從文豹。遷喬

幕谷鶯。爾曹生有路。今代獄惟平。近奉上諭。良善回民。仍令安業。毋許株累。有向從新教者。許其改歸舊教。寬大羣方悅。明良百度貞。直教空

貫索。奚止掃欃槍。歸馬秦川迥。回軍華嶽晴。虎牙宣偉略。龍額錫殊榮。福制軍特晉侯爵。銘擬燕然勒。歌同漢樂

府。歡聲溢慶市。和氣叶韶箴。溫語傳丹屐。恩綸出玉京。蠲租憐瘠壤。給復慰疲氓。資溥金兼粟。仁先獨與

惇。高欄蓋焦土。殘魃掩荒塋。奉恩詔。凡被賊焚掠傷害。痛定微軀在。腸迴百感縈。失時幾拾瀋。懲熱慣吹

羹。彈指閻浮劫。當場傀儡棚。青山招遠夢。白水憶前盟。關隴皇威暢。邊陲戰氣清。江鄉三畝宅。何日好歸

耕。

# 吳照

字照南。南城人。貢生。官大庾教諭。有聽雨齋集。

蒲謁山房詩話。照南才華清綺。跌宕不羈。少從張觀察銘來松江。過吳門。得詩法於禮堂光祿。一以唐人爲師。及予至江西。照南來執弟子禮。餘人不直掛眼也。通六書。又工畫竹。人以爲金錯刀之比。

予江西門人。中有三吳之號。謂雲衣蘭雪及照南也。

辛亥暮春武昌東郊外覽勝

飛英滿漢皋。芳草徧楚甸。佳賞愛餘春。覽物增眷戀。決決野田流。喧喧林鳥囀。試泉記卓刀。訪古失臺殿。遂陟洪山巔。縱目盡鄉縣。天遠指長江。雲氣亦屢變。既喜風盪襟。更無塵障面。琳宮與紺宇。偶憩情所便。緇流遁虛無。羽士託修鍊。雖蒙智者嗤。自有愚人羨。晚鐘催夕陽。高興未云倦。藍輿望城闔。鸞鶴飛薨見。願言續後期。江漢恐遊衍。悵然念旅羈。流光疾如箭。

子雲居士和予春游及惠墨詩即贈一首仍用春游韻

詩名三十年。子雲在海甸。閉精斗室中。掃萬惟一戀。春花媚青陽。嬌弄百禽囀。劃天無纖雲。彈指現宮殿。我求大雅才。汗漫歷州縣。騁轡誰知歸。拘牽了難變。換骨要大丹。不敢飾頭面。疥痔一身在。安得體輕便。冶金棄洪爐。篝火妄烹鍊。寶色俱晦埋。入市誰寫羨。我每讀子詩。洗眼去昏倦。古者吾既知。今時實稀見。詞壇幻魚龍。百戲呈曼衍。敢逞談吐鋒。請問機對箭。

銀槎詩

嘉興銀工朱碧山。槎杯始載南邨叟。元朝學士競獻酬。明三百年缺談藪。北平初記孫公藏。萊陽曾聞宋氏守。證以歌詩皆壬寅。荔裳詩。背鑑至正壬寅字。愚山詩。猶存至正壬寅字。攷之江邨乃乙酉。苑西集。杯首有岳壽無疆四字。又刻至正乙酉年。朱李咨嗟不作雙。朱竹垞詩。可機雙解今成鱗。李武曾詩。往時作雙今不偶。漁洋記錄忽成偶。居易錄。退谷荔各藏銀槎一。平生未見銀鑿落。一是二疑難。

剖今年九月邗溝上。西溪主人置樽酒。筵前捧出博望侯。乙酉款識鑄諸右。再三疑是高家收。卻少額端題岳壽。定知巧匠製必多。雙鱗流傳殊否否。主人笑我太饒舌。倒瀉銀河吞一口。摩挲試認尋源人。長袖飄然垂左手。蒲萄滿酌大西夏。浩蕩乘風獨翹首。所渠千七百一川。臥看輪迴烏兔走。怪爾尋章摘句徒。那識河源接星斗。千里一曲須千卮。何事姓名證誰某。孫宋諸公安在哉。辨論雖多徒覆瓿。與其身後虛名留。不若生前一杯有。此杯此客在維揚。他歲他鄉說癸丑。難從織女問支機。且對黃花爛牕牖。置身我亦入槎中。視崑崙虛如培塿。

天門山

長江流萬古。東下鎖天門。滄海一髮盡。秋陰千里昏。飄零感身世。俯仰信乾坤。搔首平臺上。茫茫誰與論。

天一山晚眺

遠浦樹蒼蒼。千山帶夕陽。晴嵐浮郡郭。烟火隱帆樵。樵唱投村晚。鐘聲出寺長。登臨發清興。仿佛似瀟湘。

孫香泉招同沈春林項直菴沈白華楊緒堂小飲時香泉將歸吳中

小閣開尊煖氣和。酒鱗豔豔欲生波。半酣我亦諳吳語。高會人休學楚歌。十幅蠻箋花樣瘦。

沈眷意于歌者有無題詩

首。三篙春水別懷多。平生未減飛揚氣。容易逢場醉臉酡。

於越訪友人

柴門依約傍江隈。雲樹多情喜再來。秋水船隨湖雁至。故人尊向桂花開。貧專邱壑原奇福。老閱風霜作散材。我欲買山同卜築。青松翠竹許分栽。

閩門偶興

五湖浪跡笑西東。一棹吳門興未窮。十里市聲烟樹外。百分春色酒船中。平橋水暖鸞彎月。畫閣晴開面面風。千載姑蘇行樂地。莫將身世感萍蓬。

城北遊春

棲遲兩度金陵客。又見韶光轉歲華。路熟重尋前代寺。天晴補看去年花。平湖馬洗春波綠。廢苑鶯啼細柳斜。今日同游須盡醉。解裘先質酒人家。

贈陳古漁

跣足風塵計繹非。論交先懶叩朱扉。頻年白下稱流寓。今日江東識布衣。老眼看花清淚落。名山載筆賞音稀。古漁輯有棲霞山志莫嫌骨相多寒瘦。我輩從來要忍飢。

金陵贈古漁

千里相思喜合併。蕭疎白髮啓柴荆。氣吞湖海襟期闊。老閱炎涼感慨平。歲歉尙能安素食。詩工原不礙狂名。一尊細酌疎窻下。笑指東山月正生。

贈牧野上人

重埋琴書客。秣陵舊游剩。得幾詩朋。投入自笑。非高士。安分居然羨老僧。簷角葉飛。渾似雨。霜天月皎。不宜燈。與公試話年來事。招隱名山是上乘。

金慰祖

字繩武。號蘭岫。嘉定人。貢生。早卒。有綠雨山房吟稿。

蒲褐山房詩話。蘭岫觀察洪銓之孫。詩才繁富。南昌彭司空元瑞。視學東南。愛之。七律如飄零弱主。封歸命。憔悴詞臣。著辨亡。忠臣終惜。袁開府。名士應羞。積彥回。燕子話殘樓。外雨梨花夢。斷夜來雲。欲消寒意。添龍鬚。頗愛微吟。凍兔尖。壽祠山火。歸鴉噪。斷研斜陽。牧馬嘶。客路吟箋。留緜兒。故人歸。信隔煙汀。諸句爲世所稱。而五古清遠。七古排募。駁駁入古人之室。拔頁赴都。尤爲于文襄公所賞。新官遺賦。時論惜之。

虎跑泉

蒼烟滿前山。溪行欲無路。微聞流水喧。遂溯源歸處。孤亭寒竹色。斜光澹春樹。寂歷青嶂重。迢遙翠微露。松花點塵衣。鐘響靜凡慮。平坡巨獸蹤。滉漾清泉注。瓢飲叢筠間。禪扉濃綠霧。不見古導師。徐詠坡仙句。夜登獅峰。遂宿留餘山居。

暮色蒼然來。殘暉黯前巘。寒碧落我衣。俯視月在澗。獅峰出羣岫。登陟寄遙眎。清燈耿岩扉。孤磬發齋館。晴嵐靜欲無。湖烟翠可卷。投宿空亭幽。啓牖虛光滿。叢筠翳蒙密。長松半凌亂。冉冉疎花香。霏霏夕露泫。

澗澗響寒泉。隔葉吠山犬。旅思既蕭條。晚風益清善。一與勝景值。乍喜塵踪遣。欵枕候曉光。探幽肆游行。

曉行九溪至理安寺

東嶺睇朝暉。西峯躡殘月。崖束奔細泉。林長聳清樾。沉沉霧氣滋。院院禽聲悅。夢入亂山深。花隨曉雲發。遂陟玉鈎橋。因尋涌泉碣。何處聽江聲。停輿叩孤剎。

拜繆文貞公墓

蒼蒼彭越山。渺渺長涇水。云有繆公原。荒阡近村市。嗚呼明季衰。朝廟綱維弛。巨璫持太阿。羣奸受頤指。公也本史臣。感憤司載紀。奉使渡瀟湘。發策詢多士。覘其識所存。庶令遇無詭。公典湖廣試發策試士有刺及宦官事鈍璫銜之激昂忠烈章。宵小魄潛褫。維公斧鉞嚴。點竄引經史。楊忠烈公疏劾忠賢二十四罪公為潤色奏草璫益心憾之平生薄蔡邕。志豈美官徙。百折且不回。三遷詎為喜。璫以公文望遷諭德巍巍玉泉岡。營壘窮華侈。索記等南園。斷腕不可使。叱咤壽寧侯。佞黨類有泚。璫營生壘玉泉山令其客以碑文請公不可丰裁凜自持。天地道終否。九關虎豹森。傷哉王度糝。造為羅織經。肆以鬼蜮技。誣良託苞苴。告密同投匭。慷慨就囹圄。殘酷肆撻捶。璫竄公名于織造李實疏中下鎮撫司為許顯純斃于獄意欲盡清流。何由達天咫。一網善類空。寧徒六君子。謂楊左袁顧六公覆盆泊得仲。國已傾宗祀。暨陽僅彈丸。同歸公與李。謂李忠毅公應昇亦江陰人同被禍百世共咨嗟。高風激頑鄙。我來古道旁。維舟採汀芷。再拜淚漣然。徘徊睇中泚。長松夕靄寒。亂水平橋圯。登壠想東林。春山百餘里。魂氣時往來。乘此虹梁紫。酌酒拂蒼碑。



柁轉啼鳥起。

讀史偶成

貞非柳下惠。寧學魯男子。廉非吳隱之。勿飲貪泉水。爲介毋爲通。律身慎于始。榮公附朱能。終貶雷陽里。昌黎三上書。亦爲識者警。君子在困窮。何徒豔朱紫。枉尺而直尋。得彼已失此。岌岌東晉朝。瓜分少完土。江左多英流。琅琊賴羣輔。誰令王茂宏。庸才稱仲父。睚眦死伯仁。流涕亦溪補。敦也叛逆同。假破東征斧。佳傳惑千秋。誅心等蘇峻。峻祖約當時第一流。我服溫忠武。吾觀李贊皇。雄謀足經國。僧儒小有才。駕馭亦稱職。果能泯怨尤。何難靖河北。顧惟門戶私。反覆窮擠抑。不見廉蘭徒。獨忿相戮力。平勃志安劉。交權資輔翼。如何英達人。乃遜武夫識。長卿能諫獵。顧上封禪書。子雲守太元。甘爲莽大夫。定識苟未足。文彩寧有餘。談諧東方生。侃侃陳六符。陸戟辟董偃。卓犖雄詞舒。下視嚴與終。渺小竟焉如。

同易圃先生暨蒙泉登虞山劍門峯頂作歌

虞山高蜿蜒。劍門尤峭蒨。十載經過未一登。空說嵐光日千變。虞山峰巒向背陰晴且暮隨時異色雖善畫者不能曲肖也曉來舟泊尚湖濱。山翠蒼蒼壓波面。褰衣一徑上籃輿。吾谷盤紆態婉孌。線路狹與猿猱爭。竹絡頻欹目震眩。祇餘絕巘掛藤花。每遇橫坡失香殿。折坂行如旋磨蟻。危樵遠類依檣燕。半壑微聞鐘梵清。百廻始有虹橋見。

連崗複磴眞宰愁。特擘雙崖立蘚片。森然十丈露崕呀。疑躍金精飛紫電。崢嶸取象蜀閣門。不知誰貯仙人箭。是時蓬勃天風號。瀑水砮崖玉花濺。崖高東風風不行。倒捲珠簾拂亭院。茫茫下視極梯田。千頃春湖僅匹練。獻花來鶴望依然。形似可求憑野諺。吾谷東爲美女獻花叢。又尙湖盡處有龜。去龜來形蹟望之逼似。皆土人所居也。却愁烟霧隱長涇。中有佳人舊文讖。于谷居長涇。去虞三十里。望中湖流如帶尙可辨觀。何時小隱共山林。漫結團蕉置琴硯。迥然長嘯幽谷。大  
地空濛春欲遍。聳身東望海雲黃。銀屋龍堂濤曼羨。高城百雉半依山。萬井樓臺壯哉縣。我生未爲遠道行。西僅金陵南薛澱。今春匝月涉錢江。衣上征塵客游倦。豈知靈境在意外。海色湖光疊隱現。富春老人惜不逢。潑墨憑誰寫東絹。徑欲斗酒登湖橋。狂醉題詩續橫卷。勿令寂寞笑山靈。差勝蕭條隱壠甸。王公才名冠燕臺。談詩望重金閨彥。張侯下筆師鐘繇。往往求書捉葵扇。相於唱和盡可傳。曷不誅茅事著撰。山僧遠致玉蟹泉。亭午供客伊蒲饌。遺聞軼事足諮諏。欲問歸途餘眷戀。他年雲棧訪前游。記取圓坡谷鶯囀。

出插行

醉濁酒。揚清鉦。船頭喜望臨清城。洗汶之泉九十七。盤紆羅帶相交縈。濁流有聲西北瀉。誰挽地脉回東行。靈風飄旗高不捲。漳神祠屋羣鳥鳴。連朝阻插喜放溜。瞥如蒼鷹掣鞬翔空冥。登臚長嘯一舒日。蒼然平楚秋原晴。長年爲余言。此途足畏無羈情。君不見會通之浚本漕粟。設官節水權虛盈。千檣萬艘集春

夏百夫邪許尺寸爭。翻資小吏成利藪。垂綆繫板撓征程。七十二插孰飛越。不惜客子愁沙汀。君行兩旬秋水闊。縱稍濡滯旋揚舲。人生快意豈有極。涉歷務念心太平。聞言默自警。斯語宜箴銘。捷徑恥投足。遲速隨所經。有插輒愁孤艇滯。出插又患關津征。不如衛河枯棹叟。夕陽飲犢歸柴荆。

題述庵先生三泖漁莊圖冊

泖湖百頃流縱縱。涵青漲綠迷釣矸。九峯綿延遞環接。倒影明鏡浮嵐雙。水鄉清嘉絕可樂。春有茶笋秋蘭茱。平陂數椽對孤塔。松毛縛屋蕉遮牕。公昔讀書樂烟渚。豹隱彷彿襄陽龐。一朝射策登上第。龍文百斛健筆扛。千言揮灑工奏賦。朶殿珮玉趨瑋璫。經綸報國展奇績。大兵西征金鼓撻。元戎借箸資贊畫。滇池棘道經崆峒。飛書草檄磨盾鼻。機宜洞合堅礪降。甲兵小范足方駕。曷數唐蒙通冉駹。梯山棧谷悉歸化。荒徼窮壤咸耕耰。古來文人志開濟。豈徒翰墨驚冥恣。師還迎勞加懋獎。賜翎圖像宸恩厖。卿班累沐不次擢。南臺霜簡羣震懾。屬車九九備顧問。扈從誕歷東南邦。帝心簡倚念陳臬。特遣豸服臨西江。洪都千里波浩淼。津頭伐鼓聲逢逢。明刑弼教昔所重。敬歷佇見張牙幢。惟公居榮志恬淡。清夢往往思漁艘。憐才愛士勤汲引。座盈嘉客傾金缸。蓬茅亦復荷培植。洪鐘常許寸莛撞。自公南行悵失倚。人海不啻聞音聲。敝廬距泖一衣帶。乘風屢掛芙蓉雙。披圖注目獨神王。菰蒲春雨飛流淙。楓涇朱涇瀉新漲。譬若急峽噴驚瀧。漁舫葉葉出復沒。亦有菅蒯維柳椿。公昨給假今迎養。暫閑千柄蓮花躡。豫章烟水亦絕勝。滕

王高閣標文杠。綸扉調鼎旦。晚聽宣召。從公話游三。柳京國挑銀釘。

夢游雁蕩山歌東汪少山丈

我聞雁蕩之峯百有二。精藍十八青螺巔。謝公好游屐未到。層崖半擁兜羅綿。東甌地勢濱滄海。鞭石驅

山仗真宰。龍湫百丈掛珠簾。似與天台爭巋嶭。先公往日曾專城。芙蓉鑿石留題名。丙寅秋先大父有游雁蕩諸詩同吳副使

架亭刻石芙蓉邨下二十餘年已陳迹。憐我選勝徒殷情。浮溪詩翁曠世才。昨朝筇杖東南來。爲言絕頂見湖雁。十

谷八洞窮崔嵬。羨翁振衣歷孤迴。未得相從遍靈境。酒闌日暮夢茅龍。月明飛度丹芳嶺。陟嶺氣高寒。天

梯碧巒岿。四十九盤條眼底。互梁橫亘青雲端。蓮花芝草左右迎。玉女天樂鸞鳳聲。蓮花芝草玉女天樂俱峯名羣星

搖搖若可摘。菱筍卓立雙崢嶸。指靈峯之磴巘。凭淨名之軒楹。神龍噴水雷雨急。隨風變幻天瓢傾。羽旗

爛漫展未捲。藥杵時和哀猿鳴。展旗藥杵諸峯俱在東內谷洞天石門呀然啟。雙娥二八銖衣輕。紫簫乍低芝蓋轉。仙

人冉冉來容成。千紆百折攀岩嶽。數椽倚壁三重茅。道逢陳覺筦爾笑。贈我紫蒂細紋桃。事見雁蕩山志斗城縹

緲。甌水迢遙鐘聲間起。松花徐飄極睇滄溟一杯耳。天雞夜半鳴寒潮。萬峯紫翠遞深淺。紅輪騰湧蓬萊

椒。浩歌一曲發遐想。逢逢澗底迴長飈。方控鶴翎更西去。冷然行訪黃巖路。風馬雲車乍有無。驚迴清夢

芸窗曙。紅蕤枕畔雁聲高。不知門外烏啼樹。斤竹澗。白雨潭。此中山水心所諳。青鞋布襪終幽探。期翁他

日徑攜我。合掌峯下尋瞿曇。

送王鶴溪先生之粵有感先大父奉使舊事賦呈

江左風流客。扁舟萬里行。春烟六榕寺。殘月五羊城。崖勒新題句。碑留舊使名。憑誰徵往澤。白髮海南生。

惠山僧寺題壁

山翠入江明。山雲出岫輕。半巖開梵宇。一面對春城。虛牖靈風肅。寒潭孤樹清。烹茶懷舊侶。經歲動吟情。

冬杪得邵荻香書

意氣與君同。年年尺素通。離心縈舊雨。鍛翼感長風。置袖沉吟後。挑燈涕淚中。今宵山閣夢。定逐海雲東。

雨夜獨坐有懷荻香

獨聽風檐雨。瀟瀟竟夜寒。劇憐花事減。因憶客衣單。海色侵華髮。春塵敝素冠。欲乘新漲水。放溜到空灘。

無題

唐集

爭引秦娥下鳳臺。且將團扇共徘徊。杏花滿地堆香雪。蓮朶含風動玉杯。綠綺韻高湘女怨。銀泥衫穩越娃裁。良宵更有多情處。玉漏銅壺且莫催。

也同歡笑也同愁。簾下三重幙一鉤。忽展彩牋書別賦。願爲雙鷺宿中洲。鮫綃霧縠籠香雪。錦纜牙檣起白鷗。日暮酒醒人已遠。鳥啼花落水空流。

吳梅村墓

古柔離立佳城。祭酒荒阡落日晴。兩代詩名元好問。畢生心事沈初明。留身豈爲前朝史。紀寇彌傷勝國兵。蔓草寒烟餘悵快。玉京遺壘亦榛荆。

藕香讀書資善寺暇日過訪卽事

貓頭新筍秀林扉。宿雨方蘇梅子肥。紅蕊半殘蜂嬾抱。綠牕斜掩燕交飛。讀書新有珠船獲。論古還看玉麈揮。我欲雲亭頻問字。休噴屐齒破苔衣。

婁東道中有懷臥雲舊游

麥花香裏碧溪灣。藹藹浮雲自往還。古寺綠陰飛鳥外。孤村人語夕陽間。曾題薜墨移春檻。憶醉鳧觴疊石山。陳迹磨牛頻悵快。忘機輸與白鷗閑。

雪中過花田

試罷春山第二泉。又披風帽過江天。石橋珠塔花田路。十里叢梅雪打船。

夜過露筋祠

白蓮花落畫橈遲。湖曲微風拂面吹。三十六陂環玉玦。月華涼浸露筋祠。

漂母祠

一飯艱難託釣絲。英雄舍母更誰知。可憐纔奉千金報。已是弓藏烏盡時。

伽溝過留侯受書處

報韓亡命伽溝里。大索猶憐秦網疎。燔盡六經誅偶語。野橋又授一編書。

### 汪中

字容夫。江都人。貢生。

蒲謁山房詩話。容夫多聞彊記。經史金石。悉心研究。嘗得漢石闕畫。以五千錢從寶應。歸其辭如此。性情兀傲。凌轢時人。故人多短之。中年受業於予。欲自比于王給事。念孫及給事子孝廉。引之。暨劉敏論台拱。索予為文。因舉孫樵李潼司空圖行在三絕為比。容夫喜劇。作書數百言。以謝家故。資子與畢總督沅寓。聯政全君德。俾掌大觀堂所頒四庫全書。因此所入頗豐。友全君移任杭州。又屬其兼掌西湖賜書。容夫赴杭。同人饋錢飲之。大醉。比曉而卒。生平所著有廣陵通典三十卷。春秋後傳二十卷。述事四卷。又選屈宋以下哀艷之文。為傷心集若干卷。比其歿也。子稗著。作皆不可考。阮閣學元僅傳其述學重梓之。劉敦諭欲哀其集。亦不能多得也。詩非所長。從淮海英靈集中鈔得一首。秋墳鬼唱亦徐文長董雨若之比也。

辛卯三月二十一日夜和黃仲則景仁

叢薄風生窗淅淅。夜火欲盡作青色。病客獨坐毛髮立。鬼適何來太相逼。颯然雨落林鳥啼。空堂曳革行。來遲。終夜作索心。然疑天明向壁塊然臥。與汝相守能幾時。

### 李日華

字憲吉。嘉興人。集子。貢生。有青蓮館集。

蒲謁山房詩話。憲吉為同年。經芻之子。以拔貢入京師。才華籍甚。館於文襄公邸舍。半載而亡。予悼以詩云。青蓮舊館荒蕪盡。白石新詞感慨多。姓名無復填銀榜。詞賦偏教動玉樓。身非金石原難。

料筆有詩書定  
可傳爲時所誦

試越中新茶

松風吹竹爐。啜彼溪水活。愛茲雙鳳團。厥產乃在越。綠花色可餐。紫筍芽乍茁。封題試一開。其氣已秘鬱。我聞苦茶樹。爾雅紛羅列。仙家垂方書。久服換凡骨。顧渚與武夷。歐蔡感譜述。豈知種獨殊。方物補越絕。始歎千巖秀。鍾毓何葱鬱。憶昔鬪酒兵。蒲萄正新醲。西施乳最甘。銀盤蕝更滑。一食三百杯。豪氣猶蓬勃。露沉月已微。三更起酒渴。都藍列選具。珍重乍拭拂。貯以春甕深。吹以桂火烈。紅雲壓雪碗。乳花初下咽。如御含風袍。清飈生頰舌。迢迢會稽山。勝境徒恍惚。浣紗江清冷。芳草猶未歇。會當一振衣。烹泉坐林樾。

洞溪二賢詩

明巽隱先生程本立

先人代偉人。立身庶完善。正學崇魯鄒。勁節凜冠冕。誠能格象主。法必本經典。屹立彊固姿。喬岳一盱睥。髫年已成器。美質抱瑚璉。廓然大肆志。章句屏蕪舛。問作塵外游。宿儒共循勉。偶訪環中老。爲賦惜日短。蕭寥金華山。學海百川卷。危緒懸一髮。緣督得連舛。出除親王吏。賈韋同華選。諷諫臣心苦。滇洱膺呵遣。道勝無窮居。異俗豈難返。馬判避車輪。鷄神馴蘭圈。峩峩西平公。依倚輯緬甸。摩盾一紙書。羅鬼得蘇喘。點蒼與格孤。濃綠浮新鬢。奏計閭闔趨。文章得遷轉。執簡副中丞。視草筵詞苑。豫章綰銀符。靖難更兵燹。



親藩篡逆成。事不睹編簡。平生學何爲。畢命意施坦。同時方練輩。大義共推闡。芟夷一朝盡。清流空京輦。李詎代桃僵。桂不爲蘭免。嗚呼唯先生。全歸獲所踐。絕學開吾邦。奇節不自顯。一編最後出。雷電護蟲篆。信知派別眞。異代得流衍。大雅有傳人。異說毋橫貫。

楊園先生張履祥

大道著孔門。忠孝本學術。猗嗟楊園子。曠世挺昭質。乾坤合屯艱。時議方橫出。甘陵南北部。國亡罪未雪。先生顧之憂。沉痛腸內熱。負笈山陰門。大義見削札。如披炎午文。豫祭文山活。齧指棄諸生。哀衣猶裹血。其時羣盜橫。餘殃及枯骨。未就馬鬣封。已毀鷓鴣室。長號迫中腸。匍匐臥坯穴。可憐終身喪。麻衣表極褐。志業晚愈醇。詩書光未竭。元明超等倫。宋賢庶彷彿。卽登先師堂。亦在狂狷列。嗚呼子少孤。荼苦送日月。氣盛志益銳。雜學亦馳突。孤島思傍徨。敬岸足窳窳。飄然指康莊。測景仗圭臬。廻略大荒來。百派辨芒芴。所以古醇儒。始亦墮禪窟。著書多質言。立志絕迂闊。庸行未易敦。往往懲前失。苦思彌和平。憫世釋憤疾。躬耕隱石戶。食力義所切。旣念鞠子哀。復恐正學絕。豈知溘朝露。運會固莫奪。弱息已摧殘。門徒盡蕩析。誰能叫帝閭。石破秋雨裂。細思無含辛。終當配前哲。

題馬令南唐書後爲金秀升先生賦

唐祚終三百。藩鎮劇爭鬪。君亡國未亡。正朔在天祐。朱溫篡唐而諸侯仍稱天祐唐未亡也。區區五經兒。草竊等窮獸。史臣

操褒貶。歷叙著代授。正統尊亂臣。諸國書僭寇。不聞蘭臺書。作紀稱新后。誰將春秋義。更糾歐陽繆。峩峩江南君。淮甸足庶富。鯉魚飛上天。發跡著勞疚。漢中琅邪王。劉馬延餘胄。唐祀苟血食。世系更焉究。慷慨義士懷。亦足慰思舊。國史具勸戒。一代垂法守。江淮盛衣冠。詎可仍闕漏。馬氏綴舊聞。盍簡拾颺。千百年一二。哀然稱良構。展卷三摩挲。丹鉛勘句讀。因思建國初。生民望拯救。中原墜塗炭。時哉良難遘。奈何爭彈丸。籌國廿年後。八閩尋干戈。三楚拾顛覆。迨後失淮南。舉肥轉羸瘦。風流繼六朝。詞藻炳文囿。誰歟老學庵。未易校妍陋。謂陸後來傳十國。吳志伊先生十國春秋多取證此書。轉晒帝汴者。蕪史恐遺臭。

程咸九邀過寄圃分賦

薄靄澄空曲。浮嵐入夏清。劇談聯舊雨。前度聽新鶯。春間同春橋先生過此。水檻桐侵帽。山廚筍作羹。夕陽銜半嶺。

改席策筇行。

竹牖迎涼至。疎籬傍徑開。晚風生薜荔。夜雨熟楊梅。草已三年綠。人今幾度來。忘形到爾汝。把酒坐蒼苔。踴臂從君慣。疎狂奈我何。坐來風磴久。衣惹露華多。自有觀濠興。空成扣角歌。秋山叢桂發。載酒擬重過。

黃駢

字嶽領。興化人。貢生。官□□知縣。有雙江倡和集。

夢醒夜方半。堂虛燈尙然。幾人添別恨。一水隔長天。餘響度雲外。遙情依日邊。莫愁霜雪逼。春色入殘年。

新綠

又隨佳日蔭高齋。目送林於闕正排。幾處落花尋舊夢。一溪流水問生涯。濃分酒色才浮盞。細染苔痕欲上階。擬擬臨風過長夏。午陰游戲綠槐街。

陳樹華

字芳林。號冶泉。元和人。由蔭生官澤州府同知。

蒲謁山房詩話。芳林爲吳中名族。祖父皆以詩名。其少時愛左氏內外傳。參稽攷訂。至老不棄。所著春秋內外傳攷正五十卷。今存於阮芸臺中丞處。詩非所長。亦爲雅令。

蕪湖雨泊

不悟謀生拙。飄然賦遠游。大江奔濁浪。小邑寄偏陬。落落語青眼。悠悠漸白頭。蕪湖風雨裏。淹泊起鄉愁。

游南池用清江楊恪勤公韻

訪友任城道。南池得暫留。亭幽渾忘暑。樹密已含秋。勝迹垂千載。閒吟起百憂。四明齊李杜。主簿亦名流。

杜工部祠在南城外。上石刻有與任城許主簿游南池詩。太白樓在南城上。樓內塑謫仙賀知章像。

王述庵方伯擢少司寇。忽忽北上。送別之後。獨游蘭北寺。追溯春莫。邀同人讌集。祀宋牧仲先生。像于綿津書屋。用壁間元韻唱和。余未及與。撫景興懷。輒繼作奉寄。

送別趨南浦。尋幽過北蘭。花光明曲徑。鳥影落迴湍。薦藻遺容在。焚香丈室安。風流今視昔。不負好雲巒。紛華非素尚。觴咏集閒亭。照水掀髯白。看山潑眼青。會須憐暮景。應亦感晨星。勝賞輸羣彥。江聲此獨聽。

秋草

秋來無復舊萋萋。漠漠平原入望低。闌淡尙憐雙蝶舞。淒清偏恨亂蛩啼。纔零白露朝烟冷。試映青袍暮色迷。何處王孫最惆悵。瀟湘江北洞庭西。

# 湖海詩傳卷三十六

張誠

字希和，平湖人。乾隆四十二年舉人。有熙河草堂集。

蒲褐山房詩話：孝廉矜情既勝，腰腳復健，志爲五嶽之遊。登岱宗，上嵩洛，訪予于關中，直躡蓮華峯。頂與廣東馮庶常敏昌吟眺，經月始下。又欲作峨眉之行，蓋徐霞客輩流人也。性好梅，作梅花詩話，凡若干卷，搜採辯論，頗稱繁縟。

光福里探梅

早讀笠澤書，野寺得光福。輕舟背日行，曉風十里速。山色迎人新，水光泛鴨綠。孤塔遙崢嶸，一溪自迴曲。傍岸編疎籬，開門隱修竹。居人爲我言，山中絕塵俗。望衡千餘家，種梅如種穀。梅熟子可沽，梅開香不鬻。不鬻當如何，客來恣所欲。

鄧尉一帶皆單瓣白梅。至西磧始有硃砂紅、綠萼梅、玉蝶梅各種。自鄧尉下冒雨復至西磧山頂，山山不斷香，樹樹未消息。陡見斑陸離，振衣上西磧。隱隱籬落間，燦燦映朱碧。小紅桃杏色，綠萼羣仙列。東風飄靈雨，四野行人絕。余情苟信芳，塗泥寧所惜。陟岡亂雲侵，歷磴蒼蘚裂。交徑橫枝妍，倚澗芳華潔。願慙塵俗軀，遊此神仙窟。何當來買山，永結子雲宅。

包山顯慶禪寺

皮鑿美陸魯望有包山精舍詩即此

山行不知遠叢木忽蒼翠青嵐起層岡幽幽隱古寺初地肇蕭梁嘉名錫唐帝復有慈受僧結廬傳宋世寺前五株松落落擎天勢虬角不可攀龍鱗時或墜山僧頗好名竊附五柳意寺僧號五柳揖余爲余言此樹閱千載其下兩石幢中藏佛舍利剔蘚試摩挲其一本無誌其一會昌年僧契元書字字字空王言歷歷時日記唐會昌二年壬戌九月八日僧契元書佛頂尊勝陀羅尼書法絕佳頗通瘦硬神亦饒烟雲氣幸藏深山間勿爲椎拓累守拙全天眞斯理得罕譬少小慕松陵倡和金蘭契今來精舍中風流結遐企棟宇或刼灰林壑餘古致我亦烟波徒儻然願高寄

文大夫種墓

墓在臥龍山下

賜劍南陽怨未伸銀濤白馬並江神臥龍何處尋遺冢烹狗無端憶昔人敵國十年三術破故交一棹五湖春君王自有同安樂不念當初患難臣

宋大樽

字左彝號茗香仁和人乾隆四十二年舉人官國子監助教有學古集

野老

田廬聚妻子桑麻環繞之今年已七十一日無別離舉酒互勸飲頽然忘是非醉歌扣牛角牛角向我低

客從何方來。勞勞已幾時。客歸抱黃犢。此樂客自知。

臨平山安隱寺最幽。偶往遊矚。

周覽若有失。遙懷輒引領。白雲先客在。春入空山靜。松風答樵歌。蘿月帶潭影。達者能棲心。至此更深省。飲維揚酒家送客。

江上忽離別。扁舟增暮寒。猶持故人酒。莫作異鄉看。送者有時返。此行應更難。朔風吹涕淚。獨自向長安。

田家作

昨夜春風生。今朝春鳥鳴。白頭先早起。紅日好深耕。隴畝留淳古。牛羊樂太平。歸來相勞苦。勸飲更多情。

趙秉淵

字少鈍。上海人。文哲子。乾隆四十二年以難蔭改補中書。今官成都知府。有卯君初稿、小斜川叢稿。過述菴丈蒲褐山房出畫冊命題。賦呈三首。

長安羈宦客。傲屋本難定。大抵近市喧。斷無樂幽屏。城西蒲褐居。巷僻隔塵境。精廬十笏寬。窗几瑩而淨。絕似書畫船。羅列尊彝鼎。藥欄數弓地。竹樹翠交映。茶聲沸庭陰。客至淪佳茗。先生澹蕩人。欸語意閒靜。時參文字禪。結跏味彌永。道是退院僧。十年住華省。

西山窈窕容。不肯入官府。爲愛愛山人。山色滿簷戶。誰將修眉痕。收拾到毫素。朝爽夕更佳。無事頗頻拄。

空庭老槐榆。雌立狀奇古。秋花寫幽姿。作意弄媚嫵。先生笑忘言。寓目各有取。涼颺入庭柯。淒切送清響。閒階亂蛩音。落葉滿床上。吳淞舊隱居。風味記疇曩。殘陽下亭臯。閒門靜扃兩。蕭蕭打吟窗。撼撼撼虛幌。篝燈賦秋聲。此境繫懷想。今夕坐高齋。晤言動悵惘。

木果木軍營題巴兵部尼璉金江淬劍圖

我來西嶺觀軍容。和門高捲紅旗紅。行廬定省得少暇。軍諮祭酒紛過從。先生嗜古本儒雅。投筆不爲通侯封。穴中羣鼠喜觸鬪。忽爲狼狽交相誑。王師聲罪致厥討。務使荒徼消烟烽。先生躍馬任參佐。橐筆磨盾陪元戎。昨冬先掃兔一窟。短蓬零孳隨秋風。降人感涕竊有獻。一劍脫手詞何恭。先生撫之投袂起。誓以此劍齒兩兇。人心劍氣歟然合。怒欲出室鳴宵中。金川之水何縱縱。滄沙激石行如龍。臨流坐愛清見底。山光樹影交玲瓏。昔曾請纓今枕甲。以水淬劍他山攻。匣中三尺本如水。匹練躍出青芙蓉。爛於初日艷於雪。撇波化作千霄虹。橫磨十萬此其一。指揮頭白難撓鋒。我今觀畫若觀戰。便思手挽百石弓。無勇非考古有訓。竟請摩壘從諸公。鵬膏不如逆酋血。三疊三沐旌爾忠。龍身虎氣繼讚頌。倚天欲共凌崆峒。

宋謝文節公橋亭卜卦硯歌爲查榕巢先生賦

并序

宛平查太守禮得端溪古硯一。長約八寸。廣半之。額篆橋亭卜卦硯五字。背楷書宋謝侍郎硯五大字。左側鐫程文海銘曰。此石我友也。不食而堅。語有之。人心如石。不如石堅。誰似當年採薇不



食守義賢也。右側刻題字云。大明永樂丙申七月洪水。去橋亭易爲先生祠。扣地得之。閩後學趙元行書二十七字。按宋史言先生當宋亡後。入建寧唐石山。轉茶坂。寓逆旅。日麻衣草履。東向而哭。旣而賣卜建陽市中。元翰林學士程文海薦之。不起。被魏天祐逼至燕京。居憫忠寺。見壁間曹娥碑。歎曰。小女子尙知節義。我寧不汝若哉。遂不食而卒。又考福建統志。今建寧縣南門外有朝天橋。一名濯錦橋。宋紹興中築。灑水十三道。覆屋七十二間。上有謝疊山祠。與元題字脗合。則橋亭之爲朝天橋無疑矣。特先生官止江西提刑副使。史傳及輟耕錄皆同。硯背刻謝侍郎。未知何据。俟再考。太守能詩好客。有前輩風流。而是硯爲孤臣遺澤所留。宜其寶逾拱璧也。丙戌九月廿四日太守置酒邀諸先生共觀。諸先生各賦長歌。余亦爲詩。

信州城一彈丸。安仁溪一衣帶。謝公當日作逋臣。忍死須臾有母在。崎嶇轉茶坂。蜿蜒朝天橋。上有突兀之老屋。下有嗚咽之寒潮。麻衣草履貞苦節。東向飲泣無昏朝。國家金甌已傷缺。不及區區片石猶堅牢。犀紋鶴眼詎在好標格。但覺墨光黯淡和淚痕。難消垂簾聊學成都客。卜肆沈埋人莫識。遺民姓氏混塵埃。我道明夷在周易。無端空谷下旌招。不道公心介于石。瓦全玉碎各有志。豈待行藏問龜策。燕山寺中燈影孤。南冠憔悴一餓夫。碑問女子寧汝愧。抗節直與首陽徒。橋亭人去久寂寞。杜鵑啼血空模糊。滄桑轉眼五百載。殘石猶有神明扶。打城洪水漂不去。天使光怪騰泥塗。流傳何日到公手。寶之不異干璠璣。

摩挲再四誦銘字。令我懷古心縈紆。嗚呼。玉帶生。信公友。此石千秋與同壽。文山疊山兩不朽。

過綠雲菴

逕曲蹤難覓。苔生白板扉。花香入齋鉢。竹色上僧衣。梵響隨風細。鐘聲度水微。此中參靜理。愜賞欲忘歸。

瞿叔游華

寄示江村漫興詩。即用原韻奉酬。

幽棲地僻少塵埃。著屐刪花踏綠苔。水霧漸看朝雨台。林烟先向夕陽開。茶經藥錄時三復。竹塢梅坪日幾回。早晚故人倘相訪。牀頭共釀舊香醅。

春盡日寄遠

板橋細柳碧於烟。風信匆匆三月天。正是玉人春病懶。杜鵑啼到綺窗前。

徐蔣林

蘇州坡 明經屬題澱湖漁隱圖。率賦三絕句。

湖中山色烟中樹。郭外斜陽水外村。不必并刀煩剪取。儂家自有水當門。  
撲水叢蘆綠幾灣。持竿心似渚鷗閒。還應添箇漁舟小。著我烟波浩淼間。  
鱸膾蘼滑溜匙。船娘纖手白凝脂。秋來好景無多子。只在斜風細雨時。

馮培

字玉圃。號寔菴。無錫人。乾隆四十三年進士。官戶科給事中。有鶴半巢詩鈔。

瘦銅惠筆賦謝

夙昔慕著書。竹素日蒐討。脂暝而墨晨。手錄務祕寶。座間管城子。結交最傾倒。所恨才力弱。研磨謝穿縞。名如地畫餅。言類海牛棗。臨池亦未成。蛇蚓強縈繞。故人學殊富。星宿雄胸抱。興酣泚筆爲。秋實兼春藻。貽我青鏤束。爲我潤枯槁。細字鐫二行。東吳瑞符張造。段氏胡盧奇。蘇公散卓好。我指鈍於槌。銜薑鼠應惱。夢中五色花。塵土捐蕪早。年來直禁樞。橐筆軍書草。貴捷不貴工。取濡不取燥。三錢雞毛製。風雨足揮掃。番休暫歸沐。俗累苦相勦。磽确荒硯田。中書愁禿老。縱有字堪表。其奈筆難飽。雪睛牕几明。乾鵲喜清曉。抽毫試拈弄。快得麻姑爪。自浥水蟾蜍。聊用勝詩藁。

磬鍾峰

康熙間賜名俗名棒極峯

衆山連尻。雁隘而抱仙闕。其勢若奔馬。縱逸向空闊。山靈厭平坦。拔起烟霧窟。陡然石稜稜。一柱聳突兀。倒垂羚羊角。孤撐龍蛻骨。上有古石幢。屎淵字奇崛。石幢鐫屎淵帽四字。屎古戶字。見說文。淵疑卽淵字。武壘所遺日字也。帽未詳。亦不知何時所造。下瞰武列水。清秋蕩空汨。熱河卽水。經武列水。大哉造化鑪。旁礴積日月。嘉名聖人肇。傲外秀不沒。吾將學米顛。肅拜具袍笏。

辛丑歲暮得過菴手書賦呈

晴雪封疎林。寒飈吹老屋。散直逼歲除。寂寥影蜷跼。書來自柳湖。長牋四五副。喜劇挑殘檠。盟手再拜讀。

首言雖別久。禁庭遡曩躅。蝨簡袖書繁。螭毫視草速。相隨閱晨晡。共事積涼燠。回憶成昨夢。纏綿意三復。次言詞苑輩。文章非所屬。明代李何王。壇坫迭當軸。通籍皆曹司。領袖藝林伏。玉堂闕無聞。輕材空碌碌。姚深楊維姓字湮。錢吳身名辱。國朝數鉅公。聲華競馥郁。多緣郎署階。罕入瀛洲錄。勿以改官故。中懷長刺促。努力期不朽。藏山富縑竹。末言瀧阡表。窀穸就吉卜。策杖繭重轡。負土泣奔鹿。衰鬢霜雪侵。壯志風雲縮。紙窮情有餘。琅然叩哀玉。先生羣雅宗。扶輪砥時俗。筆落萬舌傳。弓衣織滇蜀。提劍出虎口。團蒲禮雞足。鑱厓徼外清。繡斧臺端肅。政成大江西。高並匡廬瀑。甄藻蒐湖海。噓枯拔巖谷。我比陳無已。歐陽實私淑。猥蒙齒牙芬。壤流附岳瀆。此風今已無。歎息鹽車服。感遇鬱難宣。古義自銘勗。何日從公遊。悵望春波綠。

聞詔予明季殉節諸臣謚恭紀

雍齒封原假。韓通傳竟遺。由來亡國社。未得表忠碑。河嶽精靈迺。春秋義例垂。易名洵曠典。異代疾風思。明政嗟解紐。難回寶鏡淪。三方無半壁。萬死有完人。頑懦遺風激。賢奸定論真。闡幽千載事。大義在君臣。

古北口

北來鎖鑰屹雄關。不斷秦城指掌間。市地風雲連紫塞。倚天屏障削青山。長河疎柳龍媒度。古戍清笳虎旅閒。何事三邊誇重鎮。只今明月挂弓彎。

寓舍偶題次申笏山副憲前輩韻

依然傲寄小軒除。門隘難容長者車。滿屋山雲新雨後。一庭塞月晚涼餘。纔過濡水無長夏。濡水卽今之灤河。已覺燕臺是故居。下直喜逢封事少。不須頻問夜何如。

抵京後寄劉退谷孫香嚴並諸同人

西風一夜落黃榆。回首興州絕塞紆。山擁百盤通虎北。水分三藏下龍芻。歸鞍乍帶邊塵色。扈蹕方誇校獵圖。諸公並隨進哨。明月臨關秋正滿。能思燕市酒人無。

馮敏昌

字伯子。號魚山。欽州人。乾隆四十三年進士。官戶部主事。

蒲褐山房詩話。魚山所居欽州。乃廣東西甯瀕海處。蓋地近安南。漢以來無文學士。魚山讀書砥行。無師而自。官庶常。改戶曹。益以攷訂核實爲事。工書能詩。名山大川。必往登涉。又修孟縣志。精確詳審。有功於金石。丁憂歸。遂不復出。聞在端溪書院。主講。從此山陬海澨。咸知古學。魚山爲之先導也。

遊龍門謁大禹廟

萬年欽禹力。千仞睹龍門。山東峰巒壯。河驚氣勢奔。晴雷冬亦奮。白日晝應昏。感激爲魚歎。眞將捍患論。氣運將開闢。山河待始終。寧墮天地性。眞作鬼神功。雲氣摩青壁。濤聲繞故宮。安瀾知有賴。感仰意何窮。

過平陸謁傅相祠

遯迹同遺老。旁求佇大賢。傅巖圖像日。殷室中興年。霖雨端由帝。星辰尙在天。精誠能陟降。且勿託神仙。  
巫相看鄰壤。巫相成父子。故里近在夏縣。阿衡得替人。如何先版築。且復事勞筋。一代君臣契。平生空乏身。驅車賸遺廟。感激動心神。

### 管世銘

字蘊山。陽湖人。乾隆四十三年進士。官至監察御史。

### 昭陵石馬歌

虬髯真人二十四。手挽黃間射機杼。白戰未嘗輕失利。出死人生憑一騎。凡鴛何能假鞭轡。蹀躞六龍天上至。拳毛白蹄特勒驃。骨相更數青騅驍。乘之陷車風雲高。盡使萬馬暗不驕。匪止褒鄂酣弓刃。次第削平諸僭逆。芻料登槽三品直。帝謂未足酬其力。肖像昭陵斲以石。過者見之猶辟易。百年天地生塵埃。鐵騎蹴踏潼關開。彷彿先帝神靈來。指揮殺賊賊氣摧。汗出浴石形穢穢。嗚呼馬兮馬兮。生能騰驥死猶怒。不負文皇顏屢顧。下視哥舒直狐兔。五雲長飛松柏路。蘚積苔深誰敢仆。廣明劫火關天數。馬亦無聲臥寒露。繭紙蘭亭落何處。

### 響泉硯

錢郎叉手詩盈卷。短什長謠無不善。更工撥墨寫秋山。十載摩挲惟一硯。硯初得之自燕市。兩宋形模半

存毀磨礪更昇藝石翁重發奇光有深理。本出端溪最上阮。蒼烟軟玉韜光精。千年溪水暗激射。背負齧缺蛟螭爭。解人因物出新意。凹凸隨形成位置。上作濺濺曲注痕。下取洶洶不平勢。勢得毫釐等千丈。几案真疑萬泉響。從此鐫銘號響泉。濠濮瀟湘落君掌。君攜此硯返華京。五上春官名未成。就中恐有卞生淚。淚滴入石同泉傾。硯乎硯乎時有待。鸚鵡青青眼常在。終當貢汝置玉堂。不使東坡擅龍尾。

送李雲岩人司馬

世傑 賜告還黔

當代封疆第一流。奮身掾史出邊陲。精勤吏事陶公贊。風厲官方晏子裘。上藥起衰馳鳳嶺。公初在四川總督任內引疾蒙賜人參一斤。安輿扶疾到龍樓。特旨用輿入直。相臣請老司徒養。謂蔡葛山曹竹墟兩先生。又見公歸擁八騶。

風葉

浙瀝西風作意侵。紛紛黃葉捲疎林。江空與鳥分帆影。山靜兼泉亂屐音。一去故枝飛不定。欲爭初地力何任。無情未得枯桑似。獨客難禁萬里心。

錢世錫

字嗣伯。秀水人。載子。乾隆四十三年進士。官編修。

蒲褐山房詩話嗣伯長於登臨行旅之作而博雅足以副之瘦硬通神不減其父晉中詩尤佳斯句亦清激聽雨云臥聞驟雨灑涼榻六月如秋枕簟清彷彿江湖宿漁艇孤蒲深處滴篷聲題絳守居園池記云樊文讀罷苦聾牙客舍青燈百感加太息綱伽老居士秋風墓樹集寒淮嘉興張彌伽曾爲之注故云。

自岢嵐往保德山行

盤盤山中路。巧作螺紋旋。將東反向西。似帆隨湘轉。上坡若挽船。蹬蹬疲驢戰。下坡如放溜。坦迤趁勢便。壁立黃土堆。突兀已厭見。不定嶺雲姿。無名野花茜。晉地何寥闊。馬蹄將踏徧。

明宣宗仿宣和筆林檎鸚鵡

隴禽調舌立畫廊。臨風頻弄縑。斂光豈如衝烟向深塢。秋露初熟林檎香。輕紅嫩黃盡佳果。不必香稻仍餘糧。雪衣踏枝枝欲動。絕自矜貴居中央。旁有綠衣如娣姒。展襟側睨蹲斜陽。物色生態乃如此。流傳繪事出尙方。宣皇御宇際熙洽。百工藝術俱精良。鬪雞磁翠瀉清醪。薰鴨銅鑄焚都梁。餞金雕盆籠蟋蟀。西川宮扇詠招涼。幾餘六法供遊戲。化國之日何舒長。猗蘭求賢況飢渴。鹽梅麴蘖資三楊。此圖偶仿宣和筆。枝枝葉葉能芬芳。神霄天子實天縱。調鉛殺粉真擅場。枇杷角鷹筆法在。不隨花石淪滄桑。青城流離亦氣數。未預浪子笑端王。金牌獨奈赤鸚鵡。來自汴水蒙風霜。舊人呼罷卜尙樂。萬歲泣下宮鬢傷。高宗在

康有大赤鸚鵡自江北來。集行在承塵上。蓋道君時宮中所畜。足有小金牌。有宣和二字。比上膳草草無樂。鸚鵡大呼卜尙樂。起方響。久之曰。卜娘子不敬萬歲。蓋汴京掌樂宮人以方響引樂。故猶以舊格相呼。高宗爲罷膳泣下。見楓窗小牖。

雪後

爐火微明老屋深。虛間空自抱冬心。山寒飢虎嘯當路。城寂栖雅懶出林。乾雪舞風停又起。凍雲漏日霽。



還陰惱人不似江鄉好。欲見梅花何處尋。

### 李鼎元

字味堂。號墨莊。綿州人。乾隆四十三年進士。官宗人府主事。有師竹齋集。

蒲褐山房詩話。梁爲西南屏水。厲山刻削而數十年來未有鍾其靈異者。近日綿州稱三李。以墨莊爲最。意沉摯。辭警拔。筮仕後。索米不足。遠遊江海。所過名山大川。發其抑鬱無聊之氣。拔地倚天。三吳士大夫以英挺自命者。未能或之先也。庚申初夏。余在武林。墨莊奉使琉球。過訪講舍。予謂君天才奇偉。又佐以域外之觀。海涵地負。當有誠心而怵目者。及使還。予已老病家居。未見所作。

### 舟發武林

三次出武林。水行道彌苦。天熱長無風。江淺耿不雨。扁舟困泥沙。動賴人夾輔。竹篙尙無濟。那復問柔艣。遙隣水中車。江上哭田甫。昨日水滿田。今日如斥鹵。江澗不及岸。車短焉足取。君看前溪中。無舟但網罟。對此心愀然。滴淚溼厚土。安得鞭睡龍。乘雲下天府。沛然作甘霖。稼穡始可睹。天乎聽不遠。感激輸肺腑。

### 石門洞觀瀑

白龍雲中翔。取水銀漢傍。水溢收不及。一落千丈強。雷聲破地出。雨氣連天長。中遭石一激。雪花霏微茫。石門洞天地。道經頗能詳。青芝產石田。語或非荒唐。我來逢九秋。淒淒風色涼。仙人隔珠簾。欲語不得將。何以洗我耳。更願湔我腸。待我俗緣盡。結茅此山岡。

### 牛頭山

日出羣木疎。山色遞晦靄。客子踏雲行。直上青天外。雄關踞牛角。江似蹄涔會。回頭望二劍。淬鋒將安賴。踵觸後來人。幾成滅頂害。四山爭向背。形勢辨襟帶。時清關吏疎。姦民或狼狽。頗聞渡口人。欺客恣狡獪。孤商休夜行。毒魚如蟒大。

朝天關

峩峩葭萌關。棧中第一隘。上壓石千尺。下截江一派。險勢過牛頭。峻極出天界。烈日掌中捧。崩雲馬頭挂。鈎梯與危磴。到此益奇怪。俯窺江上船。小若坳塘芥。五丁鑿不得。架木迹未壞。如何孟達輩。守此亦終敗。信哉險難恃。萬古一長噫。

七盤關

七盤盤入空。勢欲捫青天。路逐石角轉。人隨樹杪旋。誤入羊腸中。甘讓飛鳥先。風雲莽迴護。欲出愁無緣。嶺水一以分。隴蜀遂相懸。頗似岐路人。揮手揖馬鞭。有草烟外香。有花雨中然。好景寫不得。惆悵雲峯前。

滴水崖

人從崖下行。水自崖上落。迴風吹水飛。白雨洒林薄。馬滑進輒退。僕怨前且卻。如人大漏天。羲輪澁難託。又恐息壤移。不受五丁鑿。藤蔓正得意。層層肆纏絡。能令白晝昏。峻嶺變幽谷。真如陰險人。天或助其虐。殷勤語從者。此處防失腳。

雞頭關

雞頭高人雲。人與雲爭路。夜行山不知。險隘未全露。月落烏亂啼。林黑馬頻顧。輿夫昧高低。亂踏滑石步。悄悄盡七盤。颺颺或驚去。微聞水瀾瀾。崖深自可悟。天雞鳴一聲。回望轉生怖。失笑謝童僕。此險幸偷度。

柴關嶺

揮去青羊河。登頓上衙嶺。石齒排劍鏑。叢蔭蔽陽影。路與蛇虎爭。人挾風雲騁。重嵐溼征衣。飛泉灌客頂。山骨不受鋤。箐林獨完整。疑是叅神靈。保茲樹千挺。不然山盡禿。連理亦何幸。萬木刼連開。對此轉悲哽。

曲阜縣

我行半天下。所到探風俗。非官怨民頑。卽民怨官酷。官民本一家。胡爲心不睦。淳哉聖人鄉。禮樂尙薰沐。不取非義財。不爭無情獄。不負官吏租。不厭糜豆粥。懷刑君子心。屬饜小人腹。比戶敦廉讓。居人重耕讀。遠矣武城風。賢哉四氏族。智者擇里仁。此鄰不須卜。

出都

微祿雖云養。空文不救貧。那堪羈宦子。又作遠行人。故里歸何日。天涯寄此身。殷勤餘兩弟。菽水共艱辛。

萬仙樓

兩崖方對峙。一徑恰容樓。洞雨懸螭口。山雲絡馬頭。回看城若近。直上路仍幽。衣袖飄飄舉。翛然豁遠眸。

扇子巖

何來雲母扇。壁立插晴空。開閣陰陽異。炎涼歲月同。卽今能卻暑。終古不搖風。惟有新秋逼。凋騷起灌叢。

金星亭

絕壁疑無路。懸崖尙有亭。俯臨千澗黑。高接一天青。屋角雲常宿。簷前鳥未經。搖搖風欲墜。只合住金星。

遊雪竇

出郭緣山徑。蒼茫曉色分。鵲喧朝霽日。人踏亂峯雲。澗水澆田便。村農插稻勤。計程原不遠。午後一鐘聞。

夜直入東華門

一官未補是閒身。那更奔馳逐軟塵。折簡尙循前輩禮。看花空憶去年春。班超有志思投筆。汲黯無才嘆積薪。最悵東華門左館。卽今誰是舊詞臣。

病足

不著朝鞞且挂冠。未妨步履暫艱難。公卿本厭趨炎客。筆墨初宜耐冷官。舊歷山川來夢裏。故交風雨隔雲端。庸醫莫勸加針砭。自愛西窗臥榻寬。

蘭相如墓

相如智勇竟如何。歸壁秦庭未足多。膠柱真能知趙括。避車非是畏廉頗。千年蜀客還生慕。四尺荒墳不

忍過叱伏虎狼憑頸血，翻憐七首殺荆軻。

偶興

莫向瀛洲問謫仙，紫薇花近九重天。功名退似臨風鶴，家計清於吸露蟬。有子登科吾欲老，無財養母盜能憐。麤糲直類羊公鶴，不耐重驅到舞筵。不堪回首是流年，機事機心早棄捐。肯效季良成畫虎，漫從墨翟刻飛鳶。貧除搜句無長策，富縱多文不直錢。行輩而今皆老大，倩誰先著祖生鞭。

四月二十九日次子關官生同人集賀分得七律

庭前歡笑正談經，婢報深閨次子生。但覺有聲震<sup>平</sup>戶牖，便求無難到公卿。關心老媪先稱賀，愛我良朋更洗觥。頗笑阿翁雙鬢雪，孫猶未抱望兒成。

王元勳

字叔華，嘉定人。乾隆四十三年進士。官徐州教授。有《易圃詩鈔》。

漁父

芙蓉落秋江，蒹葭生暮色。扁舟何容與，獨釣幽岩側。纖鱗不盈筐，持竿若有得。童稚遙相呼，妻孥供晚食。鼓柁歸去來，柴門未昏黑。業微力罕勞，欲寡情易愜。悠悠涉風濤，感君徒太息。

海上觀冰山歌同毛海客賦

江南從無三尺冰。冬暖紫裘汗氣蒸。歲維辛巳月在丑。十日大寒昔未曾。北風吹海海水立。峩峩百丈隨  
堅凝。中流猶聞浪激撞。排空已見峰峻嶒。巨魚凍死尙嘔強。老龍僵臥難升騰。馮夷水仙弄寒月。髣髴夜  
半來相登。余時踏凍訪海客。驚見冰山高崩崩。陰森陰壓沃焦寒。空色明映扶桑碧。日從水底出水上。貝  
闕珠宮光倒射。雲霞不礙水晶空。峯巒皆作火齊赤。恍疑有樹挂珊瑚。誰遣圍屏雕琥珀。蜃樓海市安足  
誇。雪車冰柱徒爲役。須臾火輪埋黑雲。雷碾一聲搖乾坤。危崖中裂向夷島。斷嶺欹側連江濱。嵌空半帶  
魚鱗影。瘦削欲變波濤紋。太陰嚴凝太陽弱。消鑠日久方崩淪。平生壯觀此第一。衝寒縱覽留浹旬。直待  
東風春水發。挂帆浩蕩垂修綸。

出屏風關

行徑繞山微。陰崖凝夕霏。松風吹不斷。翠靄欲霑衣。時有林花落。遙看瀑布飛。迢迢白雲際。無計叩岩扉。

赤沙湖

八月雁南翔。湖波接混茫。水中散村落。木末度帆檣。山遠秋容淡。天低夕照黃。芳洲獨倚徙。宿莽引餘香。

漢江秋望

波光天影兩空明。雲外迢迢宿雁聲。帆帶夕陽歸夏口。山連秋色到樊城。銅鞮誰唱當時曲。鐵鎖空餘弔

古情欲訪滄浪漁父迹。濯纓閑對漢江清。

九月登憫忠寺閣同芷園作

西山晴翠滿城頭。乘興來登蕭寺樓。白雁早驚沙漠雪。黃柑遙憶洞庭秋。傳盃有客成高會。吹帽何人紀勝遊。樹下泠泠鐘磬發。夕陽寒色上茸裘。

嶧山道中

落日西風捲地寒。黛螺遠近疊晴巒。山家長在翠微住。不解行人駐馬看。

湘中雜興

垂楊垂柳滿長堤。薄霧輕烟晚更迷。三十六灣春草綠。鷓鴣聲裏夕陽低。渺渺春波鼓枻遲。蒼蒼曉色起愁思。深林杜宇啼初急。花落黃陵帝子祠。

徐大容

字莪沚。江南華亭人。乾隆四十四年舉人。有復堂詩鈔。

蒲褐山房詩話。莪沚爲文貞公九世孫。性情蕭澹。幼耽吟詠。既從沈上舍大成遊。覃精經術。一以漢魏爲師。作詩好押劇韻。盤硬語。而近體亦復嫻雅。如垂老尙虛謀。負郭吟秋無恙健。登樓不見便同千里隔。得歸已負一年間。總爲豬肝求不易。非關雞肋棄偏難。競渡已無人。盪槳憶歸應感客。登樓皆雅音也。

牀山歸自括蒼。小集伴花吟塢。以洞庭始波木葉微。脫爲韻得葉字。

良友遠客歸。握手笑開鬢。斗酒爲洗塵。盤蔬互相饅。是時秋雨霽。斜陽射城堞。涼颼颯然來。頓覺耳目懽。言念平生交。散若林中葉。而我病杜門。情興尤疲沓。得失任鷄蟲。寒暄付裘箠。已嬾鼓齊瑟。詎暇彈馮鈇。辟彼焦冥巢。所樂在蟲睫。惟餘山水懷。寤寐尙躑躅。讀君括蒼稿。快意踰抓鑷。冷烟淥波亭名凝。活翠青城名山疊。相去千里餘。展卷恍親涉。宵長秋夢多。夢弭橫江楫。

拾硯齋觀曹雲西山水畫卷

我不解畫。解讀畫。草堂四壁圖天池。徧游五岳志未遂。快意藉慰長相思。舊藏墨妙二十幅。天籟賞鑒多題辭。惜哉雲烟瞥過眼。神物聚散無常期。余家舊藏宋元人真蹟二十幅近已散佚重光之歲日長至。扁舟訪舊城南陂。主人愛客揖客坐。示我妙蹟邀題詩。開圖知出雲西手。絹素黯澹神淋漓。空江濁浪鬱渺瀰。絕壁高嶺攢屨巖。白雲遮斷最高嶺。但見蒼蒼溼霧含朝曦。草枯無全葉。樹老無全枝。危橋曲磴互掩映。中有仙人來往乘雲螭。吾聞先生昔解組。羲爻一卷常相隨。抱膝長吟意不樂。睥睨橫被羣兒嗤。偶然放筆寫異境。性靈不受雲山羈。此圖洵精妙。欲與真宰爭神奇。流傳安得入君手。摩挲儘可忘朝飢。詩成肥阿發浩歎。擾擾得失將何爲。行當拂衣謝塵埜。待畢婚嫁知何時。

游知止山莊

一徑入空翠。鞵痕破蘚斑。柳遮當戶日。花映隔溪山。僧梵青林外。漁歌淥水灣。頓忘歸路晚。相對白鷗閒。



牀山新居小集分得居字

一抹溪雲十笏居。幽尋遙指故人廬。橋通小市魚蝦賤。徑接平蕪橘柚疏。客有素心能置酒。家承先澤只備書。插籬未了栽花急。爲待春深奉板輿。

茸城雜詠

有序

壬辰冬信宿西泖邨莊。風雪竟日。擁鑪獨坐。偶詠吾郡風物。得絕句若干首。詰朝天已放晴。輟不復作。以俟它日興到續之。

卷篷船小疾於梭。柳外誰人載酒過。九曲塘西山九點。櫓聲咿軋翦春波。

熟梅時節雨冥冥。長日家家醉綠醞。聽說海鮮新上市。五更人語采花溼。鮒魚

甘欺崖密輒欺酥。淺碧輕黃隴畔鋪。柘館紅蠶新上簇。老農侵曉餉山廚。蠶豆

灘空鶴去水茫茫。廢圃猶傳篆鶴莊。記取中秋好明月。露涼清唳下迴塘。鶴

玉竇泉清流澹沱。雨華洞古氣朦朧。夕陽一角前邨遠。臥聽蕭蕭紫竹風。玉竇泉

查山山下碧淪漣。寒月泉如第二泉。賒取月團三百片。竹鑪活火手煎煎。蘭筍山

汪如洋

字潤民。號雲壑。秀水人。孟錡子。乾隆四十五年殿試第一名及第。官修撰。有葆沖書屋集。

蒲褐山房詩話：雲壑爲康古次子，與兄念孫成以文名，而雲壑和平端雅，以狀頭直上書房，爲公卿所器重，以爲安州尙書之比。其詩清圓朗潤，不爲槎枒枯瘦之習。年甫四十，遽歸道山，成親王哀其遺詩，刻於京邸。

送百泉之邗上

婀娜風穩帆，鞞驛喧鼓。詩人別我去，揮手柳陰午。平生患短視，才勝一目杜。攜書千里遊，肯學堅閉戶。西窮馬嶺巔，北飲滄洲醕。年年衣食謀，那復戀兒女。廣陵賢主人，講席春光煦。時赴蔣心餘編修之招。郵書忽相招，下榻欣有侶。及門俊髦多，樂可晨夕數。差幸作客佳，似忘離家苦。葫蘆蜀岡醉，芍藥玉鈞嫵。江山入錦囊，烟月費織組。吟筇橋廿四，歸艇秋三五。時有中秋返棹之約。後會相團圓，菱芡熟鄉土。

讀黃山谷詩疊前韻

涪翁大雅才，詩壘肅旗鼓。光芒發蒙翳，如日月當午。句奇酷追韓，律細飽參杜。豈惟窺牖牕，直已踞堂戶。蝓蚌氣味佳，咀嚼勝甘醕。手如斷獄吏，羞學簪花女。艱澁閱宦途，少荷天恩煦。坡仙遠謫身，漫叟狂歌侶。入黔復入蜀，道里天涯數。投床鼻息大，那計迤邐苦。傳稱山谷安置黔州時，卽日受命投牀，人以其賢之。造詣勉益精，筆奪江花嫵。寧同俳玩列，几席炫麗組。我詩豈其朋，組麗等俳。我詩豈其朋，組麗等俳。養丹火轉九，煉石色成五。誰歟傳此燈，吾欲醉黃土。

雙井無人后山死，只今誰子定傳燈。楊誠齋句。

十月廿四日橘頌山房小集，同補堂西潤舅氏惺渠賦木棉裘，得作字。

湖頭蘆絮飛。風信寒欲作。桁衣單袷收。卒歲婦功課。木棉熨貼宜。適體最柔悞。鋪如雪片輕。吹作雲朵大。輪碾核汰淘。槌軟花翻斂。縫裳製乃工。挾纊溫可佐。厚須銖兩勻。新戒油膩澆。敝裘三十年。毛落捉襟破。難求曝背溫。袖手苦僵坐。寬長復潦倒。得此已爲過。客來誚擁腫。吾性便嫵媚。稍禁窮袴冷。兼煖布衾臥。貂襜彼何人。被褐卽奇貨。

夏蟲篇戲仿山谷演雅體

驕陽燦水水骨倒。夏蟲隆隆肆蕻惱。蠶尊井坎利藏拙。蜂聚餼糧但娛老。簷壺罍物蟠在腹。壁蠹鈎人痛。鍼腦蛾爭烈。燄死不知。蜥守微紅爛。猶擣若狂舉。國蠅集瓜一。孕百子。蝻食稻。微歌士。蚓貴優伶。喝道花。蚊醜輿皂。蟬吞仙字。傲學究。蟻竊羶餘。羨廚媪。叩頭膺膊誠太卑。負版踉蹌亦何好。燈誇無盡可。憐螢。檄。討不然行及蚤。夕斯可死。蜉蝣癡。上若罔聞。蛾蝨禱。行泥科斗病。卽儻。重閉顛當室。誰保。螳思奮臂。轍與。讎。蝓爲充腸糞。皆寶。夫征婦歎。蟪蛄枯。父棄孩啼。果羸抱。倉中穀。蠹昧饑穰。甕裏醯。雞憎昏早。觸蠻好鬪。讎局煩。好妨失靈巫。迹掃。頗聞縊女。隨蛻蝶。或者王孫怨秋草。蟬螿居豈耐。硜硜。舴艋歸難乘。浩浩五更。露下碧無情。翳樹一蟬清。欲稿。

蔣春雨以所藏項孔彰酒甕桃花幅索題得七古一首。孔彰嘗乞酒于友人。後來索甕而甕已破。乃以此幅報之。

墨林之孫善畫兼好酒。畫日百幅酒一斗。酒乾難佐筆墨豪。不謀諸婦乞諸友。書來索甕已破。報乏瑤

瑤情則那折枝一幅聊解嘲。逸態寧容塵土澆。垂髫綽約神仙姝。淡素不買胭脂塗。殘碑剩甃少形似。酒香微潤桃腮腴。麴生烏有墨濡吻。此中已覺仙源近。請君臥甕尋醉鄉。定有漁人賦招隱。蔣君嗜古癖最深。得來此紙珍璆琳。晴窗示我玉叉挂。宛然攜酒花下吟。詩成試問花知否。花已沈酣欲墮襟。

抵滇後呈述庵先生

槐街漫刺十年殘。回首程門雪未乾。國士論知窮始信。名卿折節古猶難。棠陰忽布南天遠。萍葉知浮大海寬。萬里依然成負笈。由來奇字勝高官。

苦吟先子薄陰何。遺集編成待不磨。一序千金生死諾。三春六詔雨風和。碧雞暇湖前型美。銅雁傳觀古意多。席間出示漢銅雁足燈。云在西安時所得。感極情深詞轉拙。只如圓柳聽漁歌。吾師有三柳漁莊圖。曾令洋填買陂塘一閱。

再過燕子洞

契闊靈山乍兩年。重來仍是綵衣天。抽身皂莢黃塵外。到眼琪花碧草前。終古濤聲常作雨。經春苔印又如錢。使君不識忙閒事。偷伴孤雲一夕眠。

謹次皇十一子題太僕陳句山先生遺集後原韻

含毫三嘆渺何因。彷彿龍樓坐接茵。一日未忘師友分。半生虛現宰官身。定文辛苦秋窻雨。感舊蒼茫月榭塵。神理青山如可作。祇應合掌向天人。

贈王秋塍明府

三年梁苑隔知聞。燕市收鐙忽見君。宦跡邈迴太行道。詩篇精彩朔方軍。新嫺對面難忘酒。謂屠笏死友關心獨定文。議刻四澗小住休教行色遽。六街花事又三分。

江德量

字成嘉。號秋史。儀徵人。乾隆四十五年殿試第二人。及第。官至監察御史。

蒲褐山房詩話。秋史為賓谷從子。父子九好金石。秋史承其家學。著雅篆籀。靡不綜覽。尤工八分。所書武成王廟碑。為時所貴。兼能人物花卉。以北宋人為法。卒時年四十餘。曾注廣雅。又輯泉志。未成。日還之。歿後皆散失。詩不多作。信手而佚。蓋非其所留意也。

王少林太守藉山讀書圖

太守里居有藉山樓。官漢陽時。署據鳳山之麓。構小閣讀書。用里居舊名名之。

借書人云癡。借山事益寡。不辦買山錢。林壑寄瀟灑。結構就岩麓。徧地去榛瓦。坐我松桂扉。言念枌榆社。拄笏對雞籠。初志用自寫。吏散山翠深。一卷時復把。風細鑪篆高。花開鳥聲姪。無何別山去。載書勞車馬。青山無處無。塵埃未能捨。此卷長隨身。此山成久假。

題王樓郵先生十三本梅花書屋圖。用查初白先生韻。

花前寫真事已奇。夢裏看花誰見之。忍冬老人乃畫夢。馮鴻臚之鼎作圖心花幻出冰霜枝。歸臥草堂風日好。鶴

書不怕山靈移。前身明月來無迹。寫出情性非人爲。羅浮仙人抱冰雪。不喫梅蕊寧調飢。青羶長物幾得失。曾孫少林太守復購得。展卷觸鼻香絲絲。枯槎倒亞瘦蛟偃。春陰濃壓茅檐卑。書幌午垂石屏護。香鑪茗椀安排宜。瞿然一翁坐擁膝。清風兩鬢烟霞姿。木蘭擢安春水闊。白鬚者誰翩來遲。化百東坡影搖蕩。仙耶佛耶人誰知。寫真能寫夢中叟。神妙直是非夷思。文孫築堂踐古夢。排門釐石知爲誰。少林構堂以力者排闥。釐其石以去。且種梅花十三本。曰真曰夢皆非痴。

題時帆溪橋詩思圖

看花來北郭。訪竹過東橋。室邇人千里。溪斜水一條。開心芳草長。塵夢曉鐘消。此日披圖見。吟成膝自搖。水流雲在意。同此證初心。選石坐春晝。惜芳穿故林。別驚詩力健。豪忘酒杯深。得句時還讀。琅琅和素琴。

法式善

本名運昌。奉旨改今名。蒙烏吉氏。字開文。號時帆。蒙古正黃旗人。乾隆四十五年進士。今官侍講。有

存素堂稿。

蒲褐山房詩話。時帆自登仕版。卽以研求文獻宏獎風流爲事。故在詞垣著清秘述聞。槐廳載筆。在成均著備述錄。其餘有資典故。著而未刻者甚多。所居在厚載門北。背城面市。一畝之官。有詩龕及梧門書屋。室中收藏萬卷。間以亡書名畫。外則移竹數百本。寒聲疎影。儵然如在。岩谷間。經師文士。一藝攸長。莫不被其容接。爲詩質而不癩。清而能綺。故問字求詩者。往往滿堂滿室。

遊西山宿祕魔崖得三首

曉出西直門。一雨山如沐。亭館生新涼。林樾淨含綠。波平若無流。花光澹而縟。郊行四十里。僧寮上初旭。松濤瀉地來。爐烟墮欄角。浮屠七級圓。倒影壓山足。泉聲穿石竇。遠向峯腰束。跌坐證空明。古佛自幽獨。清夢滌珠潭。孤情聳金岫。忽聞草露香。涓涓滴衣袖。萬樹鬱差峩。駢柯矗蒼秀。偃僂烟翠中。一步一逗遛。日腳不落地。峯陰生白晝。人鳥俱無聲。松籟空音湊。三里始出林。巖際天光逗。借問採樵人。何處尋乳竇。凹凸陰晴殊。豐碑薛花膩。漑以清浮泉。隱約露文字。文字果何爲。功德讚闍寺。著語非不工。惜哉貢諛媚。我方考圖經。搜剔入巖翠。北印五百庵。一一探深闕。

六月三日邀鄉泉雲巢煦齋長河曉行看荷花。遂至極樂寺小坐。分體得五古廿四韻。

出郭荷暗薰。到門柳駢蟲。略約亘橫波。長堤界斷泐。露氣著衣冠。天光豁林麓。難期賓從賢。況際風日淑。凌晨偕四友。當暑忘三伏。客至不參禪。僧枯已如木。亭虛體自涼。水流心弗逐。殘夢破蜩蟬。閒雲曠鳥鶩。穉笋迸石塔。古蘚繡板屋。芭蕉委地陰。葡萄當牖覆。檜老粉蕭蕭。松圓濤謾謾。對面起樓臺。闌腰嵌山谷。鶴築金碧輝。螺鬢翠膏沐。讀頤秘監詩。見李將軍幅。美景觀練若。勝游期信宿。市上十丈塵。饋中三年穀。形摧路坎坷。氣折車輓轆。何如初地佳。更藉遠公築。雖乏打槳翁。尙攜持蓋僕。礙帽懸藤低。粘屐軟草馥。竹爐茶可潑。香廚葷初熟。消君碗礪胸。飽我藜苒腹。自居淡蕩人。略享清淨福。開窻看西山。萬朵芙蓉簇。

讀王鐵夫芭孫孝廉楞伽山房近詩。併其室人曹墨琴近作賦。

亦是人間語。塵埃一點無。曠懷小天地。好句滿江湖。入夜雁聲苦。到秋山影孤。櫻桃風味好。慎勿戀伊蒲。

韓城相國爲孝廉題櫻桃館額。

取我淡花句。余近有淡花開不濃句爲孝廉所賞。較君孤月詞。君近贈琢堂有月白孤清甫自疏之句。情懷各無賴。風雨輒相思。苔尚綠雙屐。

菊剛黃半籬。到門認秋水。隔水是茅茨。

黃葉打門響。青山生暮寒。秋烟淡茶塢。墨氣出花欄。貧賤交心易。文章造命難。詩成在驢背。趁爾未爲官。豈但酒謀婦。併能詩佐君。房中結鷓侶。世上重鸞羣。搖筆柳飛雪。下簾蘆破雲。慚余老妻拙。畫紙不成文。

雨後游極樂寺贈誠上人

徑滑還支石上筇。蘿門盡日碧苔封。兩三竿竹自秋色。千萬疊山皆雨容。詩卷涼生禪榻早。茶爐香壓佛花濃。煩君倒瀉天河水。一洗人間芥蒂胸。

同陸璞堂學士程東冶侍讀江秋史編修集許秋巖前輩秋水閣

一縷茶烟漾曉櫂。海棠風裏度清明。空齋倦客江湖夢。短巷斜陽鳥雀聲。呼酒不妨新月上。捲簾恰好晚春晴。西園下直吟詩慣。感我聽鐘十載情。令弟石泉編修曾於下直日吟詩十聽鐘書屋今已下世矣。

吳樹萱

字少齋。吳縣人。俊弟。乾隆四十五年進士。官四川□□道。有霽春堂集。



武昌城南泛舟至東湖驛

武昌城頭月初落。黃鶴磯邊浪不惡。傍巖樓閣映參差。重來好與黃花約。烟巒揖讓送人行。便有湖光映面清。菱蒲菱芡足秋色。鷺鷥點破江天晴。平生慣與烟水習。舍陸而舟意頗得。宛轉溪橋畫不如。兩岸浮嵐翠欲滴。白蘋風起浪吹花。欸乃聲中放客槎。回頭笑指晴川渡。無數估帆明落霞。

蒼溪

雞聲出茅屋。始信到蒼溪。荒戍仍烽火。孤城急鼓鼙。江流來劍北。秋色遠巴西。橘柚人烟外。霜華滿石梯。臨江試院夜吟

觀音巖

坂折捫蘿上。巖高拄杖看。仰天窺一線。匝地走千盤。樹古雲裁葉。江晴雪滿灘。花飛吹不到。叢翠擁諸巒。癸丑立秋日署齋歡讌翌日將有漢嘉之行適秋汀遣人致善吹笛者詩以付之。一聲吹裂萬山秋。月魄雲容韻裏收。我是江城舊何遜。落梅根觸故鄉愁。

謝振定

字薌泉。湘鄉人。乾隆四十五年進士。官至監察御史。有雲將山草。

蒲褐山房詩話。蘇泉在御史臺。經城道。遇勢家奴車。服侈麗。且相抗。乃鞭責之。焚其車。事聞吏議弗善也。既罷官。性好山水。爲東南汗漫游。嘗訪予青溪。以病未見。乃歷五茸三泖。過嘉禾。至西湖。又渡曹娥江。覽鑑湖。載山之勝。所至士大夫虛左迎之。酣暢淋漓。酒痕墨瀋。中獲具寸紙。珍爲拱璧。

胥門舟中晤唐陶山夜話

送君舟中別。癸丑歲。路河送別。復此舟中遇。各各看鬢毛。意氣尙如故。幾年雙鯉魚。纏綿道積愆。交永言可深。疊

唱詩無數。自我淮南來。凌風欲飛渡。終焉隔帶水。盈盈有餘慕。萍蓬感東西。鷓鴣變朝暮。宦拙君所同。蓄意無由訴。我今釋重負。揮手謝鷗鷺。一舟汗漫行。雙屐雲嵐布。訪戴心所先。把袂忽一晤。君來非我夢。尋巧相赴。宵寒燭屢跋。瑣碎誦新句。遊蹤述髣髴。略領江山趣。遲我垂虹橋。十日酒中住。

遊吼山

放棹來繞門。尋幽過臯步。清漣淨如拭。白鷗宛相赴。舟從石洞穿。人向竹陰駐。迎客僧赤腳。彳亍導先路。遊鱗臥澄波。野鳥弄圓喙。嶄然見山骨。壁立空依附。萬笏排雲霄。一拳挺烟霧。玲瓏露圭角。堂皇出奧阼。迷離斧鑿痕。千載苔蘚護。匠斲本無意。極目發奇趣。更尋龍首巖。飛泉迸甘澍。跳珠落千尺。觸石有餘怒。緬昔石簣翁。於茲寫心素。矯首懷東山。長嘯獨欣慕。

郊行

看山忘遠近。躡屐破溪烟。雨足分秧水。風清曬麥天。機聲出茅屋。花氣上漁船。信美滄洲趣。環村叫杜鵑。

碧霞元君祠

作配青圭肅。凌空絳節飄。陰陽雙氣合。風雨萬靈朝。玉女泉猶冽。銅碑字半銷。儵然塵慮淨。清磬滿雲椒。

吳蔚光

字愬甫。號竹橋。昭文人。乾隆四十五年進士。官禮部主事。有素修堂集。

蒲褐山房詩話。竹橋初登詞館。繼改儀曹。志尚幽閒。即辭華臚。既而詰屬總制湖湘。門盈蘭綺。而向禽之志。彌專。箕穎之情。愈切。草研文史。嘯傲湖山。跌宕琴樽。搜羅書畫。且與門人鮑叔冶等。及女士席佩蘭。風宛仙。弦詩讀畫。粉墨淋漓。吾谷雲深。尚湖春暖。人誇雅集。望比臞仙。故發為著撰。莫不刻羽引商。揚風挖雅。佳句如江城遠笛。秋風早山。館疎燈夜。雨多半湖。流水青通市。十里垂楊綠。到城捲幔榴花紅。有醖浮杯。莖葉碧生香。想溫小盞。思題竹行。熟迴塘為看花。水氣陰涼。將做午。山情平淡。怡逢秋。逢花客有留連意。對月人多太息聲。夢裏驅健歌白石。醉中薰麝寫烏絲。貫來綠酒。堪為國畫出青山。可當家。天寒睡怯。孤衾重。夜雨吟食小閣幽。落花聲氣。簾櫳悄。門若時光。几格幽。斜陽簾幕圍爐話。殘雪樓臺擁絮吟。長日一筒荷葉酒。豐年萬頃稻花香。千古功名春夜夢。半生交友曉天星。紅雨半簾飛。蛺蝶綠雲千葉蓋。鴛鴦空江短。權春波色。小院重簾暮。雨聲風緣未了。時開卷。舊侶無多日。掩關雖畫以旗亭之壁。寫以蜀錦之箋。殆不能窮也。

曉出西郭

初噉麗陽林。微靄冒幽巘。稍聆谷鳥喧。倏覲曙光顯。縱櫂聊逶迤。褰裾信繾綣。理洽慮自輕。意豁境逾緬。平田前畀陳。曲溆後環轉。習習惠風爽。曖曖鮮雲衍。修儵鑒沈浮。崇蘭汎舒卷。感茲芳序延。一獲冲期展。撫景申長謠。忘形從所遣。

三月三日

良辰際元巳。令節屆春作。靈雨渙瑤流。鮮飈扇珠萼。命駕循芳林。袞裳踐蘅薄。園楊旣群祥。山桃逾灼灼。文蔓纈繁蕤。明玕坼疏籜。睨皖鶯止邱。頡頏燕巢幕。紫鱗或負萍。紅蠶亦棲箔。緬彼風浴蹤。睠茲祓禊約。奉劍徵西河。流觴紀東洛。采艾心徒拳。握蘭懷偶托。樂矣庶毋荒。詠哉勿相謔。

攔江礮

衆礮歸風湍。疊石攢怪蝟。茲爲水所吞。江腹森戟鏃。汨汨疑爛糜。陰火日煎沸。疾流旣齋淪。縈波復溶瀾。防之不及防。與舟爲鏃礮。太行鬱屨屨。孟門瀉瀾瀾。險巖在日睫。睹者得先戒。禍機發于陰。斯害小而大。動作苟或疏。一觸臭厥載。巨川無安瀾。激盪繁變態。利涉宜中孚。旣濟發深喟。

小孤山

豫章山童然。岷岫半成禿。小孤涌江心。秀削獨者屬。亭亭麻姑紉。一髻挽膏沐。俯照籀鏡光。羣娥影粗俗。又如坼泥笱。春町翠高矗。其巔駢幽篁。娟淨染蛾綠。刷紫啟戶闌。梯青架樓屋。盤旋上下層。宛入老螺殼。烏鴉百千棲。黝色點犖确。物蠢知所止。或啄而或鷓。茲峰實瓌特。靈氣日照育。水澤交滄澄。林木紛潤黠。宜有神示司。秩禮視嶽瀆。珠幢建飄揚。羽葆衛肅穆。云胡異見聞。冠以女郎目。逝矣塵網牽。沿洄傍隈澳。擊汰行倭遲。弭旂睇綿貌。申章寓長謠。瀚雪庶無辱。迴瞰澎浪礮。壁立自赧駁。

道士洑

峯者爲山。隄夷者爲山腹。迤者左右翼。是爲山股足。前頰而後仰。宛然道士伏。鞠躄滄江濱。詰屈悍流瀆。舟上與水爭。若車鏗其軸。十進九成退。以風鼓之速。舟師健於虎。至此牛殼棘。攝魄歸一心。貫精入雙目。得濟罷驚悸。過涉興怨讟。吁嗟山有靈。千禩長蒲服。坐令行旅人。所遇頽頽蹙。天閭高九重。曷不飛片牘。剗平成康莊。錫我蒸黎福。

由祁門登陸至魚亭

宿烟屯修嶺。新漲馳迴谿。蒼蒼灌木陰。錯以榮麥畦。結翠下作塔。散金上成蹊。黎明發輿轎。辣闢鳴春泥。林風巾獵獵。嵐霧衣裊裊。前梯松岳高。後繩蘿坂低。行者如龍游。止者如雞栖。午餐見澄霽。日出景已西。閒花有千笑。幽鳥非一啼。行瞻百里道。砥平渺埃壑。或橐而或囊。或負而或攜。履坦緬遺澤。自祁門至魚亭路八十里。皆先伯祖倡募修成。矧彼頽與黎。極盛重所繼。務塞衆口詆。解裝及魚亭。延緣狎鳧鷺。

錢忠懿王金塗塔一版。縱二寸有奇。橫約寸半。陽面佛象已漶不可析。其陰有吳越國王錢宏俶敬造八萬四千寶塔乙卯歲記十九字。記下別有人字。蓋編次意也。按曝書亭集誌此。譌稱武肅者。竹垞翁實未之見。故繫元周方泉詩於後爲據。周詩但從如來捨身象起議。亦未確指爲忠懿。今可以證其失矣。趙味辛舍人攜出眎客。前輩翁覃溪學士因揚數十紙。并作長歌。學士語余。塔本四版。上函以蓋。友人曩于陝中睹之。樵製旣多。流傳在世。茲特一中之一耳。余分所拓歸。展玩

不足亦成是章。

五材民並用。誰能去者兵。嗚呼八萬四千塔。如九州鐵錯鑄成。武肅當年賜金券。衣錦軍歌息征戰。誰詠鍾馗擊鬼圖。廢立先囚義和院。文德迎來重襲封。淮南江北助交鋒。賚兼羊馬恩原渥。獻盡珍奇禮最恭。荆楚諸邦歸命逼。孤危難仗空王力。風景河山幾百年。一朝舉族留京國。不知此實何時造。紀歲分明維乙卯。得非赤堇銅。或是嶺南寶。青蓮座下狻猊獸。紫竹林中鸚鵡鳥。摹倣寫狀髣髴存。龍女善財爭拜禱。應在太平興國前。遣還兩浙喜欣然。買燈正散中朝綺。唱簿方收小戶錢。欲懺世尊銷怨讎。裝炭營鑪。高爇浮屠七級將。毋同後代猶聞呼保俶。一片聲疑替戾岡。朱斑綠駁出空囊。低眉欲現慈悲相。透頂虛生智慧光。何如盡變犁與鍤。蚌甲韜戈事耕作。

抵家四首疊用梅岑韻

自信平生少宦情。對山臨水眼偏明。策科幸脫今生累。詩卷慵沾後世名。閭里不須猜畫錦。階庭猶得趁冬晴。殘年光景蠹收取。唱櫓歌舂到處聲。

燈火連宵笑語譁。車塵馬勃隔東華。傳臚典大從頭數。省覲期寬放口誇。一壑一邱惟汝置。半村半郭本吾家。棉輕粥煖都行樂。除卻當前事恐賒。

芭籬短短約疎疎。嗚犬栖雞識敵廬。排日工夫花重護。漏春消息柳先舒。香風深巷鄰開兔。膏雨平疇客

荷鋤懸想來年春更好。長吟遠眺定容予。  
扉屨逕掃自翛然。何必園稱小輞川。小輞川錢秀峰侍御園居。瓊屑久憑妻與子。荒唐終斥佛兼仙。碧芹翠韭還鄉味。紅橘金柑度歲天。只媿曩遊筋力憊。已難親蒔隔谿田。

### 錢塘

字禹美。號學淵。嘉定人。乾隆四十五年進士。官江寧教授。有鶴原詩草。

### 定林寺夜起

夢覺聞寒鐘。起行向晏谷。草逕露氣深。流螢點修竹。宿鳥栖忽驚。山泉斷還續。余心憺無事。徙倚至明旭。

### 入室

房室總帷寒。燈火炤虛位。平生一杯酒。銜哀爲汝醉。依依外老姑。憐我面蕉萃。謂我幸自遣。生者固有逝。卽看兒孀好。甥意已可慰。回指帳底女。少小聰明最。殷勤勸我歡。語罷亦拭淚。秉燭遂至曙。愴恨不能寐。

### 倪雲林山水巨幅歌

野夫春晴獨微步。有客扶筇訪村路。登堂爲贈倪迂畫。入眼林巒莽盤互。水墨雖黯淡。蕭爽見天趣。漫漫秋空雲。揮洒滿縑素。恍疑置我蒼梧元圃間。不然定是華壇赤城舊遊處。遠天極目磨青銅。曉嵐無際雲溶溶。游氛淨掃初日出。翠巖縹緲浮晴空。暑間一瀑布。蜿蜒赴壑疑奔龍。衝林激石直下不知幾千丈。但

覺耳邊眩轉生雷風。山下艸屋結構同。誅茅應是桑苧翁。數家屋壁互依倚。只有向背無西東。是時秋老霜正濃。門前颯颯脫葉紅。得非湘江二女偶過此。至今斑竹留寒叢。倪迂澹蕩人。托跡山水縣。生平幾兩屐。爛漫恣登踐。豈惟邱壑畫作殊。跌宕襟期總堪羨。雪句灘頭放棹回。銅官山畔支筇遍。雲林堂。朱陽館。禪榻隱囊伴清燕。我獨何爲負前願。碧樹紅泉日待人。青鞵布襪行當辦。

九日同嚴冬友諸景雲王少陵汪緝青楊上玉畢文瀾金宋瑞登冶城山

時序易摧謝。江山感物華。百年幾令節。名士半離家。地迴日沈樹。天寒鴈落沙。空憐一罇酒。寂寞伴黃花。

夕次小赤壁下

孤櫂沙頭泊。西風蘆荻稀。晚潮隨月上。獨鳥傍船飛。樵唱歸林薄。禪燈出翠微。山村搖落候。處處搗寒衣。

春半

紅紫尙無信。萋萋綠漸遙。嫩寒歸柳陌。微雨及花朝。白舫隄邊水。青旗渡口橋。賣餠時節近。幾處有吹簫。

送江月溥歸黃山

聞發滄洲興。飄然問去程。寒波歸故國。短棹背孤城。山近雙臺峻。江連七里清。鐘聲雲際落。帆影鏡中行。翠嶂天都境。丹爐軒后名。未能同眺覽。相送獨含情。

寄諸佃楞



虎尾羊腸事可驚。頻年憂患苦相嬰。絕交豈敢如朱穆。入世誰當恕禰衡。慷慨帶刀豪士氣。蒼涼擊筑酒人情。過都一蹶非無爲。習坎由來未易行。依然落落吐長虹。增繳何妨到冥鴻。高臥樓頭元意氣。倦居跨下亦英雄。命宮磨蝎三生定。身世藩羝一笑空。多謝故人相慰藉。阮生未擬哭途窮。

沈周畫

幾家茅屋接漁灣。櫺隔松林夕照間。憶得卸帆亭畔望。晚烟紅樹皖公山。

程際盛

原名炎。字煥若。號東冶。長洲人。乾隆四十五年進士。官至監察御史。有稻香樓集。

蒲鞵山房詩話。東治由舍人涖歷蘭臺。奉職三十餘年。退食而歸。掩關卻掃。惟以汲古窮經爲務。所著有說文古語考。禮記古訓考。周禮故書攷儀禮古文今文考。駢字分牋。續方言補。清河偶鈔。皆有功于學者。居京日久。故不爲吳上所深知。然繼朱伯原俞玉吾之遺軌者。非君奚屬。作詩曾問業於歸愚宗伯。綽有唐音。

夜泊燕子磯

江冥不可渡。江風淒以肅。亭橈向石磯。正傍青山麓。紅樹隱遙汀。蒼烟辨崖屋。絕壁聳千尋。窈窕結寒綠。驚濤夜有聲。觸石浪仍伏。扣舷不能寐。遐景載欣矚。徘徊沙月生。泠泠葦花曲。明日挂帆行。孤舟何處宿。

舟次青陽雪

孤艇泝烟流。朔風凍雲木。霰急灑烏篷。雪深壓茅屋。杳鶴入晴川。淪漣淡溪曲。湖雲結空青。林樹聳寒綠。沙灘驚雁飛。木杪歸鴉宿。數葢圻寒梅。千重映修竹。旅客契靜心。虛舟空羈束。山陰興未乘。秦隴恣遐矚。渺渺暮歸人。悠悠屏塵俗。

暨陽歸舟懷葉麗農

離羣別鶴悵何依。水色蒼茫烟靄微。斜日風高潮正落。暮寒酒冷雪初飛。浪遊泛泛歸心切。去路迢迢旅夢稀。卻憶荒園梅幾樹。幽香知已拂人衣。

消夏次王西莊先生韻

蘭草侵堦嬾未芟。此身長暑散人衙。竹花細影浮湘簟。蕉葉清芬滿葛衫。靜坐團蒲聽梵語。閒凭方罍拭碁函。不愁繫日長繩少。午景遲遲度翠巖。薰風習習動微涼。十畝青瑤傍草堂。紫筍新煎浮竹色。紅蓮早熟半松香。蕭疎境別如濠濮。嬾慢人過盡惠莊。一枕羲皇高隱几。悠然曉夢落瀟湘。

陸伯焜

字重暉。號璞堂。青浦人。乾隆四十五年進士。官至浙江按察使。有玉笥山房詩鈔。

虎邱晚憩同竹嶼麗農泛月歸

理策尋林邱。天寒氣候變。入寺霜葉飛。聞鐘棲鳥散。涼烟空翠交。夕霽明霞亂。旛影護香壇。松陰靜僧院。開軒有餘清。孤懷自舒卷。泠然竹間琴。飛泉注幽澗。華月升林端。陰崕延夕景。鳴禽戛風籟。修竹亂人影。流目興未闌。揚舲夜方永。野橋俯晴川。游鱗動浮荇。水氣生夕涼。停琴酒初醒。卻眺翠微間。蒼蒼亂烟暝。

### 華山

蒼蒼嵐翠濃。浙浙商籟肅。泠泠御風行。杳杳孤雲逐。單椒秀華趺。秋容若新沐。石牀枕雲棧。鳥道入林曲。竹木暗四山。往來稀樵牧。絕壁劖空青。方池淨寒綠。天籟流笙竽。風泉韻琴筑。林響蒼鼠竄。梵靜馴猿伏。懷新無近尋。賞異得遠目。雲影晃游氛。山花媚幽獨。我聞千葉蓮。服食可辟穀。何如謝聲聞。松陰紀茆屋。

### 晚憩法螺

侵晨越華跗。畢景向雲闕。林壑非預期。秀色紛攬結。丹梯歷由旬。碧徑知幾折。金地圍微瀾。瑤壇翳深樾。稍聞烟外鐘。已露松間月。嵐陰夕復佳。定香晚初歇。泠泠千花鈴。流響入寥泐。晏坐生道心。習靜味禪悅。一鼓風中琴。微雲自超忽。

### 白雲泉

山半聞清音。偶隨石林轉。文瀾蕩晴暉。絕壁架雲厂。銀華滴千乳。雪竇穿一線。陰崕漱寒玉。月壑澄素練。

潛虬靈瀟灑。觸石碎珠濺。浮采自晶瑩。回光亦凌亂。冥心憺忘歸。水觀有餘戀。

題王繹如山窻掃葉圖

天宇澹寥閭。山齋遠塵市。商聲入林葉。械械墮階屺。紛然掃更落。校書差可擬。之子愛三餘。丹黃勘圖史。豈徒注蟲魚。亦欲辨亥豕。佔畢啗腐儒。俗學陋穰秕。慎莫享敝帚。譚藝自今始。

春愁次韻寄熊筠湄

峭寒如水柳如絲。觸忤閑愁只自知。一夜餞春啼鳩後。五更殘醉落花時。綠波南浦天涯路。芳草西堂夢裏詩。惜別懷人苦無緒。好憑魚素爲開眉。

消夏

連朝梅雨漲魚缸。分得吳淞水半江。高樹受風涼入戶。疎簾障日靜當窻。雲開忽現青螺九。烟暝還翹白鷺雙。好趁晚來明鏡裏。菱荷香泛木蘭艫。苔痕侵徑不教芟。一室觀心便隔凡。草際暗蜚鳴絡緯。庭陰清露滴松杉。偶思小憩揮蕉扇。漸覺新涼透葛衫。忽憶玉堂天上境。條冰久已換頭銜。

史國華

字濟寰。溧陽人。乾隆四十五年進士。官至吏部員外郎。有石淙山房詩。

蒲褐山房詩話濟寰爲相國史文靖公從孫王子子主順天鄉試濟寰爲同考官望之溫然卽之冲然與子譚藝極爲相得惜年僅中歲而歿集中五言如山光隨短棹燈影送寒潮疎砧欺短夢老樹入新秋溼烟分燕尾小砌長龍須種蕉宵聽雨採藥曉穿雲石邊泉脉細松下竹門深七言如山雲帶溼蒸茅屋溪雨添肥漲小橋當徑草深寒食雨衝簾燕怯杏花風日影半從窗外過鳥聲多自樹間來野水陂塘雙燕影落花門巷亂鶯聲池紫細浪迴魚網柳暗深村映酒旗皆有晚唐風味

### 送陳賡山歸山陽

夫子淮南去添人十日愁。帆開黃葉雨江冷白蘋秋。是處才名噪相逢氣誼投。田園歸固好何以慰離憂。

### 小築

小築向江干秋光祇獨看。片雲高岫溼一雨暮春寒。烟火伍茅舍琴書靜藥園。幽棲無客到隨分著衣冠。

### 深溪邨居卽景

我愛佳山水乘閒到古村。好峯圍屋角野逕入雲根。生計依茶筍家居聚子孫。淳風安簡樸披褐道爲尊。

### 雲陽驛

雙槳凌風出潤州雲陽百里片時收。練塘四面圍村隴建業千峯對戍樓。估客帆檣停夕照江城鼓角壯新秋。潮聲早晚曾經此古驛扁舟起暮愁。

### 江行

扁舟直上接空冥山勢盤旋四面青。十幅蒲帆衝細雨一江秋水盪寒星。花深蘆荻高人隱味熟蓴鱸客

夢醒。最是旅愁消未得。寒鴻淒楚不堪聽。

# 湖海詩傳卷三十七

楊揆

字荔裳。金匱人。乾隆四十五年召試。賜舉人。官至四川布政使。贈太常寺卿。有桐華吟館詩稿。  
蒲褐山房詩話。荔裳借其伯兄才雄藻密。世號二難。張千層之錦繡。八尺之珊瑚。其爲貴重。無以逾也。然蓉裳既已黃巾青幘。著績岩壘。而荔裳復以礪門而外出塞數千里。耳目所見。得未曾有。與前代文人。簪毫佩玉。雍雍華要者不同。蓋造化奧區。久而必發。而窮荒戰地。自嘉州昌黎之後。紀載無多。天或借翰墨以發其奇。兩君遭際。洵非偶然。宜閱之者如游絕域。如讀異書也。

熊耳山

名山古熊耳。禹跡詳紀載。嶙峋勢如蹲。嵩華屹相對。衆峯互迴抱。百里分向背。中見雙崖披。半壁色純黛。車輪愁欲脫。馬力行苦憊。摩空磴道盤。危步履齒礙。疎花坼林紅。驚羽隨巖翠。下視浮濠流。出澗僅如帶。隨山三百折。始與洛水匯。中原苦平衍。到此意殊快。全秦收不得。奇杏落關外。長空捲層陰。絕壑忽晝晦。飛雲入太行。流影過衣袂。因知二陵近。風雨如有待。循途陟高岡。勇進非敢退。投足得山坳。漫告僕夫瘁。

青海道中

朝從青海行。暮傍青海宿。平野浩茫茫。隆冬氣何肅。懸軍通間道。萬騎誇拙速。嚴霜拂大旗。邊聲動哀角。飛沙怒盤旋。迎面驟如雹。時當澤腹堅。海水沍而涸。層冰搖光晶。黯慘一片綠。或聞大聲發。凍折千丈玉。

中流起危峯。勢可俯喬嶽。將傾未傾雲。欲飛不飛瀑。云是太古雪。壓壘如駮塚。出沒罔象形。吐納蛟蜃毒。西荒此巨浸。洪流所瀦蒼。卑乘百戰地。秦漢尙遺鏃。蕭蕭古壘平。兀兀邊牆矗。青燐風焰小。白骨苔花駁。夜深駐戎帳。凍土徧境埆。冷月懸一鈎。荒荒墮厓谷。嗟哉征戍士。辛苦離鄉曲。試聽青海頭。煩冤鬼猶哭。

皮船

剝木製爲舟。利用涉水可。大如輻輳航。小或艇與舸。駕風蒲帆揚。沿流篾繩鎖。指迷師用箒。躡險工喚柁。今來藏江側。厲揭測誠叵。洪濤奔奔翻。巨石聳破礮。番人誇蕩舟。舟小殊眇麼。外圓裁皮蒙。中虛截竹荷。淺類筥可盛。欬訝筐欲簸。著足當中央。俯身戒側左。形模嗤渾沌。軀壳僅螺贏。傍岸任孤行。邀人祇雙坐。俄驚層波掀。真擬一壺妥。駭耳聲錚鏘。眩眼勢崑仞。附毛識命輕。存鞞嗟身瘳。相觸心毋褊。羣爭指休墮。微生慣江湖。到此良坎埆。尙從魚腹吞。寧殊馬革裹。曾聞慧海航。止泛蓮花朵。彼岸幸非遙。津梁勿慵惰。

索橋

山行阻洪流。深廣詎可越。兩崖兀相望。怪石起齧峯。飛空架索橋。鎖鈕危欲絕。曳踵窘不前。森然豎毛髮。宛宛虹舒腰。落落蛻蛻骨。迴疑匹練鋪。窄抵長繩拽。誰遣高梯橫。莫挽巨篋脫。翻風乍飛鷲。緣雲更馳鷹。手法朽索捫。足苦縮版裂。前行不得縱。後武寧許突。俯視逆流迸。疾較飛電掣。天矯龍尾垂。凌亂雁齒缺。驅鼉旣難憑。駕鵠苦乏術。拄杖神魂魂。褰裳趾兀兀。杠非多月成。繩豈太古結。艱危信多端。絕險誰所設。



行矣勿回顧。中道未容輟。側聽步虛聲。長吟踏搖闋。柱敢馬卿題。馭比王尊叱。一墜無百年。登陸股猶慄。

魯工喇屬達隆宗

稜稜聳石角。設險抵劍門。雪霰零其巔。草木亦不蕃。徑仄復斜注。僅有屐迹存。冰柱森槎枿。袖手莫敢捫。願借九火輪。畀以一炬燔。庶使窮谷底。飛灰轉春溫。此志寧易遂。徒與愚公論。拄杖三歎息。誰爲收驚魂。

丹達山路逕奇險。上有雪城山。神屢著靈異。奏列祀典。

昔聞茲山奇。絕險今始遘。玉龍何之而。勢欲與天鬪。連峯排岬嶠。寒色逼金宿。突兀窮荒中。陽和不能透。想當鴻蒙闢。鉅手出極構。石稜間缺齧。嵌空琢氷甃。一片玻璃光。千斛瓊屑糅。陰風中怒號。虛響沸岩竇。行旅慘不前。十步九顛覆。勇上未盈尺。陡落千丈溜。躑躅馬脫蹄。毳毳鳥縮喙。有時朝日開。如熨綃縠縷。乍晴相激射。到眼胥眩瞽。我尋西荒經。險阻亦旣覩。信知九州遙。豈爲五嶽囿。何圖歸程急。到此空引脰。人言山之神。靈爽茲妥侑。陰霾變倏忽。窈冥失旦晷。來從萬玉妃。旋轉飄綺袖。築雪如作城。森寒巨靈守。時虞長圍壓。誰敢孤軍逗。狂飈一倒吹。萬牛盡回首。往往昏黑中。不復辨崖岫。倏見神燈迎。出險相引救。我行日亭午。千洞鳴玉漱。幸值氣暄和。謂爲神所祐。心怯卦習坎。事喜象遇姤。整衣拜叢祠。兼以村酒酌。視秩少桓圭。升香無玉豆。作詩誌茲行。用當神弦奏。

飛越嶺屬清溪縣

沈黎古邊郡。頗覺山水惡。凌晨過清溪。迎面聳厓峒。元和置縣廢。遺址失城郭。巋然峻嶺存。拔地上寥廓。艱危扳石磴。百折勢礚礚。陰霾慘冥冥。蜚廉肆威虐。囚澗伏蛟蜃。騰空斷雕鷲。茗亭見邛峽。修坂天際落。蝮蛇何藁藁。吐瘴昏且錯。毒厲能中人。奚敢試徒搏。其巔尤峻嶒。虹棟構飛閣。莽莽控番夷。天然設局鑰。西陲倚屏障。造化非苟作。險可一夫守。隘豈五丁鑿。經春霜威嚴。不夜燐火爍。叢灌走魑魅。穹岫嘯猿猱。平生跳盪心。顧盼成駭愕。著足藉蟠藤。捫手怯朽索。我欲圖真形。放筆寫岩壑。縹緲無端倪。方壺定慚作。

星宿海歌

卽火敦腦兒

平沙浩浩不無垠。黃霧四塞長風翻。憑高極眎目眩眴。漭泆巨浸圻混元。誰歟遠佩囊與鞬。直跨地首摩天根。十步九折愁攀投。瘴烟黯澹旂旗旛。我聞導河出崑崙。貫納忽蘭兼赤賓。寧知一脈遐荒存。灑氣磅礴相吐吞。皇輿地載窮垓垠。祀典崇列於蠻尊。陳以卣鬯投犧豚。遠超岳瀆陵厚坤。百泓所進萬馬奔。泡汨汨還渾渾。沮洳泐泐失曉昏。高瀉直欲浮中原。巨靈伸掌不敢捫。蓄束幸藉山爲門。陽烏味縮鼈足蹲。下穴龍蜃蛟鼉龜。雄吐雌吟卵育繁。欲出不可層波掀。霜飈中夜迷征幡。衆星倒景何焯焯。車舍旛積勾陳垣。大若懸瓿小覆罇。分野莫辨牛斗痕。有時天際生朝暉。白毫萬丈慘不溫。玉龍露脊遙蜿蜒。乃是太古堅冰嶠。漢家使者辭帝闈。遠過大夏經烏孫。枯槎安得通星源。沐日浴月搖心魂。鑿空或者乘鵬鷖。我行陟險隨戎軒。弓刀列帳千軍屯。窮冬草落山頂髡。斧冰鑿雪勞炮燔。馬蹄半脫驪與駮。車軸全折輓

與軌清角夜奏同哀猿。壯士僵立愁還轅。何如排風驅九鯤。手握斗柄凌雲霧。下瞰大澤如盎盆。倘遇博望母卮言。

聞伏羌警

三月家書斷。迢遙盼隴雲。塵魚甘寂莫。風鶴又傳聞。蕃部初飛檄。蕭關已勒軍。山城如斗大。雉堞遍妖氛。誓衆眞倉猝。何曾習鼓鼙。當衝臨渭北。走險遏洮西。乍放空營鷁。俄聞半夜雞。儒生心力弱。何計戮鯨鯢。聞說金城畔。籌邊昔有樓。旌麾煩上相。劍槊領通侯。好待援兵集。還看壯志酬。長宵占月暈。遠照海西頭。

辛亥冬子從嘉勇公相出師衛藏取道甘肅時伯兄官靈州牧適以稽查臺站馳赴湟中取別同賦並示三弟

彈指三年別。相逢却黯然。煩君馳驛騎。慰我事戎旃。禁旅風行速。軍書火急傳。天寒隴水出。塞正濺濺。聞道烏斯國。遙連舍衛城。談空惟選佛。縱敵竟銷兵。搜括徒輸幣。跳梁敢悔盟。皇威震重譯。蕞爾漫縱橫。上相承方略。專征大纛開。銀刀嚴部伍。玉帳許趨陪。愧未工蠻語。何能辨劫灰。梯山兼棧谷。前路劇崔嵬。作客身原慣。茲行學荷戈。窮荒春不到。沙磧草無多。健翻摩蒼鶴。明蹄騁紫駝。莫持青鏡照。雙鬢恐先皤。臨歧本倉猝。欲去強逡巡。制淚各無語。加餐惟此身。衣裘煩料理。童僕勉艱辛。纔作連牀夢。臆雞又向晨。

伯兄以守城功保舉久遲未得入都寄懷四律

秦鳳涇原路幾千。沉魚翔雁兩茫然。孤城兵火存三日。絕徼風波近十年。東走河聲環木峽。西來山勢接祁連。官程屈指應堪數。消息誰傳到日邊。

五載慈顏一笑開。板輿先御向燕臺。自憐薄宦長安住。反累衰年遠道來。話到存亡俱有淚。

學和姊丈和叔兄俱歿于

伏身離憂患尙餘哀。輸他兒女齊誇口。曾聽嚴城戰鼓催。

風前心緒劇懸旌。欹枕中宵夢不成。豈有池魚驚失火。休疑社鼠更憑城。

時聞伏羌城樓被火。

防秋事早煩籌策。行

部威猶費送迎。曾記軺車西去日。有人韓范許平生。

蔣心餘先生送行詩有著書畢竟空言耳韓范功名在此行之句。

三山縹緲隔塵紅。破浪雲帆會許通。詞客今能談出塞。才人俱豔說從戎。鳴甄計就心真壯。磨盾詩成話

更工。兄有伏羌紀事詩一百韻何日對牀風雨夜。重提舊事一尊同。

呈大將軍福嘉勇公

徼外軍書午夜來。將星又見動中台。九重授鉞先聲壯。三十登壇衆望推。佩印密承宣室詔。分旗盡典羽林材。路人爭問嫵姚貴。此是專征第幾回。

暫駐牙旗大衆歡。籌邊樓上倚闌干。中宵鼓角橫戈聽。絕域山川聚米看。燃燭兩行分草檄。解鞍千騎會

傳餐。時調索倫勦旅甫抵前藏須知上將能持重。姓氏先令賊膽寒。

袴褶纒鞞結束輕。容參幕府學談兵。摩雲遠過閭浮界。計日應收的博城。麾下偏裨皆壯士。軍中禮數到

書生驢騾感贈銀蹄迅得免長途款段行。余經行青海馬力甚疲公以所乘馬予之甫得達前藏。

## 趙懷玉

字億孫號味辛武進人乾隆四十五年召試舉人今官青州府同知有亦有生齋詩鈔。

### 林屋洞

湖寬地肺通。土裂山腹厚。初猶龜可容。漸覺釜低覆。蛇行辭杖策。蟻伏嫌襟袖。驚霆左右轉。駭石首尾鬪。陰陽異旱潦。明暗雜昏晝。撲炬起蟄禽。瓜跡闕陰囿。金庭企靈威。石函虛篆籀。始疑造化洩。轉忤心志陋。奇遊倘可續。敢惜疲軀復。

### 登焦山

焦山不見山。積翠天際浮。挂席指海門。乘潮達巖陬。初升縵而曲。漸陟高且修。樹陰清晝霧。木勢層厓樛。警然露微罅。驚踏滄波流。身輕失久疾。地曠蠲煩憂。是時天宇肅。萬象澄清秋。蓬瀛氣東至。呼吸如可求。俯視松與寥。下等土一坏。決背鵬隼疾。隕魄龜鼈游。晨景澹欲沉。罡風凜難留。真人向我招。乘蹻驅玉蚪。曉過羅喉嶺。行十餘里憩潭柘。

山曉日未高。白雲羈如帳。花明亂殘月。十里同一望。籃輿陟崇嶺。人面森列嶂。忽然青蒼開。金碧落天上。不見枯千章。猶餘松十丈。碑留明昌刻。寺溯嘉福創。泛觴隨波流。折竹引泉羨。風來殿鷗翔。鐘動篋蛇放。

遺蹤半泯沒。過客猶想像。憑高俯傑閣。陡覺心眼暢。一拳峙中央。九峯互環向。日光亭午低。石色不肯讓。閒房晝如年。坐臥空色相。山僧謂余勞。早具伊蒲餉。

七月十四夜京口對月

入秋毒熱苦未減。況復束體投孤篷。今宵乍得泊洲渚。披襟獨受涼颼衝。蒼山如煙散波面。皓月作勢升雲中。白氣空涵一天地。金花碎迸千虬龍。老僧臨江口持咒。倚佛自說無邊功。楊枝露潤鬼界黑。茵蔯燈逐濤頭紅。風流千古此淘盡。直欲粒米招羣雄。騎鯨太白去不返。抱月思躡仙人蹤。茲行日遇石尤惡。塔上鈴語仍顛風。三更露重入篷底。夢醒正打金焦鐘。

題文信國書爲錢唐鮑文學廷博

書凡三百四十七字。前幅已缺。文載清河書畫舫。向在李中丞鹿山處。今歸於鮑。後有一峯跋語。謂空坑敗後所寄。一峯不知姓氏。小印署冰蘖二字。或云宋遺民也。王光祿鳴以書中入汀一語疑之。辨其非空坑作。其他跋語頗多。皆近人。故不及焉。

半閒堂築西湖幽法書名畫傾公侯。木棉菴中攜不得。半作劫燼無人收。當時豈索信公書。至今尺紙逾天球。鮑生家亦居湖濱。物不貴異惟其人。牙籤錦罽幾千軸。得此謂可空其羣。寥寥三百卅七字。空坑敗後從容寄。幅殘似恥瓦欲全。色淡還思淚深漬。已教八口墮虎穴。忍令孤城怯螳臂。間關久置成敗筭。類

仰尙兼家國計。臨危示法先示信。檢點殘軍收割印。人亡縱失將伯助。天意不教以疾困。公書云。在瑞金一病甚可愛。  
可憐覆巢難復全。生兒夭折女棄捐。魂從朱鳥返天上。心照青簡傳人間。傳疑傳似任史臣。黃冠故里恐非真。況爲曲筆揜正氣。大元革命邦維新。浮蹤偶向閩海寄。聚訟空若鴻溝分。如公可死死亦矯。龍首黃扉致身早。歿殊葛公節義傳。生勝雎陽宰輔表。後來豈少登科名。豪華但學公平生。讀書不識忠孝字。翰墨亦稱稽古榮。

請水詞

郡城東有白龍祠。每旱太守率官吏往禱。迎池中水歸。間卽得雨。謂之請水也。

天陰黯黯雲蓬蓬。樹頭吹盡東南風。立秋半月到處暑。五日十日仍不雨。有時屋角雷聲小。雷聲未終日杲杲。小兒入市執柳行。常俗禱雨作柳龍行。市中小兒折柳隨之。農夫坐隴嗟苗稿。攜苗報縣求勘災。官賑未發徵先開。朝聞呵殿門外過。云是請水城東來。城東祠宇祀老龍。焚香山積寶炬紅。老龍善睡兩耳聾。勺水不敢貪天功。官民束手兩無計。蝗旱此邦亦神意。昨日禁屠今宰羊。太守縣官賓在堂。

水車謠

水車聲晝不止。赤日烘人皮肉死。水車聲夜不息。官河日乾水一尺。河乾難致百斛船。柴米添價鹽添錢。青簾官舫上流至。一泊三日空沿緣。兩岸農夫不停手。長鯨怒翻渴蜃走。關南有雨關北晴。聞蘇松得雨。天意

獨客吾鄉久。君不見東南饒富推淮揚。去年河決今年蝗。彼民悔不生此方。水車雖勞何足傷。

長毋相忘漢瓦歌爲張舍人填賦

秦宮已灰漢宮作。靈臺置酒面寥廓。凄然誰使漢王憐。共舉當時薄姬約。主家歌舞稱平陽。承恩特賜千金裝。一朝上車入宮去。拊背但說毋相忘。漢朝故事有如此。片瓦銘辭誓終始。毋忘若比天久長。長樂長生皆妄耳。甘泉忽譴拳夫人。紈扇風多華殿塵。君心反覆那可恃。少翁空致帷中神。鴛鴦易冷琉璃脆。滄桑幾見秦山碎。瓦乎土質獨能全。中有多情萬古淚。色帶霜華形滿月。四字分明辨豪髮。銅爲沓冒玉作階。曾蓋何宮覆何闕。爾來好古集良朋。金石搜奇得未曾。昨見封宮傳舉契。早聞鈎弋出遺鐙。侯官林昔作瓦圖記。排山朱近日尤能事。如何掎摭尙見遺。天意將爲舍人賜。我交舍人近廿載。素衣漸化朱顏改。寒窻風雨一摩挲。車笠前盟宛然在。好裁壁友伴愁吟。舍人製瓦爲研莫問蘭池與上林。鼠鬚成塚魚牋盡。歷劫難磨耿耿心。

宣和琴歌

爲莊畫英明府作。琴名夏玉背有宣和御寶印。

宣和古琴善形製。背面斷紋蛇腹細。黃金爲徽玉作軫。祕印依稀鐫四字。秋風颯颯黃鶻哀。良工方選陰陽材。此琴是否百琴一。誰與伴者惟春雷。當時定樂委方士。更出樂章重郊祀。朱絃疏越一再彈。居然解慍歌風旨。君王玩好無不精。法書名畫紛縱橫。殿名易在改元後。念琴進御非承平。按宣和殿有百琴堂。宣和元年改宣和殿。



爲保和殿。人間不聽元音久。忽人南華散仙手。錦囊高置郭公磚。良物從來必有偶。焚香試請歌一曲。短側長清相斷續。響泉瀾瀾磬琅琅。銘背信堪呼夏玉。虛堂漸覺悲風生。凄切不似從前聲。平沙萬里寒雁落。想見去國蒙塵行。勸君囊琴且莫撫。世人但解耽歌舞。知音違選在曩餘。避劫茫茫思太古。中君不見會稽陵破見穿雲。弓劍何人葬故君。飄零更有汪供奉。操出思歸不忍聞。

景州

遙指隔谿塔。驅車過景州。春光先在水。暝色欲歸樓。燈市新年盛。人烟近郭稠。賢良誰第一。故宅問山邱。

省口伍行人祠

夜烏啼罷冷宮梧。祠墓千秋尙枕湖。蹤跡已開游俠傳。山川空負霸王圖。入秦七日偏存楚。報越三年竟覆吳。猶有未忘恩怨在。怒潮如雪動寒蘆。

留別都門諸子

去住真知兩不堪。且尋鄉夢返江潭。下車事已同馮婦。縮屋心誰信魯男。聽到悲歌先自淚。傾殘薄酒未成酣。故人知我緣親在。寄語夷吾謾諱貪。

三日風光歲又新。平生未識帝城春。空羣冀北難爲馬。捷徑終南況有人。彩筆久疎江令夢。素衣空惹庾郎塵。竈前檢點更炊具。合是勞薪作後身。

任邱追悼李先生中簡

宦海歸來松鞠殘。重過槐里夕陽寒。一經鄭重頻題篋。先生無子三黜蹉跎到蓋棺。傲屨屢愁生計短。賜園猶

憶主恩寬。乙酉夏余請業于西苑澄園剎那廿載傷心事。門下彭宣淚未乾。

劍門

斧鑿何年到五丁。攢如錄釣列如屏。通天箭枯層層黑。出匣芙蓉朵朵青。西蜀地形勞夢想。北宗畫法見遺型。只嫌拂水無聲久。願借山靈風雨聽。

哀張三舍人墳

昨歲書來今年報。忽傳惡耗自長安。汗青手定千秋業。垂白身終七品官。君以己丑入中書。今二十年矣。老遂客懷孫抱久。貧憐遠道殯歸難。春明舊會頻傷逝。歲辛丑。同人有詩酒之會。魚門辛餘兩前輩。相繼殯謝。及君而三矣。存篋遺詩忍重看。

王鼎

字祖錫。號條山。江南華亭人。乾隆四十五年舉人。有蘭綺堂詩鈔。

擬韋左司寺居

城闔厭鷺塵。林巖釋羈縛。偶謝郡符繁。遂茲禪扉樂。松風謾謾來。山月墮秋壑。澄懷物我間。萬慮渺何着。至道趨衆形。有無泯垠堦。智士出于機。靜者得所托。悠悠元契初。中心安澹泊。

鹿城秋夜對月偕秋潭竹嶼德甫習菴分韻

碧漢散清景，蒼然夕靄昏。相攜坐明月，捉席秋梧根。落葉紛以積，棲禽時一翻。何人弄橫竹，離思滿前村。

謁袁海叟墓

一代遺才出處難，感懷殘碣夕陽間。魚龍有地潛東海，猿鶴何人誚北山。老鐵千秋知已在，白燕篇成爲

青邱幾輩故園還。公獨以見羅龕風節期誰伴，明季猶菴先生亦曾遜跡於此展謁能生壯士顏。

舟經太湖口

雙帆剪破碧玻璃，秋色空濛望欲迷。七十二峯何處好，夕陽一角洞庭西。

汪學金

字敬箴，號杏江，鎮洋人。乾隆四十六年殿試第三人及第，官左庶子。有靜厓詩初。

蒲褐山房詩話：杏江爲持齋少司空哲嗣，襟情既勝，才調彌嘉，標格則玉樹瓊枝，詞賦乃金荃蘭畹。所鐫初稿已有揚州烟月江左文章之目，最工駢體，爲余拊三柳漁莊圖詩序，時謂其工，既由詞館。滄陟宮僚，兩次請假南還，世俱嘉其雅尚，所營靜厓小築，水竹增環，樓臺窈窕，梵磬鐘鐃，儼然世外，朋黨中如武林潘侍御庭筠同之，餘人莫逮也。蓋其夙植淨綠者深矣。

秋日同朱元圃晚步南園遲王萬夫雁湖不至

秋容媚夕景，幽境結遐想。佳時愜勝尋，清遊惜孤往。將儔覓素心，探邃獲元賞。雲霞氣澄蕩，原陸勢蕭爽。亂流散石淙，細路伏榛莽。林壑迭映蔚，軒除坐超朗。陰厓露氣凝，寒圃月容廣。閒庭一葉投，悄壁百蟲響。

素節悼奄徂。前遊憶疇曩。願言敦古歡。毋爲役塵網。志合跡自親。義孚道豈枉。攬衣望停雲。卻立增悽怏。

延清軒觀大理文石爲張萼聯賦

春陰三尺低壓檐。虛堂雲氣春氤氳。延清軒中貯文石。漆匣乍啓爭窺覘。骨節堅潤色蒼碧。文理刻畫皆精嚴。荆關闕筆寫不得。天然靈氣成飛巖。巖端仙人髻毛綠。玉芝瑤草堆筠籃。巖下清江清見底。遊魚連尾依澄潭。樹石禽鳥盡形相。物態栩栩生毫尖。四座拍手叫奇絕。賤子據案摩挲三。平生好玩百不入。此物竟使成奇貪。米公攫取吾豈敢。平泉祕惜君何慙。此時老梅花撲簾。社酒百甕開醅甜。但得主人日召客。芒屨踏破南城南。

新晴卽事

雨歇平蕪外。舟人蕩槳喧。魚蝦江上市。雞犬水邊村。官驛三千里。春風廿四番。梅花將落盡。玉笛最銷魂。

北河舟次

平野連天闊。長河帶郭斜。客程遲候燕。暮色上歸鴉。烟柳低垂岸。春潮淺露沙。直沽七十二。是處酒人家。

過趙北口

燕趙中原地。蒼涼獨客過。西風吹易水。落日下滹沱。大澤龍蛇動。荒原鴈鷺多。市中屠狗散。無復有悲歌。

清江道中

古渡綠陰低。人家半水西。叢篁當路密。幽鳥過村啼。衆澗歸溪合。羣峯傍堞齊。夕陽多暮色。蒼翠使人迷。

芭蕉

爾亦工愁者。相依倍有情。自然含雨氣。容易作秋聲。昔夢成何事。空中笑此生。小窻三葉後。且與醉鄉成。

舟中見月

月出照汀洲。江空夜色幽。星河低浦樹。風露近灘舟。亂葦漁塘夕。涼螢水驛秋。我行殊未已。信美不能留。

初春重遊百花洲有懷陸輕桴

重到同遊地。浩然懷故人。鄉園歸遠客。江國看初春。南浦風光霽。東湖草色新。應知婁水曲。樽酒話佳辰。

七夕旅懷

天末起孤愁。明河入夜流。今年初作客。此夕最悲秋。南國無鴻雁。他鄉見女牛。更誰吹玉笛。雙淚落盧溝。

晚至汶上縣

晚路貪新霽。行行送夕曛。亂雅先客宿。歸雁入春聞。浦樹明殘雪。村家隔暮雲。思歸汶水淚。不到楚江濱。

同述菴司寇游海寧寺。因至弇州山人祠。歸憩小齋。卽事三首。

步屨來初地。朋簪集上方。露齋僧供潔。水觀道心涼。隣竹分清蔭。池荷遞遠香。因從輞川老。一話舊漁莊。

海內推詞伯。瑯琊大道南。文章存四部。第宅失三龔。淨業祠依刹。元風觀記曇。六時結禪誦。香火舊情諳。

時議修葺祠屋。卽於左方重建壘陽觀以僧守之。

自笑衡門下。居然銷夏灣。周堂三面水。支閣一卷山。客麈蘭言美。仙枰橘趣閑。行藏無異撰。風浴詠歌還。

過桐城左忠毅公墓

羣小要孱主。孤忠忤大璫。清流成黨禍。冤獄借封疆。北寺朝臣盡。東林士氣傷。龍眠山色在。常照墓門旁。

胥江夜泊同存塘舅氏曹南枝先生登萬年橋望月

胥口驛前風露饒。鐘聲漁火劇魂銷。月明子夜誰家笛。人上吳江第幾橋。舊雨漸成萍跡散。春風應惜馬蹄遙。緣知一別愁如許。剪燭篷牕話晚潮。

卽事效松陵體

梅花將盡柳將絲。蝶躚鶯嬌作意遲。野圃未鋤留菜甲。山泉新汲試茶旗。春風烏帽花間酒。夜雨紅燈竹裏棊。取次江南櫻筍候。家園孤負踏青時。

初晴舟發苦竹洲

苦竹洲邊宿雨晴。江村風景近清明。柴門流水山棠發。戍壘斜陽野齋生。社燕歸時春社散。潮雞啼處午潮平。兒童踏慣青溪路。倒跨烏韉旁岸行。

晚秋感興

江樓東望俯三吳。落照西風彭蠡湖。鄉信又聞荒稻蟹。今歲江南不收。客懷何處覓尊鱸。晚霞圍郭山深淺。秋水連洲雁有無。最好郡齋吟咏地。不教詩興敗催租。

初夏晚窗卽事

芭蕉影裏坐攤書。但得清閑百不如。新綠簾櫳春去後。淡黃庭院月來初。荒齋速客三升酒。小圃歸童一剪蔬。休笑十年塵網內。依然清夢到樵漁。

皖江道中

潯江西去皖江東。席帽征衫笑轉篷。山鷓數聲松葉雨。溪蟬十里藕苗風。旗亭貰酒缸花綠。村店題詩蠟穗紅。明日燕雲南望處。吳頭楚尾怨青楓。

觀春明夢餘錄載黃石齋先生事

頑懦能興百代風。當年直節表青官。崎嶇絕地文丞相。憤切危言汲侍中。萬死邊關思補袞。孤軍海嶠殉遺弓。聖朝明詔憐忠義。青史成名荷大公。

書侯朝宗先生集後

梁苑遺編迴絕倫。英名奇氣未全湮。少年濁世佳公子。垂死清流舊黨人。直以文章褫馬阮。肯將名節負吳陳。風流江左傳遺事。爭唱桃花曲部新。

懷上海施秋水

天人策罷動螭坳。海上才名早夢蛟。賦命屢愁磨蝎限。得時初應漸鴻爻。機雲京洛稱佳士。孔李門牆託密交。聞道秋風理歸棹。尊鱸話舊掩衡茅。

曾煥

字賓谷。南城人。乾隆四十六年進士。今官兩淮鹽運使。

蒲褐山房詩話。維揚爲南北要衝。又有平山蜀崗虹橋諸名勝。故士大夫往來者。藍輿笥屐。徘徊旬日。而不能去。然二十餘年。覓船投轄地。主無人。每有文酒寂寥之嘆。賓谷開東閣之樽。集南都之彥。子門下。士被其容接者尤多。而擊紙揮毫。散華落藻。攬題襟館詩兩集。遂覺烟月爭輝。江山生色。

擬游焦山不果。卻寄王夢樓太守謝薌泉侍御胡黃海學博以江流天地外。山色有無中。分韻得

天字

海嶽庵中今米顛。謂夢樓飽餐山綠吞江烟。雙峯勝處口能述。過我屢結游山緣。我行有期已神往。況逢使

節開江船。謝公清興善吟嘯。幕下客又能詩篇。謂黃海瀕行與我三日約。神其鑒此惟焦先。蓬萊方丈多飛

仙。凡夫欲到風引還。恨無彩虹亘萬丈。化作飛橋長駕天。我生性僻愛山水。來官茲土宜最便。轅車何乃

太刺促。咫尺不辦雙行纜。遙知公等同拍肩。朝風夕汐景屢遷。別銘好趁江水落。問鼎驚見雲雷旋。華嚴

界現海雲相。羅漢岩有金剛禪。斯時念我定譏笑。山靈見怪奚辭焉。坡公懷慙意獨往。不退未肯因無田。



嗟我胡爲在塵滓。蝸廬誓卜雙峯顛。

遊慧山飲第二泉有感

不汲鑪塘今十年。丙午冬試泉于此胸塵萬斛無由滿。眼明江上見九隴。我似渴驥來奔泉。泉底山光青倒出。泉

邊水洞風蕭瑟。在山泉水竟常清。照我容顏非昔日。山僧爲我燒竹爐。示我孟端漁隱圖。品泉讀畫心眼豁。便欲相從漁隱居。我家麻姑神功水。釀爲冬醞清且旨。吾邑醞神功泉謂之麻姑酒自謀食肉出山來。不飲亦經十

年矣。年華逝水乃如斯。歸買薄田幾時始。

眞州準提菴老梅行

白沙江村有老梅。百年劫火餘枯荄。春風一夜忽鼓動。玉筍旁迸千枝開。天地有心試冰雪。龍蛇偶蟄驚霆雷。今人爭繞月觀樹。往日誰踏僧廊苔。廿四橋邊萬花海。我無暇去翻遠來。名姿往往寄幽獨。相賞故不從塵埃。疑是仙人萼綠降。返魂自得眞香催。惜無酒醉花前杯。參橫月落人空回。

瓜洲登大觀樓記所見

樓前破浪嘗鼓楫。樓上旌竿望中出。平生意興豪登臨。風利帆飛竟何及。夜深怒噫阻瓜步。曉起荒城拾苔級。振衣忽與三霄摩。俯首便同衆山揖。蕭公北顧此南望。六代烟嵐盡收拾。是時海門初上日。西北浮雲飛歛集。江天瀕洞如黃昏。一線電光吐還翕。雷聲撼崖崖欲走。雨勢掣水水皆立。潮汐疑爭赭龕放。金

焦恐作羅浮合。喬柯併力猶垂垂。浮圖鼻空頗岌岌。不知神鬼何往來。祇覺乾坤偏霑濕。大橋森竦餓鴉叫。小艇低昂浴鳧入。樓中立脚愁傾欹。衣袂輕吹向江急。反着僕從色黯慘。警歎無聲但噓吸。方春二月發陽氣。宜有蛟龍欲啓蟄。我來相值亦偶然。窮此大觀記篇什。

題宮娥乞巧圖

新月微黃露華白。樓臺迴與明河直。一縷爐煙鼻空碧。諸仙綽約當風立。何代宮娥乞巧夕。神光奕奕瞻九霄。鬢蟾飛動顰娥嬌。人語不聞衣帶飄。冰肌此際愁單綃。別有深房銀燭燒。銀燭相看兩神女。似說媧媧常獨處。但見明河不見橋。雙星今竟在何許。牕外梧桐滴殘雨。

汪梅村訪道圖

一路飛泉響。樓臺隱暮霞。不知春幾許。開遍碧桃花。有客扶邛竹。尋仙餌玉華。嗟予求道晚。婚嫁願何奢。

東臺道中

小邑無城郭。村圍衆壑深。地卑秋不爽。海近晝多陰。野艇因魚活。荒田費雁尋。水鄉生事儉。念此一悲吟。

正月十二日探梅鄆尉

昨日信風來。癡雲爲我開。前數日甚雨。十日立春始晴。鶯聲過茂苑。草色發蘇臺。小巷綠村曲。羣峯與柁迴。忽看花倒影。舟已繫林隈。

處處載春塢。家家向水扉。橫枝從礙路。香霧漸霑衣。憩石憐青蘚。扶筇盼翠微。此時幽興極。老圃欲相依。  
上方寺看梅

山門掩修竹。殘雪在庭陰。此地罕人到。梅花香獨深。春生前代士。客感去年心。小飲竟成醉。徘徊月滿林。  
贈王述菴侍郎得告歸里

纔看飛旆覲明光。去冬侍郎假滿赴都經過邗上。旋報縣車返故鄉。一代勳名在麟閣。五湖烟水占漁莊。侍郎有三經師  
盡匯先儒義。名士多從弟子行。他日吳中成洛社。白頭司寇醉吟長。

汪容甫輓詞

兩篇述學世空存。容甫著有述學兩外篇。茲事憑誰更共論。生有狂名過阮籍。死無弔客似虞翻。杳然東閣花前影。  
淒絕西湖雪裏魂。容甫卒於杭州。重檢蜀州人日句。滿箋遺墨是新痕。今年人日遊蜀岡。容甫有詩見貽。

種竹

舊日叢生竹。清陰小頗饒。場師嫌養小。春鳥欲遷喬。鋤出三弓地。移來百尺條。護根纔累土。立節已干霄。  
門逕全疑碧。樓臺更覺遙。響令風有韻。影待月來描。柳拂新添態。花穿越助嬌。帶霜猶矯矯。無雨亦蕭蕭。  
借爾能招鳳。求鄰莫瘞貓。引竹者多於隔牆埋死貓則笋過墻矣。爲竿經幾歲。成町卽今朝。鞋底防萌觸。衣邊看粉飄。敢言  
千戶等。庶共七賢邀。當暑休愁晝。聽秋好度宵。安排碁局坐。添得酒香澆。儻惠風人詠。從教律呂調。

浮山禹廟聯句

淮海惟揚州。禹功所排決。三江古統名。煥一郡今獨轄。念茲處塗泥。吳宛爾在營窟。孰障湍千迴。蔣知讓徒

恃土一撮。列岫奔長江。胡森如龍赴巨渤。何時掉頭過。梁此地片甲脫。側聞黑墳起。黃都章正值洪流割。浮

玉勢若浮。堂拔山力難拔。遙分城子尊。雙近與蜀岡兀。蓮花涌地肺。郭鍊柱撐石骨。鰲戴蓬萊峯。俞國鑑

驚飛蒼闥岫。詫異同博羅。何錦傳疑比郁鬱。交州石豈沈。煥慎縣槎不沒。珠瑤泗濱磬。壽汎汎龍池鉢。恐由

夸娥徙。知定受神人撻。衆响安得漂。森息壤故能遏。永惟刊旅勞。高實使昏墊活。篠簜敷益饒。都瑤琨產

無竭。筐篚具織貝。堂島夷安卉葛。有廟崇報功。雙以時肅展謁。樸猶做茨土。堃美但飾冕黻。畫梁欲通靈。

國鑑鑄鼎亦象物。虛壁驚生雲。錦大珪仰如月。薦果宜包柚。煥膳羞戒用鱉。纁藉玉曰瑚。壽棗盛豆以楬。兩

階列千舞。知讓九奏想球夏。溯自岩岳齋。森於時石簣發。四載異所乘。高六扈均所察。庚辰助淪注。都豎堦

周垧圯。導水淮獨艱。堂倒瀾江最闊。黃龍既曳尾。雙支祁復穿頰。然後瀉流沙。堃以次關伊闕。厥壤咸則

三。國鑑于外歷年八。綏綏歌新婚。錦呱呱泣遠別。豈惟手盡胼。煥不覺胼無胫。始藏洞庭簡。壽更立响嘍碣。

山海成圖經。知讓靈怪極荒忽。或為有臂螭。森或為從日秣。或為無口隸。高或為比肩蟹。或為鳥翼而魚。都或

人面而猾。日或炙女丑。堂雨或止女魃。神或司羽民。雙類或號蠶姪。雷獸或鳴夔。堃貳負或受桎。至今喜

傳摹。國鑑八廟尚髣髴。風雨紛欲飛。錦埃塵罔敢拂。府事允修治。煥聲教斯暨訖。臯拜予何言。壽帝曰汝不

伐作服兼作會。讓納總還納結。龜負洛水疇。森鳥耘會稽袋。食報宜孔張。梁明禪曷嘗越。相沿宋代觀。郁共誌梁時場。昨者吾山平。堂幾爲大河汨。澤陂思夏甸。變薪屬迫冬日。賴彼典則貽。莖感茲胥蠻達。隄根  
樅竹牢。鑑水勢放渠豁。澤國慶平成。浮山永不齧。煥

古赤刀聯句

有客懷寶至。綈函玉徑尺。色侔禹錫圭。曾名取用命冊。不以五城當。吳使爲萬人敵。溫其貫仁和。詹礪  
乃用剛克。精從委然孕。徐靈變滄耳赫。執此元璜元。吳謂之赤堇赤。一片橫烏雲。煥幾時化虹霓。輕冰  
翦其峯。煥平砥亘其脊。其本經綸文。梁其陰頡籀畫。缺痕如月牙。嵩鑿竅類雲成。右威良工匪斯今。嵩  
寶器聞在昔。粵若周王劍。煥輔之太保奭。上宗奉同瑁。煥西序設宏壁。言念先君公。梁丕休肇王迹。干戈  
載啓行。嵩鞞琫具容飾。越惟賜彤弓。嵩逮及動黃鉞。腥聞滅輕呂。名劍豔體授小白。武成戢而橐。煥毒  
抹列若剔。維茲赤刀藏。梁久隸典寶職。膏塗駢剛覺。嵩鋒令虎威辟。西京雜記黃公少時。陳器在雕几。嵩  
流輝射篋席。用彰厥聲靈。煥所重斯手澤。緊誰剖虹光。煥做古作露拍。采從黑水中。梁言鑄赤冶側。後魏  
帝以晉璣楚珥。嵩嬈宋斤魯削。叶有聲戛球磬。如銛濯絲髮。腦緊雞冠比。煥鱗脫蛇尾滑。珍宜並枝斯。  
事以晉璣楚珥。嵩嬈宋斤魯削。叶有聲戛球磬。如銛濯絲髮。腦緊雞冠比。煥鱗脫蛇尾滑。珍宜並枝斯。  
煥勇不藉椒亦。戰國勇。聖朝治偃武。梁君子貴比德。獻寶來于闕。嵩貢刀鄙大食。誰數戎衣勳。梁已邁千  
羽格。採入博古圖。配之鼎鬲鬲。煥

十月初八日夜集題襟館

冬暄陶令辰。地敞適高館。纖月升上弦。青浦王昶小春叶陽琯。梅信東閣催。奉賢陳廷慶斗望南豐竄。欣隨杖履來。

襄縣楊之灝辱顧車騎滿。昔雨今雨偕。曾煥湖雲海雲綰。弱冠與風浴。謂時山南城吳煊耄齡勤瑟僞。謂蘭泉師詩盟長不寒。

陳宴席此相煖。飲分大小戶。唐麟堂沐值上下滂。晚菘翠盈盤。襄縣王蔚宗殘菊香入瑤。悄悄漏水長。張彭年搖搖

燭跋短。樂意陶斯詠。俞國鑑醉顏笑而莞。方請題襟題。元和蔣微蔚共矜辨才辨。賢主振風騷。和諸生侍闈侃。評

詩沿謝翱。廷隸韻陋孫。恂篇常翻水成。之灝句似連珠演。月弄兼風嘲。煥露鈔并雪纂。樂府宣正聲。煊禪宗

具法眼。見善如不及。變聞歌必使反。羣依玉界尺。肇爭踏鐵門限。船為張憑喚。蔚宗楊因徐儒展。宗風倡廬

陵。彭年仁問匹荆峴。洪惟大雅材。國鑑敢謂知言選。自顧類砮砮。微蔚終應比瑚璉。老夫荷久要。和賤子申中款。

飛雲石作供。慶以八座雲石贈都轉廷慶落木硯新罨。蘭泉先生贈都轉硯名落木義托他山交。之灝珍添子墨伴。蘇銘僕未能。煥顛

拜公不免傳。烈愜朋權。煊錄別張祖錢。來為十日留。變歸去九峯遠。蘭泉古華兩先生俱言歸潮生荻洲寒。筆霜落楓

橋晚。米舫臨米書。古華太守所居齋名漁莊瀾漁隱。蘭泉司寇有圖蹤跡萍合乍。彭年阻長水溯宛。共期令名崇。國鑑

毋使芳訊斷。良夜何厭厭。微蔚華年惜袞袞。君以後期中。吾非興盡返。和

陳廷慶

字兆同。號桂堂。奉賢人。乾隆四十六年進士。官辰州府知府。有古華詩鈔。

將之長沙舟中作

雲低嶽麓陰。帆挂銅官渚。山雪瞬空明。水天澹容與。我欲弔沈湘。飯筒雜角黍。三戶縱亡秦。九歌尙悲楚。臺榭非襄王。江潭但漁父。水溜滄浪纒。瑟凭湘靈鼓。鶴羽翻縞衣。雁聲似柔艣。一往烟波深。滔滔自今古。

枕上聽雪口占

雪澤冬來少。詩人句不成。夜寒方料峭。風定益淒清。病枕聽猶細。山窗映漸明。疎慵朝未起。髣髴郢歌聲。

舟行天心湖玩月

春江歸棹駛。載酒愜幽尋。一雁橫空唳。迢迢千里心。輕帆張月夜。遠岫落雲陰。欲問升沉事。漁歌入浦深。

虛白樓在河湫山太和觀

細雨沐春山。樓尋濕翠間。坐來虛室靜。看去白雲閒。竹裏高人臥。松陰獨鶴還。幸當明月影。清夜對孱顏。

偕葉桂樵中翰元符訪社亭銓部雨中留飲薄暮登廣仁嶺乘月而歸

雲懷雨濛濛。人來空翠中。攀頭山色變。婪尾酒尊同。漸覺涼聲少。還欣晚霽通。三人蹤迹合。一笑印泥鴻。踏遍西郊路。山陰似此無。遙天千嶂合。落日一亭孤。俯壑心猶凜。凌梯膽轉麤。間輝看未上。重爲跂須臾。

舟次呈述庵先生

靈光公望峻榆枌。玉尺叨量舊著文。蒲褐瓣香容屢接。寒山鐘梵又同聞。五溪向說灘聲惡。萬籟能將筆

力分。

詩讀公演楚紀遊詩。游野臨關勞送客。新詩首唱倚斜曛。同送芸臺宗伯公詩先成。

楊倫

字西禾。陽湖人。乾隆四十六年進士。今官荔浦知縣。有九栢山房吟稿。

蒲褐山房詩話。西禾德器溫醇。如太圭不琢。太羹不和。望而知爲儒者。生平論學。以不欺爲本。主武昌江漢書院七年。其門下多尊而信之。撰杜詩鏡詮。實能照見古人心髓。足與朱鶴齡上下。

過廬陵弔文信國

半開堂中蟋蟀鳴。遂令鼙鼓東南驚。崖山風雨事淒絕。尙有一老支餘生。文山大節高嶸嶮。一簣無由障江決。辛勤萬里覓遺孤。屢敗非關用兵拙。孤忠百折不一更。獨有正氣胷中橫。當時生弔出炎午。公豈自激成其名。取義成仁符讀誦。得賢早賀天門玃。蓬萊首選歲有人。如公足爲科名重。江外蒼茫對夕曛。千秋碧血剩孤墳。慟哭冬青遺記在。至今猶憶謝參軍。

述菴先生二泖漁莊圖

伏波銅柱標扶胥。鄉里憶乘下澤車。丈夫報國經綸舒。至樂終遜歸田廬。先生盛世稱璠璣。文筆久壓幹輿璠。復爛兵法窮穰苴。大軍西征翻旆旗。元戎借箸籌邊儲。燕歌慷慨草檄餘。陣左曰啓右曰肱。指畫了髮就梳。黃茅黑箐途崎嶇。萬騎蹂躪陟彼砮。豎營擗掃臂擣虛。遂空賊巢擒魁渠。叩笮始得安耕鋤。師還迎勞降玉除。卿班累轉飄華裾。助燦天壤文淵如。盤錯歷遍厭拮据。漁莊入夢清魂遽。舊家澱山湖上



居。陂塘養就千頭魚。小築一徑通簾菸。九峯疊秀同環滌。雲氣滂出疑龍嘘。城荒白苧傳闔閭。楓涇夏日繁紅蕖。微波縞縠風來徐。釣竿落處深不淤。飛集鸚鵡兼鷓鴣。楠榴栝檜松杉楸。四圍蒼翠紛扶疎。幽懷此間聊可據。晨昏況得侍板輿。春醪餉客斟浮蛆。飯炊香粳熟新畬。葦絲突過長安菹。由拳之鄉樂只且。鏡湖許乞吾歸歟。觚稜回首心躊躇。雨露恩渥能忘諸。南臺方聞下除書。表率豸服封章臚。清霜乍飛走衆狙。聽馬步工無趨赴。願公莫亟賦遂初。廟堂獻替功難紓。遑學丁卯魃樵漁。

華明府秋槎石門觀瀑圖

片颿憶過匡廬下。夢想銀河向天瀉。香爐峯高未及登。空見江濤疾於馬。名山聚處數浙東。括蒼天姥遙相通。石門瀑布更奇絕。懸溜欲並開先雄。詩人位置天原別。紆組偏教近巖穴。前身孫綽令章安。界道飛流賦能說。嗜奇暇日探靈區。小舟一棹穿菰蒲。迴巒疊嶂勢盤鬱。短舸欲度須筇扶。松杉擁處登孤榭。照眼寒光剛激射。白日驚聞雷雨聲。玉龍飛下蒼山罅。著書昔有青田劉。赤松黃石同遨遊。雄虹時吐氣千丈。相與噴薄山之幽。高人跡等浮雲散。洞壑依然猿鳥喚。一條直注似長川。颿母風來吹不斷。故園住近九龍山。慣看匹練懸林間。遊蹤得此窮壯觀。煩囂滌盡開塵顏。我生亦具泉石癖。畫裏出簾窺咫尺。山靈若肯相招邀。準擬明春蠟雙屐。

鄭編修西橋黃山觀雲圖

山頂安得洪濤春。雲海萬頃雲蓬蓬。卻立雲端視雲背。俯瞰塵世皆蟻封。盪胸何止如擘絮。軒轅煉丹舊曾住。峯三十六洞十八翁。鬱迷濛不知處。倚天峭壁斗可捫。石上倒走長松根。疑是癡龍吐烟沫。遮翳白日蒼林昏。我生亦具看山癖。眼界未開負雙屨。對此茫茫欲振衣。便挽洪崖跨鵬翼。

武昌喜晤徐民部惕菴表兄賦贈長句

連旬苦雨陰雲堆。閉門不出生莓苔。輶車忽報故人至。廢卷起立心神開。此間會合非所料。握手入門先一笑。別期回首已七年。卻喜君顏猶壯少。憶昔長安居對牀。騷壇酒陣爭雄強。短檠伸紙共索句。不覺落月沈西牆。青雲退鷁予何有。君亦左官事奔走。中間消息兩茫然。傳得新詩滿人口。星郎出使多輝光。幕府贊畫需賢良。橫行闊視異流輩。意氣不減前清狂。索居兩載寡儔侶。奇氣因君思一吐。鐘鼎山林未可期。人生須各有千古。秋風蕭蕭黃鶴樓。要君同登最上頭。胸懷萬里瀉何處。拍檻快看長江流。

過周家水亭

一徑尋深竹。蕭然遠市闌。閒花多落澗。細雨欲沈山。漁網平橋外。人家翠鷺間。東頭士龍住。時復斂元關。

烟雨樓

輕烟漠漠雨濛濛。曲檻朱欄四面通。山色半浮津柳外。人家都在水雲中。珠簾捲處開歌板。漁笛吹來擢短篷。消暑無如此間好。鷺鴦湖上白蘋風。

# 馮集梧

字軒圃，號鷺庭，桐鄉人。乾隆四十六年進士，官編修。有貯雲居文稿詩稿。

蒲謁山房詩話：鷺庭爲養子，侍御三子，多藏書，精校刊，嘗刊元豐九域志，杜樊川詩注，惠定宇後漢書補注，盛唐三儀禮集編，又畢秋帆尚書續資治通鑑，刻未及半，賴鷺庭重校刻成之。

## 武城縣

漳與衛合流，厥性喜奔竄。沙水相排撈，取道倏變換。此場乃彼漲，往復如螺旋。舳舻行相銜，回頭成對面。張帆復卸帆，順逆日幾徧。自是水致曲，非關風善變。我昔鼓征棹，當春勢瀨瀚。怒濤聲喧騰，所蓄無巖岸。村落所當衝，頽毀存不半。彼民多顛連，客心頗驚憚。茲行值水縮，平進隨魚貫。秋柳何依依，呼羣有鳧鴈。飽餐無餘事，篷窗可靜翫。絃歌指高臺，博會聊一粲。汝口流湯湯，計程按昏旦。

## 哭劉給事謹之卽述湯夫人殉烈事

有夫爲良臣，有婦爲烈婦。人生熟無死，死亦稱嘉耦。結縵三十載，尸癘兼奉帚。早歲贊成名，瑣闥紆華綬。松柏有高枝，蔦蘿相結糾。雖非同根生，所願同白首。陰堂告惡夢，年僅四十九。良人忽見違，子焉無主後。茹淚視含椽，苞箆及翠柳。客散僕御倦，仰視月宿斗。重泉路幽幽，去者尙未久。安行應有待，相從宜急走。吾有朱絲繩，結以雙環紐。持向靈床前，畢命義不苟。身死名則存，誥朝傳萬口。至尊聞之嘆，謂此足深取。良臣誠可惜，乃婦更寡偶。下詔爲表揚，贈恤從優厚。詔贈給事爲鴻臚卿夫人得旌表我家本通家，風義又師友。名門標

盛事悲喜兩俱有。愧無如椽筆。闡發付巨手。金石或可渝。此事期不朽。

### 俞廷樞

字純植。號柱峯。餘杭人。乾隆四十六年進士。官至昭通知府。有柱峯遺詩。

將赴昭通陸行抵富陽途中回望天柱峯有作

峨峨天柱峯。佳氣籠碧落。其巔多白雲。雲移向南郭。近郭卽我家。慈親居索莫。我初還家時。侍母坐帷幕。母言萬里行。嚴裝宜踴躍。循聲遍南徼。所學期無作。一旦辭母行。母訓聽猶昨。迢迢富春道。僕夫勇氣作。去速首屢回。但見峯岬嶮。願將思母心。隨雲佈寥廓。望雲詎師古。離懷冀可託。

己亥初冬都門虎坊寓齋食寒具與朱文藻朗齋陸以誠和仲胡光龍雲川聯句

消寒候未肅。治具法久諳。食單供數九。文藻節物宜春三。宋人以寒具爲寒食之具。餅無湯可飲。淘非冷耐唅。入油質彌

脆。以誠著鹽味不甘。想其登釜沸。不敢同湯探。數尋類撻玉。劉禹錫寒具詩。纖手撻來玉數尋。光龍。一齋疑采藍。不教書畫近。

聊與餛飩參。正如恩膏沃。廷樞具見霑濡覃。膩脣鼠方竊。爭餌魚同貪。袖絲比夜績。文藻食葉如春蠶。但聞聲

簌簌。不辨語喃喃。甜水淪苦茗。京師謂淡水曰甜水。以誠乾酒啓小奩。燒酒曰乾酒。醉醒各隨量。飢渴任所耽。滑喉咀味

速。光龍染指攫取酣。高堆覺盤小。備濯催盆酒。稠疊不知飽。廷樞煎熬倘能堪。來愁廚傳遠。賣聽街市儉。吾鄉

又名饊。文藻餽物常宜男。棗栗佐分果。彈酒爲伴函。武林風俗。以此爲饋子生男之家。佐以棗栗彈酒之類。交相餽遺。今茲偶饗餐。以何必

論北南屑餘戒暴殄。槃盡增惶慙。主賓各叉手。龍光。僮僕空攜籃。一飽仍向火。再展期傳柑。詩宜踵題字。廷

### 沈景熊

字炳季。號嵩門。仁和人。乾隆四十九年進士。官印江知縣。有寄取軒詩鈔。

蒲陽山房詩話炳季爲余門下士。叢書稗說。靡不瀏覽。發爲詩。如入波斯之肆。木雞母。往。俗。雜。見。沙。礫。間。杭。大宗。編。修。稱。之。余。在。武。林。修。西。湖。志。招。以。入。局。因。深。知。其。學。業。晚。膺。民。社。旋。卽。懸。車。亦。振。奇。好。古。之。士。也。

### 西江古鐘歌

維皇至治誰比蹤。聲教廣被協堯雍。德動天地大樂出。西江爰獻蒼姬鐘。徵祥已邁汾陽鼎。典寶不減東序鏞。齊盟周景不可見。對此厥象羅心胸。鑿銑角甬雕刻巧。禮圖繪畫真僞儂。面各四乳乳四面。三十六乳如攢峯。寸挺戛擊乳乳異。舂容鞞鞞聲丁冬。銘文可識籀史篆。結體古秀蟠蛟龍。正月乙亥誌造作。子孫世享何敬恭。至今相對猶鄭重。恍如入廟來朝宗。更愛完美剝蝕少。朱斑燦爛耀丹彤。百神呵護信不易。紫泥土碧光茸茸。我昔遨遊過渝水。幸覩此物誠歡驚。摩挲不釋加考核。摹寫鈎勒全姿丰。爲綏爲雅未敢定。集古金石相追從。乃知真是三代器。一十二律殊聲容。非編非籟亦非特。依時大小無相重。此地舊爲墨莊宅。當年什襲恣清供。長留已及數千載。湮沒久被磚苔封。一朝應瑞現牛斗。鏗然出土驚三農。

九牧上貢天子喜。皇皇寶貴珍方琮。命付太常重審定。詔音復作慶遭逢。短章作頌且志遇。會見儀鳳來  
邕。邕。謹安篆文。其大鐘名似雅。小鐘名似綬。不敢妄識。恭聞御鑒定爲。鐃鐘并依制增置廟祀。作樂崇德。千古莫隆。歌以紀事。且志遇也。

途中

孤篷小泊碧山根。短竹疎籬古寺門。樹接殘陽紅有暈。水連芳草綠無痕。趁墟雲濕魚蝦市。喚渡人歸薜荔村。長望鄉關愁日暮。烟波江上與誰論。

邵培惠

字元惠。昭文人。乾隆四十九年進士。官麗水知縣。有避葵吟。

清江浦

橘產自南方。北踰淮化枳。鸚鵡不踰濟。貉踰汶則死。山澤各有宜。物生苦轉徙。胡爲名利人。輕身去故里。客土無元氣。始謂殊不爾。頻年賦行役。斯言真信矣。今我至河干。景物劇可喜。泉甘土盡腴。風柔草爲靡。舳艫疑駕梁。軫輻不留軌。鄉音漸有情。水族更多旨。分明魚處陸。萬丈落清泚。江湖頓相忘。吹沫掉其尾。回頭人海中。兩載百日耳。浪跡每匆匆。歸興常聲聲。衣塵緇未化。不藉河流洗。但念何所爲。去來忽未已。嵇康倘詰責。鍾會齒難啓。用此良自悵。慷慨不可止。

瓜洲城

蘆荻叢中古戍樓。孤峯隱隱瞰江流。鐘聲遠雜潮聲落。山色平分樹色浮。絕岸風雲連鐵甕。遙村燈火隔揚州。賣瓜步上聞佳話。願得分甘到客舟。

宿高溪

古寺依山側。征夫此暫停。夕陽穿逕竹。流水約池萍。行旅慙攜鶴。風塵學戴星。明朝又前路。詎敢惜勞形。

李驥元

字鳧塘。綿州人。乾隆四十九年進士。官編修。有雲棧詩稿。

蒲湖山房詩話。鳧塘詩有奇氣。亦有逸氣。起句如東風吹早霧。豁然露朝陽。秋風捲地來。黃葉打牕。驪山頂出天上。山根枕湖眠。龍山如龍臥。重湖飲江水。大江日下流。我沿江水上。天地爲大爐。煎此瀧川水。天雲送春去。山色青無邊。結交不結心。同如異地。又如荒雞何與人。偏不穩棲宿。五更枕上鳴。唯愁客夢然。又河連天上。月沙聚雲中。雁人來。鴻雁飛。河動月九亂。看山如飲酒。快意輒心醉。皆能自鑄偉辭。未經人道。與兄墨莊。工力悉敵。可稱二難。但本粟一囊。臣飢欲死。未免流浪江湖。因人作計。故激昂慷慨中。有危苦蕭颯之音。

天雄關

左排山萬峯。右包江一道。蟲蟲天雄關。衝霄崖未了。地據西南雄。天圍秦隴小。波濤碧油油。霜霰白皓皓。自經開道行。羣山入懷抱。及茲歷益高。如鶴凌蒼昊。但惜往來人。扳梯增懊惱。

飛仙閣

仙人歟。白雲不肯塵囂住。凌峯修一閣。高掛雲多處。門棲唐代烟。園種宋時樹。欹崖下接江。陡壁中開路。

雙雙白玉帶。啓門四山顧。舉手忽招我。言駕鶴來馭。便當謝時流。追侍王喬去。

滴水崖

泉水山澗流。澗下山更險。積勢懸崖前。一落瀉坑坎。硤衝石有聲。瀕洞山俱撼。幸逢寒沍時。不雨波濤減。掣鷹駭越禽。見兔想秦獫。壑深風勢號。霜重楓枝染。水旣碧無塵。山猶青未斂。何須桃花源。卽此供流覽。

七盤山

南棧七盤促。北棧七盤長。憑高瞰地底。曲折同羊腸。一盤訝天近。舉手捫日光。三四盤漸轉。如灘下舟航。五盤六盤上。山翠霑衣裳。樹垂萬年古。泉落千丈強。紆迴第七折。始得遵平康。江翻浪中雪。馬跡橋上霜。迴頭望山頂。烟霧空蒼茫。

壽陽縣宿

羣山隨我來。寸步不離側。蜿蜒到縣城。頗使遊人適。山鋪落日黃。水冒浮烟碧。細流入孤村。千峯圍一邑。停轍更流覽。尖沙吹絡繹。地寒草木枯。秋高鷹隼擊。人言苛政猛。前令新罷職。寄語後令來。蒼生宜愛惜。

駱駝灣

繫馬駱駝灣。曙色分行客。長江隱塞雲。遠地苗寒麥。犬吠野人籬。酒香遊子席。魚肥僕意歡。芻多馬聲悅。此間有歧途。西南劃阡陌。南連楚水烟。西接秦山雪。我家蜀江西。胡爲向南役。翹首望劍關。肝腸兩斷絕。



入峽

兩山峯欲合。幾無水行地。神禹鑿石開。江流初得意。汪洋雪浪來。河漢峽中墜。吼如秋夜潮。快如金埒驥。不知造化功。奇險何年置。鎖斷粵咽喉。舟度亦非易。篙師反歌笑。上峽若無事。嗟爾澤國人。終以水爲戲。

石門山

石門山有四。險惡惟塘窟。峯高天疑卑。壁峭石欲落。兩兩建崇墉。蓬蓬榮刺竹。虎嘯陰風生。泉飛日浴。開關無人徑。步崖卽顛覆。豈知我亦巧。輕舟破江綠。偕鳧上急灘。飛語答空谷。側耳聽鷓鴣。倚舟看楓木。

白馬灘

下流望上灘。灘勢垂天半。噴欖幾千尺。如馬下高棧。舟進波欲攔。閩同鄒魯戰。畢竟人勝水。遲迴達灘岸。兩山又交壤。中嵌江一線。日月照不及。蓬蓬雲遮面。苗夫力牽纜。出山途始轉。迴望不見江。但覺林葱蒨。頻年江海行。風波歷亦慣。篙師翻畏意。泊舟猶喘汗。

雪山關

白日走青霄。夸父不能逐。一上雪山關。日疑手可掬。峻看達天門。雄訝折坤軸。亂山泣魑魅。一徑通黔蜀。樹欹上下岸。風簸西南谷。當關據一夫。萬馬應裹足。憶昔隴西行。劍門關駐目。謂擅天下險。烏知險非獨。俯視肩荷者。喘汗步難速。安行愚公移。蕩平路坑壑。

送友人回蜀何吉齋

誰遣春花伴客旋。聲聲祖悵咽離弦。月明燕市嘶征馬。雲暗巴山聽杜鵑。攬轡空懷齊物志。歸鄉且讀養心篇。相思莫謂書難寄。飛雁猶能到日邊。

甲寅春日送述菴先生南歸

氣節凌霜柏。聲華震地雷。七旬恩眷渥。千里嘯歌迴。召伯棠猶在。陶公菊又栽。公去秋曾告假南歸薊雲華蓋捲。吳月斗牛開。憶雕龍辯。真憐倚馬才。詩刊湖海集。酒醉聖賢杯。雨淚滋桃李。時祖謙都門下土風情寄竹梅。故鄉親友說。疏廣賦歸來。

潘奕藻

字思質。號畏堂。吳縣人。乾隆四十九年進士。官刑部郎中。有歸雲詩集。

游天平山遂宿白雲精舍

我非山中人。強就山中宿。松風扶杖兩液輕。野鳥迎人幽徑熟。山中老僧舊所識。扣門不厭聲剝啄。白雲封戶洞壑深。玉筍參庭衆峯轟。庭中方池清可鑑。圍以朱欄蔭修竹。游魚啖影花氣肥。垂楊蘸水波鱗盛。雲泉古篆誰所銘。第一清流冠南服。石壁有白雲泉三字篆。又題曰吳中第一泉。石磴垂蘿辨茶窠。翠崖遺影留仙躅。山僧延客何所薦。斫取枯枝煮溪蕨。飯餘小憩涉山亭。月黑惟看星燭煜。空林突兀竄鼯鼠。飛泉蕭瑟鳴琴筑。悄

然清冷不可往。閉門孤坐依殘燭。鋪牀拂枕少眠臥。鼻息雷鳴驚倦僕。人生百年坐飄忽。塵勞擾擾紛馳逐。榮枯得喪醉夢裏。孰以亡羊辨臧穀。其言小隱待功成。蝸鬪何時息蠻觸。我今暫結清淨緣。有似冰丸破炎燠。何當遂此永幽棲。青壁茆齋尙可卜。統如五鼓耿不寐。木魚旋起呼僧粥。

聞笛

秋浦月初上。秋風雁獨飛。何人愁出塞。有客賦將歸。水落魚龍寂。霜清楊柳稀。徘徊聽入破。涼月冷侵衣。

確山縣古爲道國

葛爾春秋國。嗟哉黨錮名。世家遺舊史。故里重儒生。蝸沸涼移樹。山危翠壓城。此邦風土好。不讓首陽清。  
死願葬首陽山側。范孟博語也。

七夕次小河汛

今夕是何夕。蕭然旅館清。風驅殘暑淨。月蕩一鉤明。瓜果天涯節。雲山客子程。前途烟水闊。好趁布帆輕。

呂星垣

字叔訥。武進人。貢生。官新陽縣訓導。有白雲草堂詩。

北窻曉起

北扉斜對玉山菴。鐘磬遙遙度碧曇。几近蔬園幽景曠。帳連豆架暗香含。半窻雁影秋河澹。一枕蟲聲夙

雨酣。自覺精神生早起。寫經兩幅抵朝參。

### 邱思燕

字丙南。青浦人。諸生。有青山吟藁。

朱寅齋莊蓮谷。泖客飲裕光齋。

訪舊斜陽裏。歸雲嶺上收。主人孔北海。座客謝南樓。何幸邀青眼。多情易白頭。玉簫聽未得。明月照人愁。

### 六和塔

山僻疑無路。鈴聲樹杪聞。海天雙眼豁。吳越一江分。懷古臨流水。題詩對斷雲。六和憑眺迴。頭地覺超羣。

### 慧日寺觀梅

盈浦平添十里潮。尋芳好放木蘭橈。最憐旭日和風裏。剩有枝頭雪未消。

江鄉贏得此身閒。信到招提數往還。忽憶虎山橋畔路。朦朧月色照吾山。  
香雪海本名吾山。

